

Tuhun vaha naahyí Mateo sahá ña nacaja Jesucristo

Chichi naquixi Jesucristo

(Lc. 3:23-38)

1 Ña yóho cúu quivi na nasacuu tásáhnú jícó Jesucristo, mé a naquixi chichi David xihín chichi Abraham:

²Abraham nasacuu tátá Isaac ta Isaac nasacuu tátá Jacob ta Jacob nasacuu tátá Judá xihín java ga ñani da. ³Judá nasacuu tátá Fares xihín Zara ta náná ndíví da yóho nasananí ña Tamar. Ta Fares nasacuu tátá Esrom ta Esrom nasacuu tátá Aram. ⁴Ta Aram nasacuu tátá Aminadab ta Aminadab nasacuu tátá Naasón ta Naasón nasacuu tátá Salmón. ⁵Ta Salmón nasacuu tátá Booz, da cúu jahyi ña naní Rahab. Booz nasacuu tátá Obed ta Obed yóho nasacuu da jahyi ña naní Rut cán. Ta mé Obed yóho nasacuu tátá Isaí. ⁶Ta Isaí nasacuu tátá rey David ta rey David yóho nasacuu tátá Salomón, da cúu jahyi ña nasacuu ñájíhí Urías nū cuítí cán.

⁷Ta Salomón nasacuu tátá Roboam ta Roboam nasacuu tátá Abías ta Abías yóho nasacuu tátá Asa. ⁸Ta Asa nasacuu tátá Josafat ta Josafat nasacuu tátá Joram ta Joram nasacuu tátá Uzías. ⁹Ta Uzías nasacuu tátá Jotam ta Jotam nasacuu tátá Acáz ta Acáz nasacuu tátá Ezequías. ¹⁰Ta Ezequías nasacuu tátá Manasés ta Manasés nasacuu tátá Amón ta Amón nasacuu tátá Josías. ¹¹Ta Josías nasacuu tátá Jeconías xihín java ga ñani da. Ta nasacuu da tiempo tá natiin soldado na Israel já nasandaca ñahá da na cán ñuu Babilonia.

¹²Ta tá nasanduu na Israel ñuu Babilonia cán já nacacu Salatiel ta tátá Salatiel nasacuu Jeconías. Ta Salatiel nasacuu tátá Zorobabel. ¹³Ta Zorobabel nasacuu tátá Abiud ta Abiud nasacuu tátá Eliaquim ta Eliaquim nasacuu tátá Azor. ¹⁴Ta Azor nasacuu tátá Sadoc ta Sadoc nasacuu tátá Aquim ta Aquim nasacuu tátá Eliud. ¹⁵Ta Eliud nasacuu tátá Eleazar ta Eleazar nasacuu tátá Matán ta Matán nasacuu tátá Jacob. ¹⁶Ta Jacob nasacuu tátá José, da nasacuu yíí María. Ta María cúu ña nasacuu náná Jesucristo, mé a nachindahá Ndióxi cacomí a cuéntá sahá ñayivi.

¹⁷Ñā cán quēa janda tá nacasáhá cácu jahyi Abraham janda quiahva naxinu coo a quivi nacasáhá cácu jahyi David já nayaha uxu comi generación. Ta tá quiahva nacasáhá cácu jahyi David janda quiahva natiin na Babilonia na Israel já ñéhe ñahá na cuahan na nayaha inga uxu comi generación. Ta nayaha inga uxu comi generación nani nasanduu na Israel ñuu Babilonia janda quiahva naxinu coo quivi nacacu Jesús, mé a nachindahá Ndióxi cacomí a cuéntá sahá ñayivi.

Tá nacacu Jesús

(Lc. 2:1-7)

¹⁸Joho nasahiin tá nacacu Jesucristo: Mé María, ñā cacuu nánā Jesús cán sa nasahan ñā tuhun ñā ñā tandaha ñā xihín José. Joo tá cámaní coo da xihín ñā já nacandaa ini da ñā ñúhu jahyi ñā. Ta ñā yóho nasacuu a ñā nacaja ínima yii Ndióxi. ¹⁹Ta José, da cacuu yii María cán cúú dá da cája ndinuhu ñā ndaa. Ta nacaán da ñā nasahiin ñā xihín inga dataa joo coo naxeen da cahan núu da sahā ñā nuú ñayivi. Sahá ñā cán quēa nasacu ini da jándacoo jehé da ñā. ²⁰Ta nani cáhvi ini da sahā ñā caja da anda jáví naquixi in sani nu dá ta nandaca náha in táto Ndióxi nu dá. Ta tañu mé sani cán nacaan xihín dá. Já nacachi a já:

—José, da naquixi chichi David, a cáyihví tohún tandahún xihín María jan jáchi nacaja ínima yii Ndióxi ñā ñúhu jahyi ñā. ²¹Ta tá sa nacacu jahyi María já chicaan ndó quivi á ná cananí a Jesús jáchi jácacu a ñayivi nuú cuachi tá ná candeé ini na mé á —nacachi a.

²²Tóco ndihi ñā yóho nayaha ñā ná xinu coo nuú tuhun Ndióxi ñā nacañí in profeta sanahá ndivaha cán ta já nacachi da cán já:

²³Vaxi quivi cañuhu jahyi in ñā tacú, ñā a náha coo taa xihín.

Ta tá sa nacacu jahyi ñā cán já cacu na quivi á cananí a Emanuel. Ta tuhun yóho cúní cachi a: íin Ndióxi xohó.

²⁴Ta tá nandicaxí ini José já nacaja da tá íin nacachi táto Ndióxi cán xihín dá. Ta já natandaha dá xihín María. ²⁵Joo coo nasahiin da xihín ñā tá quiahva íin in dataa xihín ñájíhí da janda quiahva cacu jahyi María. Ta tá nacacu a cán já nasacu José quivi á cananí a Jesús.

Tá naxito nihni na ndichí Jesús

2 Tanacacu Jesús in ñuu naní Belén ñā ndacaan estado Judea. Ta mé tiempo cán nasacomí rey Herodes cuéntá sahá nación Israel. Ta mé tañu já naxinu coo java na ndichí ñuu Jerusalén. Mé na ndichí yóho cúú ná na jácuaha xihín quimi ta naquixi na chí nu cána candii. ²Ta tá naxinu coo na ñuu Jerusalén já nandaca tuhún na ñayivi já nacachi na já:

—Ndájá íin da loho nacacu viti jan, da cacuu rey nuú na Israel. Jáchí naxini nde naqueta quimi nuú nde ta xihín rí yóho sa nacandaa ini nde ña sa nacacu da. Ta viti vaxi nde yóho caja cáhnu nde da —nacachi na ndichí cán ndáca tuhún na.

³Ta tá naxini johu rey Herodes ña yóho já nacasáhá da ndíhi ndivaha ini da ta quiahva já nacasáhá ndíhi ini tóco ndihi ñayivi ñuu Jerusalén cán.

⁴Sahá ña cán quéa nacana rey Herodes cán tóco ndihi na sacuahá nuú jutú xihín na jánaha ley Moisés cán. Ta já nandaca tuhún da na saha ndá ñuu cúu nu cáchí tuhun Ndióxi cacu da nasahan Ndióxi tuhun a chindahá a cacomí a cuéntá sahá ñayivi. ⁵Já nacachi na cán já xihín dá:

—Ñuu Belén, ña ndácaan estado Judea cán cúu nuú cáchí tuhun Ndióxi cacu da jáchí quiahva já nacahyí in profeta sanahá tá nacachi da já:

⁶Vatí ñuu Belén, ña ndácaan estado Judea,
cúu á in ñuu loho ndivaha tañu ñuu náhnu cán joo íin sahá a,
jáchí tañu ñayivi ñuu cán ndindita in da cacomí cuéntá sahá na
Israel, na cúu cuéntá Ndióxi, já nacahyí in profeta sanahá.

⁷Tá nandíhi já nacana xóo rey Herodes na ndichí cán ta já nandaca tuhún da na cán saha ndá quivi nanaha quimi cán mé rí nu ná. ⁸Anda já nachindahá da na ñuu Belén. Já nacachi da já xihín ná:

—Cuáhán ndo ñuu Belén cán ta ndaca tuhún vaha ndó ndaja cáa sahá taa loho nacacu jan. Ta tá sa nandínehe ndó a já quixi ndó caxi tuhun ndó xihín i já ná cūhun ri yehe va caja cáhnu i ña —nacachi Herodes xihín na.

⁹Ta xihín ña yóho naquee na ndichí cuahan tucu na. Ta quimi, rí naxini na nu cuítí cán já ndáca tucu rí na cuahan na. Ta tá naxinu rí chí nuú íin mé a loho cán anda já nasacandichi rí. ¹⁰Ta cájii ndivaha ini na tá xini na mé quimi cán. ¹¹Tá nandíhi já naquihvi na ini vehe já naxini na mé a loho cán xihín María, náná a. Ta já nacaxítí na nu á ta já nacaja cáhnu na ña. Ta tá nandíhi já nasuná na yuhú sato ñéhe na ta já najoco na jiuhan cuáan nuú a xihín jusa vaha xihín in ña támi sahan naní mirra nu mé a loho cán. ¹²Tá nandíhi já naquixi in sani nu ná ta xihín mé sani cán nacachi Ndióxi xihín ná ña ná a ndícó coo na chí nu íin rey Herodes. Sahá ña cán quéa nandijama na íchí cuánúhu ná ñuu na.

Tá ñéhe na Jesús cuahan na Egipto

¹³Ta tá sa naquee na ndichí cán cuahan na já naquixi in sani nuú José ta nandaca náha in táto Ndióxi nu dá. Já cáchí a já xihín dá:

—Cuándacoún ndiquehe ña loho jan xihín María, náná a ta cunún cūhun xihín ná chí ñundáhyi nación Egipto. Ta cán coún xihín ná janda quiahva ná caxi tuhun i xuhun. Jáchí caca nuu Herodes ndinducú da ña loho jan ña cahní ñahá da —nacachi táto Ndióxi cán xihín José.

¹⁴Anda já nandacoo José já naquehe da Jesús xihín María, náná a já naqueta ñuú na cuahan na chí Egipto. ¹⁵Ta cán nasanduu na janda quiahva naxihí Herodes. Tóco ndihi ña yóho nayaha já ná xinu coo nuú tuhun nacachi Ndióxi sanahá tá nacahyí in profeta já: “Nasahiin jahyi i nación Egipto ta nacana i da ná ndicó coo da”, cáchi tuhun Ndióxi.

Tá nasahnda Herodes chuun ña ná cahní na na valí

¹⁶Ta ndaja coo naxini Herodes cán ña najándahvi na ndichí cán da sahá ña coó naxinu ga na nu dá. Ña cán quea a juú quiahva naxojo ini da. Ta chí nasahnda da chuun ña ná cahní ndihi na taa valí, na ivi cuia chí ninu, mé na ndúu ñuu Belén xihín ñuu valí catáhan xihín á. Jáchí sa nacaxi tuhun na ndichí cán xihín dá ña naxini na mé quimi anda tátuhun ivi cuia. ¹⁷Ta tá nandihí naxihí na valí yóho já naxinu coo nuú tuhun nacahyí profeta Jeremías sanahá ndivaha tá nacahyí da já:

¹⁸Ñuu Ramá jandá joho ndáhvi tácu

cáyuhú cóhó ñáñáha sácu ñá.

Ta ñá sácu yóho cúú ñá Raquel. Sácu ñá sahá jahyi ñá.

Ta co cúni ñá ndico ini ñá jáchí naxihí jahyi ñá, cáchi tuhun Ndióxi.

¹⁹Joo tá sa naxihí Herodes já naquixi tucu sani nuú José nu fin da nación Egipto cán. Ta nandaca náha in táto Ndióxi nu dá já cáchi a já xihín dá:

²⁰—Cuándacoún ta ndiquehe Jesús xihín María, náná a ta cuahán ndicó coo xihín ná chí ñundáhyi Israel. Jáchí sa naxihí va na ndúcú cahní ña loho jan —cáchi táto Ndióxi.

²¹Anda já nandicoo José ta ñéhe da Jesús xihín María, náná a cuahan na ndicó coo na chí ñundáhyi Israel. ²²Joo tá ñéhe da tuhun ña nandicojo Arquelaos chuun cacuu da rey nu Herodes, tátá da já nayihví José cuhun da chí estado Judea. Ta sahá ña sa nacaxi tuhun táto Ndióxi tañu sani nu dá sahá ña cán quea nandijama da íchi ta cuahan da chí estado Galilea. ²³Ta naxinu coo na in ñuu naní Nazaret nuú nasanduu na. Ta xihín ña yóho naxinu coo nuú tuhun nacahyí na profeta sanahá ña cacuu Jesús da ñuu Nazaret.

Tá nacasáhá Juan, da jácandúta ñayivi cáhan ndojó da yucú íchí cán

(Mr. 1:1-8; Lc. 3:1-9, 15-17; Jn. 1:19-28)

3 Mé tiempo cán Juan, da jácandúta ñayivi naxinu da yucú íchí cuénta estado Judea cán. Ta nacasáhá jánaha da ñayivi. ²Já cáchi da já xihín ná:

—Xíní núhú jándacoo ndó ña núu cája ndó ta ndicó coo ini ndó nu Ndióxi jáchí sa nacayati quivi cacomí Ndióxi cuénta sahá ñayivi —cáchi da xihín ná.

³Mé Juan yóho cúú dá da naçahan profeta Isaías saha tá naçahyí da já:
Vaxi quiví tá cahan cóhó in da tañu yucú íchí ta cachi da já xihín
ñayivi:

“Caja tiaha ndó íchí nuú quixi xitoho í,
ta cuná ndó in íchí ndacú nu mé á ña ná ndihvi a ínima ndo”, cáchí
tuhun Ndióxi.

⁴Ta jáhma nasandixi Juan yóho nasacuu a ña naçavaha na xihín íji
camello ta nasandico in níi jáhndá tóco da. Ta naxixi da tica xihín ñuñu
yucú. ⁵Ta naqueta ñayivi ndúu ñuu Jerusalén xihín na ndúu estado Judea
xihín na ndúu ñundáhyi yati yuta Jordán cán nasaa na nu Juan taa johu na
nu cahan da. ⁶Ta tá nanahma na cuachi na nu Ndióxi já najácandúta Juan
na ini yuta Jordán.

⁷Joo tá naxini Juan ña janda johu xínu coo cuahá na fariseo xihín na
saduceo nu dá ña ná jácandúta da na já naçasáhá xójo ndivaha ini da ta já
naçachi da já xihín ná:

—Mé ndó cúú ndó tátuhun coo jáchí cúú ndó na quini. Cáhán ndo ña a
jándoho ga Ndióxi ini ndó sahá cuachi ndó tá ná candúta ndo vatí cája tá
cája ndó cuachi. ⁸Xíní ñúhú caja ndó ña vaha já ná cuni ñayivi ña mé a
ndaá táhyí najándicoo ndó ña núu nasacaja ndó jihna. ⁹Ta a cáhán ndo ña
jácaacu Ndióxi ndohó sahá ña cúú ndó na naquixi chichi Abraham. Jáchí
coo saha toho ña jan nu Ndióxi tá co jándacoo ndó cuachi ndó. Jáchí mé a
ndaá ná cahan i xihín ndó ña janda yuu ndúu nu ñúhu jan cuu caja Ndióxi
ña ná nduu a ñayivi quixi chichi Abraham. ¹⁰Mé ndó cúú ndó tátuhun in
yító, dó sa natiin na hacha cuahan na cahnda na. Ta tóco ndihi yító, dó co
sahan cuihi vaha nuu, tahnda do ta quee dó nu ñúhu cayi do. Quiahva já
caja ri Ndióxi xihín ndó tá co cuni ndó ndicó coo ini ndó nu mé á. ¹¹Mé a
ndaá cája ndúta i ndóhó xihín ticuií ta xihín ña yóho náha ña nandicó coo
ini ndó nu Ndióxi. Joo vaxi inga da ta da cán cúú da jándicutú ínima ndo
xihín ínima yii Ndióxi ta ña cán cacuu a tátuhun ñúhu cayi. Ta da cán ín
cuaha chága ndée dá a juú ga yehe. Ta chí coo sahá i ndica xítí i nu dá ña
ndaxí i correa ndusa da. ¹²Mé da vaxi cán caxi da ñayivi vaha tañu ñayivi
quini. Cúú á tátuhun in dataa tá jáxixi da trigo xihín pala já ná quee xehe á
já cacu vaha da ña. Ta xehe naçana cán cuhun a cayi a xihín ñúhu ita ña a
ndáhva toho —cáchí Juan xihín na cán.

Tá naçandúta Jesús

(Mr. 1:9-11; Lc. 3:21-22)

¹³Naquee Jesús chí estado Galilea cuahan yuta Jordán nu ndácaan Juan
jácandúta dá ñayivi ña ná jácandúta da mé á. ¹⁴Joo nu cuítí coo naxeen
toho Juan jácandúta dá Jesús. Ña cán quea naçachi da já xihín Jesús:

—Yóhó cúú dá ndítahan jácandúta yehe. Ta cáa johó vasún yóho ña ná jácandúta i yohó —ñacachi Juan cán xihín Jesús.

¹⁵Já nanducú nehe Jesús tūhun nū dá já ñacachi a já xihín dá:

—Candehé. Quiahva já ndítahan coo ña yóho viti jáchi ndítahan nū yō jaxinu coo i tóco ndihi ña ndaa ña nasacu ini Ndióxi coo —ñacachi a.

Xihín ña yóho ñacandúsa Juan ta chí najácandúta dá Jesús. ¹⁶Ta tá nandihí ñacandúta Jesús já naqueta ini ticuú cán. Anda já nanuna indivi ta naxini Jesús nanuu ínima yíi Ndióxi jatá ta nasacaa tá quiahva cáa in ndijata. ¹⁷Tá nandihí já naxini johó a cáhan in a indivi ta já cáchí a cán já:

—Yóhó cúún jahyi maní i ta cájii ndivaha ini i xuhun —ñacachi a.

Xíto ndojó tiñáhá sacuahā Jesús

(Mr. 1:12-13; Lc. 4:1-13)

4 Tánandihí já ndáca ínima yíi Ndióxi Jesús cuahan chí yucú íchí nuú co ndúu ñayivi já ná coto ndojó tiñáhá sacuahā mé á.

²Ta cán nasahiin a tixi ivi jícó quívi. Nuú ta ndiví coo naxixi a ta tá nandihí já naxinu joco nū á. ³Já ñacayati tiñáhá sacuahā nuú Jesús ña coto ndojó ñahá rí já ñacachi rí já xihín á:

—Tá ta jivi ndusa jahyi Ndióxi cúún cahnda chuun ña ná nduu yuu yóho pan —ñacachi rí cán xihín Jesús.

⁴Anda já ñacachi Jesús já xihín rí:

—Já cáchí tūhun Ndióxi: “A juú pan cuití cuxu ñayivi já catacu na, vaha. Xíní ñúhú ri a caja na ña sáhdá tūhun Ndióxi nū ná já quea cuu catacu na nū Ndióxi” —ñacachi Jesús xihín rí.

⁵Tá nandihí já ndáca tiñáhá sacuahā cán Jesús cuahan xihín rí ñuu Jerusalén, ña yíi cán ta já najándaa rí a nū jícó jini veñuhu cáhnu ndácaan cán. ⁶Ta já ñacachi rí já xihín á:

—Tá ta jivi ndusa jahyi Ndióxi cúún jácana mún chí ninu jáchi já cáchí tūhun Ndióxi:

Cahnda Ndióxi chuun nū táto mé á ña ná candaa na yohó.

Ta ndinehe ndáha na yohó,

já quea ná a ndícuehe sahun tá ná cachihin sahun xihín yuu, já

cáchí tūhun Ndióxi —ñacachi rí xihín Jesús.

⁷Ta já nanducú nehe Jesús tūhun nū rí já ñacachi a já xihín rí:

—Cáchí tucu tūhun Ndióxi já: “A cóto ndojó tohún Ndióxi, xitohún” —ñacachi Jesús xihín rí.

⁸Ta tá nandihí já ndáca tucu tiñáhá sacuahā cán Jesús nasahan xihín rí in jini yucu jícó ndivaha. Ta já nanaha rí ndaja táhan ñuu ndúu ñuyívi nū á ta najánaha rí tóco ndihi ña náhnu ndúu cán nū á. ⁹Ta já ñacachi tucu rí já xihín Jesús:

—Tóco ndihi ña yóho quiahva i nuun tá ná caxítún nuú i caja cáhnún yehe —nacachi rí quini cán xihín Jesús.

¹⁰Anda já nacachi Jesús já xihín rí:

—Satanás, cuáhán caxoo jáchi já cáchí tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuun” —nacachi Jesús xihín rí cán.

¹¹Tá nandihí já nacaxoo tiñáhá sacuahá cán cuahan ri. Ta já naxinu java táto Ndióxi chindeé na Jesús.

Tá nacasáhá cáxi tuhun Jesús tuhun Ndióxi nuú na estado Galilea

(Mr. 1:14-15; Lc. 4:14-15)

¹²Tá nanehé Jesús tuhun ña nachicaan na Juan, da jácandúta ñayivi vecaa já naquee a cán cuahan chí estado Galilea. ¹³Joo cóo nacandoo a ñuu Nazaret chí naquee a cuahan coo a chí ñuu Capernaum ña ndácaan yuhú tañuhú, dó ndácaan ñundáhyi cuéntá na naquixi chichi Zabulón xihín na naquixi chichi Neftalí. ¹⁴Tóco ndihi ña yóho nayaha ña ná xinu cóo nuú tuhun nacahyí profeta Isaías sanahá tá nacahyí da já:

¹⁵Ñayivi ndúu ñundáhyi Zabulón xihín na ndúu ñundáhyi Neftalí,
ña ñúhu inga xoo yuta Jordán yati yuhú tañuhú,
ta jári na ndúu Galilea, mé estado nu ndúu ñayivi, na co cúu chichi Israel,

¹⁶mé na cán nasanduu na nuú naá ndivaha ta viti naxini na in ñaha yehe ndivaha.

Jándiyehé á nu ná ña ná a quíví na,
joo catacu na anda ama cáa quíví nu íin Ndióxi, nacahyí Isaías sanahá.

¹⁷Ta chí mé tiempo já nacasáhá Jesús cáhan ndojó a nuú ñayivi ta já cáchí a já xihín ná:

—Xíní ñúhú jándacoo ndó cuachi cája ndó ta ndicó cóo ini ndó nu Ndióxi jáchi sa nacayati quíví cacomí a cuéntá sahá ñayivi —nacachi Jesús.

Tá cána Jesús comí da tává tiyacá ña ná caca tuun da xihín á

(Mr. 1:16-20; Lc. 5:1-11)

¹⁸Tá xíca Jesús cuahan yuhú tañuhú Galilea, nandinehé a ivi taa, da cúu ñani. In da naní Simón ta cáhan na Pedro xihín dá. Ta da inga cán naní da Andrés. Ndíví da yóho cúu dá da tává tiyacá ta ñúhu na jácana na ñunu ná ini tañuhú cán. ¹⁹Já nacachi a já xihín ndíví da:

—Naha quíi ndó candico ndó yehe caca tuun ndó xihín i. Táva ndó tiyacá viti joo caja i ña ná cuu tavá ndo ñayivi tañu cuachi —cáchí a.

²⁰Ta chí ivi laá najándacoo da ñunu da ta nandico da Jesús.

²¹Ta nani xica Jesús cuahan chága chí nuu já naxini a inga ivi tucu taa, da cúu ñani. In da naní Jacobo ta inga da naní Juan, da cúu jahyi Zebedeo. Ta ndívi mé da yóho ñúhu da ini barco da xihin tátá da ndája vaha da ñunu dá. Ta nacana Jesús ndívi da yóho. ²²Ta chí ivi laá najándacoo da barco da xihin tátá da ta nacasáhá xica tuun da xihín Jesús.

Jánaḥa Jesús nuú cuahá ndivaha ñayivi

(Lc. 6:17-19)

²³Níí cúu estado Galilea naxica nuu Jesús cáhan tuhun vaha nuú ñayivi ini veñuhu in in ñuu cán. Cáxi tuhun a nu ná ña sa nandindaa quívi cacomí Ndióxi cuéntá sahá ñayivi ñuyívi. Ta nandaja vaha Jesús na quíhvi tá nuú cuehe ndóho na. ²⁴Ta níí cúu ñundáhyi cuéntá Siria nandicuita nuu tuhun sahá ña cája Jesús. Sahá ña cán quea néhe na na quíhvi, na ndóho tá nuú cuehe vaxi na nu á ña ná ndaja vaha mé á na ta néhe na na ñúhu ínima quini ini xinu na nu á ta ndijáa na xíhi yíhi xihín na quíhvi saha néhe na vaxi na nuú Jesús. Ta nandaja vaha mé á na.

²⁵Ta cuahá ndivaha ñayivi ndíco na Jesús. Cúu ná na naquixi estado Galilea xihín na ndúu uxu ñuu cuéntá Decápolis xihín na ñuu Jerusalén xihín na estado Judea xihín na naquixi ñundáhyi chí xoo oriente nu ndácaan yuta Jordán cán.

Tá cáhan ndojó Jesús jini yucu

(Lc. 6:20-23)

5 Tánaxini Jesús ña ndíco cuahá ndivaha ñayivi mé á já nandaa jini yucu ta já nasacoo a cán. Ta nacayati na xica tuun xihin á nu á. ²Ta já nacasáhá jánaḥa nu tóco ndihi na ndúu cán já nacachi a já xihin ná:

³—Tahví nacuu ñayivi tá ndícuni na xíní ñúhú na ña chindeé Ndióxi na jáchi na cán cúu na cacomí Ndióxi cuéntá saha.

⁴Tahví nacuu na ndúu cuéha jáchi na cán cúu na quiahva Ndióxi tuhun ndée ini.

⁵Tahví nacuu na co ndíñehe jícó mé jáchi na cán cúu na ñehe táhvi ndiquehe na ña nasahan Ndióxi tuhun a quiahva nu ná.

⁶Tahví nacuu na xica ini caja ña cúní Ndióxi. Na cán cúu na caja Ndióxi ña ná xinu nuú ña cúu ini na.

⁷Tahví nacuu na cándáhví ini sahá ñayivi jáchi na cán cacuu na cándáhví ri ini Ndióxi saha.

⁸Tahví nacuu na co ndácaan quini ínima jáchi na cán cúu na cuni Ndióxi.

⁹Tahví nacuu na ndíhi ini ña ná coo vaha na xihín ñayivi jáchi na cán cúu na cáchí Ndióxi cúu ná jahyi mé á.

10'Tahví nacuu na ndóho ini sahá ña cája na ña sáhndá Ndióxi nu ná caja na jáchi na cán cúu na cacomí Ndióxi cuéntá saha.

11'Tahví nacuu ndó tá cána há ñayivi xihin ndó ta cája xíxi na xihin ndó sahá ña cándeé ini ndó yehe. Ta tahví nacuu ndó tá jácojo na cuachi jíquí jata ndó sahá ña cándeé ini ndó yehe.

12'Xíní ñúhú cajii ndivaha ini ndó ta coo vaha ini ndó jáchi ndiquehe ndó in ña vaha ndivaha caja Ndióxi indiví. Xíní ñúhú ndicuhun ini ndó ña quiahva já nacaja xíxi na xihin na profeta, na nasanduu sanahá.

Cúu yó tátuhun ñúhu jándiyehe nuú ñayivi ñuyíví

(Mr. 9:50; Lc. 14:34-35)

13'Mé ndó cúu ndó tátuhun ñii yívi na. Sa xíní ndó ña cája ñii ña ná ndihaji ñaha xíxi ndó. Ta quiahva já cája ndó xihin ñayivi ñuyíví. Joo tá ná ndihi ña ohva ñii cán a cúu ga ndicó coo a cahohva tucu a sahá ña cán queá jandá cuíta va íchi cuani nihni ñayivi ña jáchi coó chuun toho a.

14'Jári mé ndó cúu ndó tátuhun ñúhu jándiyehe nuú ñayivi ndúu ñuyíví. Ta mé ñúhu cán cúu á tátuhun in ñuu cánúu jata in yucú jícó ta a cúu toho ndácaan jehé a. 15'Jáchi co chíñúhu ná in lámpara ta tá nu ndíhí já chíjehé na ña tixi in sato. Ña cája na xihin á queá chínúu jícó na ña já ná jándiyehe a nu tóco ndihi na ndúu vehe. 16'Quiahva já xíní ñúhú ndihi ini ndó caja vaha ndó ña ná cacuu ndó tátuhun in ñúhu cáyi nuú ñayivi. Jáchi tá ná cuni na ña vaha cája ndó já queá cuu caja cáhnu na Ndióxi, tátá yo, ña íin indiví.

Jána ha Jesús saha ley Moisés

17'A juú cahán ndó ña naquixi i ñuyíví yóho ña cacu xóo i ña nasahnda ley Moisés xihin ña najána ha na profeta, vaha. Co váxi toho i cacu xóo i ña. Vaxi i nu ndó jáxi nu coo i tóco ndihi ña cáchí mé ley já ná ñaha i nu ndó ndía cúu ndusa ña. 18'Mé a ndaa ná cahan i xihin ndó ña a ndíhi saha mé ley nani íin indiví xihin ñuyíví yóho. Ni in túhún toho tuhun, a ndíhi saha janda quiahva ná yaha tóco ndihi ña ndítahan yaha. 19'Sahá ña cán queá ndá na co cúni caja ña sáhndá ley Moisés vatí cúu á ña loho ndivaha ta ni co cúni na jána ha na ñayivi ña ná caja na ña cáchí a já queá cacuu na in na coó cuaha saha tañu na cacomí Ndióxi cuéntá saha. Joo na cája ña cáchí mé ley ta jána ha na ñayivi ña ná caja na ña, mé na cán cacuu na na cáhnu ndivaha tañu na cacomí Ndióxi cuéntá saha. 20'Mé a ndaa ná cahan i xihin ndó ña tá ná caja cuití va ndó tá quiahva cája na jána ha ley Moisés xihin na fariseo já queá a cuú ndihvi ndó nuú cacomí Ndióxi cuéntá sahá ñayivi.

Jánaḥa Jesús ña cō ndítahan cojo ini ñayivi

(Lc. 12:57-59)

21'Mé ndó sa xini ndo ña nacachi Moisés xihin tásáhnú jícó ndo sanahá tá nacachi da já: "A cáhní ndó ndii jáchi ndá na ná cahní ndii tandaa quivi caja vií jutixia saha ná." 22Joo yehe cáchí i xihin ndó viti ña ndá na ná caja cuehe xihín ñani táhan na tandaa quivi caja vií jutixia saha ná. Ta jári na cánaḥá xihín ñani táhan na, á cáchí na cúu ná ñayivi tachi já vaxi quivi tá candichi na nu juéxe cáhnú ta cuu cūhun na indayá saḥá.

23'Sahá ña cán queá tá ta ñéhe ndó in ñaha cuahan ndó joco ndó nu náa Ndióxi ta nani cuahan ndo cán ndicūhun ini ndó ña ín in ñani táhan ndó ta cō cúní táhan vaha na xihin ndo 24já queá mé jan yati nu náa ndítahan jándacoo too ndó ña ñéhe ndó joco ndó jan. Ta ndítahan quee ndó cūhun ndó ndique táhan mání ndó xihín ñani táhan ndó cán. Ta tá ná ndihi já cuu ndicó cōo tucu ndó nu náa Ndióxi joco ndó ña najándacoo ndó jan.

25'Tá sácú in na saḥa ndó cūhun ndó vecaa ta cúní na candaca na ndohó cūhun ndó nu juéxe, xini ñúhú nducú ndó ndá quiahva ndique táhan mání ndó xihin ná nani núná nu ndó caja ndó ña. Já queá ná a ndiquiahva na cán ndohó ndáḥa juéxe jáchi cuu ndiquiahva juéxe cán ndohó ndáḥa na policia ta chicaan na ndohó vecaa. 26Mé a ndaa cáchí i xihin ndó ña cañuhu ndó cán janda quiahva ná chahvi ndó tóco ndihi jiuhún yicá ndo.

Jánaḥa Jesús saḥa cuachi cája in dataa tá cúní da coo da xihín in ná cō cúu ñájíhí da

27'Mé ndó sa xini ndó ña nasahnda ley Moisés chuun sanahá ta já nacachi a já: "Coto a cóo ndó xihin ñájíhí á yí ñani táhan ndó." 28Joo yehe cáchí i xihin ndó viti ña ndá da sándeḥé in ñáñáḥa ta cáhvi núu ini da xihin ña já queá cómí tá cómí da cuachi nu Ndióxi jáchi cúu á tátuhun sa ín da xihin ña.

29'Ña cán queá cáchí i xihin ndó ña tá nduchú núu cuáha ndó queá jándacava ndohó nuú cuachi, tavá ndó ña jácana xicá ndó ña ná cūhun a jáchi vaha chága ña ná ndihi saḥa in nduchú núu ndó a juú ga ña ná cūhun in ní yiquí cuñu ndó ini indayá. 30Ta tá ndahá cuáha ndó queá caja ña ná ndacava ndó nuú cuachi, chitūhun ndó ña ta jácana xicá ndó ña ná cūhun a jáchi vaha chága ná ndihi saḥa ndáḥa ndo a juú ga ña ná cūhun ní yiquí cuñu ndó ini indayá.

Jánaḥa Jesús ña cō ndítahan nuú dataa jándacoo da ñájíhí da

(Mt. 19:9; Mr. 10:11-12; Lc. 16:18)

31'Ta mé ndó sa xini ndó ña nasahnda ley Moisés chuun sanahá já cáchí a já: "Ndá da cúní jándacoo ñájíhí da ndítahan cavaha da in tutu quiahva

da nu ña ta sa iin vaha va cuu jándacoo da ña.” ³²Joo yehe cáchí i xihín ndó viti ña ni in túhún toho ta co ndítahan jándacoo da ñájíhí da. Jáchí ndá da jándacoo ñájíhí da cája da ña ná caja ña cuachi tá ná tandaha tucu ñá. Jári da tandaha xihín ña cómí ri da cuachi nu Ndióxi. Joo tá ná candaa ini da ña iin ñájíhí da xihín inga dataa já quéa cuu ndusa jándacoo da ña.

Jánaḥa Jesús ña ndítahan caja na tá sáhan na tūhun na nuú ñayivi

³³Mé ndó sa xíní ndó ña nasahnda ley Moisés chuun sanahá já cáchí a já: “Xíní ñúhú jáxinu coo ndó tóco ndihi ña nasahan ndó tūhun ndó caja ndó tá tává ndó quiví Ndióxi.” ³⁴Joo yehe cáchí i xihín ndó viti ña ná quiahva ndó tūhun ndó nuú ñayivi joo a tává ndó quiví ni in ñaha. A tává ndó quiví indiví jáchí indiví cúu nu iin coo Ndióxi. ³⁵Ta ni a tává ndó quiví ñundáhyi jáchí ñundáhyi cúu nu sání mé á ta ni a tává ndó quiví ñuu Jerusalén jáchí cúu á ñuu naçaxi Ndióxi, mé á cúu á rey cáhnu ndivaha. ³⁶Ta ni a tává ndó quiví yiquí jíní ndó tá sáhan ndó tūhun ndó nuú ñayivi jáchí co ndéé ndó ndaja yaa ndó á ndaja tūún ndó ni in túhún ijí jíní ndó. ³⁷Tá sáhan ndó tūhun ndó nuú ñayivi xíní ñúhú cachi ndó: “Ajan, caja i ña.” Á tá coó xíní ñúhú cachi ndó: “Uhun, a cuú caja i ña.” Jáchí tá cachi ndó inga tūhun já caja ndó ña cúní ña quini.

Jánaḥa Jesús ña ndítahan caja cáhnu iní saḥa táhan ñayivi

(Lc. 6:29-30)

³⁸Mé ndó sa xíní ndó ña nasahnda ley Moisés chuun sanahá já cáchí a já: “Tá quiahva cája ñayivi xūhun quiahva já caja ri yóhó va xihín ná. Ta tá ná caní in da nduchú núún já quéa ndítahan caní mún nduchú núú da. Tá ná tává da nuhún já ndítahan nuun tává ri yóhó va nuhú da”, cáchí ley Moisés. ³⁹Joo yehe cáchí i xihín ndó viti: A cája ihvi ndó xihín ñayivi, na cája núu xihín ndó. Ta ndá na ná caní in xoo sajóho ndó, cata ñee ndó inga xoo sajóho ndó nu ná ña ná caní na a. ⁴⁰Ta tá cúní in na candaca na ndohó cuhun ndó nu juéxe sahá ña cúní na candaa na cotó ndó já quéa quiahva ndó ña nu ná ta janda cotó ndéé ndó quiahva ndó nu ná. ⁴¹Ta tá vaxi in soldado nu ndó ta tá cahnda da chuun ña ná cojo ndó ñaha da in kilometro, xíní ñúhú cojo ndó ña anda ivi kilometro cuhun ndó. ⁴²Ta ndá na ná caca in ñaha nu ndó quiahva ndó ña nu ná. Ta ndá na xíca too ñaha nu ndó, quiahva too ndó ña nu ná.

Xíní ñúhú quihvi iní na co cúní mí

(Lc. 6:27-28, 32-36)

⁴³Mé ndó sa xíní ndó ña nasahnda ley Moisés chuun sanahá já cáchí a já: “Quihvi ini ndó na xíní táhan vaha xihín ndó ta candají ndó na co cúní

táhan xihín ndó”, cáchí ley Moisés. ⁴⁴Joo yehe cáchí i xihín ndó viti: Ndítahan quihvi ini ndó na co cúní táhan xihín ndó. Ta cahán vaha ndó xihín na cánahá xihín ndó. Ta caja vaha ndó xihín na cándají ndohó. Ta caca tahví ndó nu Ndióxi sahá na cája xíxi xihín ndó. ⁴⁵Jáchí xihín ña yóho náha ña cúú ndó jahyi Ndióxi, tátá yo, mé á íin indiví. Ta mé á cája ña ná cana candii jatá ñayivi quini xihín jatá ñayivi vaha. Ta mé á jácuun javi jatá ñayivi ndaa xihín jatá na co cája vaha. ⁴⁶A cáhán ndó ña caja Ndióxi cuahá ñamaní xihín ndó tá quihvi ini cuití ndó na quihvi ini ndóhó va jáchí janda ñayivi quini, na játaca jiuhún cuéntá impuesto cája na já. ⁴⁷Ta a cáhán ndó ña nacaja ndó cuahá ña vaha tá ná cahán Ndióxi cuití ndó xihín ñani táhan ndó jáchí janda ñayivi co xíní Ndióxi cája na já. ⁴⁸Xíní ñúhú caja ndaa ndó xihín tóco ndihi ñayivi tá quiahva cája ndaa Ndióxi, tátá yo, mé a íin indiví —nacachi Jesús.

Jánaḥa Jesús ña ndítahan chindeé yo na ndahví

6 Jánacachi tucu Jesús já:
—A ndúcú ndó caja vaha ndó nuú ñayivi sahá ña ná cuni táhyí na ña cája ndó já candoo vaha ndó nu ná. Jáchí tá ná caja ndó já coó toho ñaha ñehé táhvi ndó nu Ndióxi, tátá ndó íin indiví. ²Sahá ña cán queá tá chindeé ndó ñayivi, na ndímaní ñaha nuu, a caca nuu ndó cahán lándá ndó ña nuú ñayivi tá quiahva cája na co cúú ná tá quiahva ndáa na. Jáchí na cán sáhan na ñaha nuú na ndahví ini veñuhu xihín nu táca ñayivi íchí já ná cuu cuni táhyí tóco ndihi ñayivi ña vaha cája na. Jáchí na cán cúní na ña ná caja cáhnu ñayivi na. Mé a ndaa cáchí i xihín ndó ña sa yahvi na cúú mé ña cája cáhnu ñayivi na. ³Ña ndítahan caja ndó tá chindeé ndó na ndímaní ñaha nuu queá caja ndó ña ná a cándaa ini ni in ñayivi ña cája ndó ⁴ta xíní ñúhú caja jehé ndó ña. Ta Ndióxi, tátá ndó sándehe a ña vaha cája ndó xihín ñayivi ta mé á queá chahvi a sahá ña cája ndó jan.

Jánaḥa Jesús ñayivi ndaja caca tahví na nu Ndióxi

(Lc. 11:2-4)

⁵Tá xíca tahví ndó nu Ndióxi a cája ndó tá quiahva cája na co cúú ná tá quiahva ndáa na jáchí cátóo na candita na veñuhu xihín cáyé ña caca tahví na nu Ndióxi ña ná cuni táhyí ñayivi na. Mé a ndaa ná cahán i xihín ndó sa yahvi na cúú mé ña xíní ñayivi na. ⁶Joo ndóhó, tá xíca tahví ndó nu Ndióxi, tátá ndó íin indiví ndítahan quihvi ndó ini vehe ndó ta chicaji tuun ndó yehé a ta jan cuu caca tahví jehé ndó nu Ndióxi. Jáchí jan íin Ndióxi, tátá ndó xihín ndó taa johó a nu cahán ndó ta caja mé á ñamaní xihín ndó.

⁷Ta tá xíca tahví ndó nu Ndióxi, a cahán tucu tucu ndó mé tuhun ña coó saha jáchí ñayivi, na co xíní Ndióxi cán cája na já. Ta cáhán na táa johó

Ndióxi na sahá ña cuaha cáhan na joo a juú ña ndaa. ⁸Joo a cája ndó tá quiahva cája na cán jáchi Ndióxi, tátá ndo sa xini va mé á ndá quea xini ñuhú ndo janda tá cámani caca ndó ña nu á. ⁹Ña yóho quea ndítahan cachi ndó tá xica tahví ndó nu Ndióxi:

Tátá Ndióxi, ña íin indiví,
cáhnú ná cacuu quivi ndó.

¹⁰Ná tandaa quíi quivi cacomí ndó cuéntá sahá nde.

Ta ná coo tá íin cúní mé ndó coo ñuyíví yóho tá quiahva íin indiví cája ndó.

¹¹Quiahva ndó nuú nde ña ndímaní nuú nde cuxu nde in in quivi.

¹²Caja cáhnú ini ndó sahá cuachi nde tá quiahva cája cáhnú ini mé nde sahá ña núu cája ñayivi xihín nde.

¹³Ta a quiahva ndó ñamani ña ná coto ndojó tiñáhá sacuaaha ndehe já ná a cája nde cuachi nu ndó.

Jáchi cómí ndó cuéntá saha tóco ndihi ñayivi,
ta cúu cája ndó tóco ndihi ñaha,
ta cáhnú cúu mé ndó anda ama cáa quivi.

Já ná coo, quiahva já cachi ndó tá xica tahví ndó nu Ndióxi.

¹⁴Jáchi tá cája cáhnú ini ndó sahá ña núu cája inga na xihín ndo já quea caja cáhnú ri ini Ndióxi, tátá ndo, mé a íin indiví sahá ndo. ¹⁵Ta tá co cúní ndo caja cáhnú ini ndó sahá ña núu nacaja inga na xihín ndó já quea a cája cáhnú ini Ndióxi sahá cuachi cája ndó.

Jánaḡa Jesús ndaja ndítahan caja na tá cajuhun na

¹⁶Tá cajuhun ndó a cája ndó tá quiahva cája na co cúu ná tá quiahva ndaa na. Na cán cúní na ña ná cuni táhyí tóco ndihi ñayivi ña xijuhun na sahá ña cán quea cája cuaha nuu na já ná ndiñehe jícó ñahá na. Mé a ndaa cáchí i xihín ndo ña sa yahvi na cúu ña xini ñayivi na. ¹⁷Joo ndóhó, tá ná cajuhun ndó ndítahan cuchú nuú ndo ta ndaja vií ndó mé ndó. ¹⁸Já quea ná a cúní ñayivi ña xijuhun ndó ta in túhún Ndióxi, tátá ndo, mé a íin tuun xihín ndó cándaḡ ini ña mé a ndaa xijuhun ndó ta mé á quea chahvi a sahá ña cája ndó jan.

Indiví cúu nu ndítahan ndaja tútú ñayivi ña vaha

(Lc. 12:33-34)

¹⁹A ndúcú ndó játaca cuahá ndivaha ndó ña cuíca canduu nu ndo ñuyíví yóho jáchi yóho cúu nu quíhvi tiquijí ñaha ndó jándihi rí sahá ta já tíví ndihi ñaha ndó. Ta jári cuu quíhvi taa cuíhná caja cuíhná da ña.

²⁰Vaha chága ná játaca ndó ña vaha indiví jáchi cán coo quíhvi toho tiquijí jándihi rí sahá ñaha ndó. Ta mé cán ni in ñaha co tíví ta ni taa

cuihná a cúu ndihvi caja cuihná. ²¹Jáchí nuú nandaja tútú ndo ña ndáyahvi nu ndó, cán coo ri ínima ndo.

Nduchú núú yó cúú á tátuhun lámpara ña jándiyehé nu xíca í

(Lc. 11:34-36)

²²Nduchú núú yó cúú á tátuhun in lámpara jándiyehé nu yó já xíní yó nu xíca í. Ta tá tívi vaha nduchú núú yó já cuu candehé vaha í nu xíca í. ²³Joo tá co tívi nduchú núú yó já queá xíca yó nu naá ndivaha. Ta tá cáhan yó ña cúú yó na xíca nu yéhe ndivaha ta cáa ví yó cája í cuachi já queá cúú yó tátuhun na xíca nu naá ndivaha.

In ñaha cúú Ndióxi ta inga ñaha cúú jiuhún

(Lc. 16:13)

²⁴Ni in túhún ñayivi a cúu caja chúun nuú ivi xitoho na jáchí candají na in xitoho na ta inga xitoho na quihvi ini chága na. Á tá coó ta caja ndívi vaha na chuun nuú in xitoho na ta inga na cán a cája chúun vaha na nuu. Ta quiahva já íin ri xihin ndóhó va jáchí a cuú caja cáhnu ndó Ndióxi tá chínúu ndó ínima ndó jatá jiuhún ndo.

Ndaá Ndióxi na cúú cuéntá mé á

(Lc. 12:22-31)

²⁵Candehé ndo ña cáhan i xihin ndó yóho: A ndícani ini ndó sahá ña cuxu ndó ta ni sahá ña coho ndó ña catacu ndó in in quivi. Ta ni a ndícani ini ndó sahá jáhma candixi ndó. Jáchí tá tácu ndo, ña jan cúú ña cáhnu chága a juú ga ña cuxu ndó. Ta íin chága saha yiquí cunu ndó a juú ga jáhma ndíxi ndó jan. ²⁶Candehé ndó laa ndáchí nu táchí jan: rí jan ni co xútu rí ta ni a vája sáhan rí jáquee rí ta ni co yáca rí nu táán vaha rí nuni rí. Ta Ndióxi, tátá ndo, mé a íin indiví sáhan ña xíxi rí jan nu rí. Á co xíní ndó ña íin chága saha mé ndó a juú ga laa cán. Sahá ña cán queá quiahva mé á ña xíní ñúhú ndó catacu ndó. ²⁷Ta coó saha toho ña ndícani nahá ini ndó jáchí a cuú ndaja jícó ndó mé ndó java metro chága saha ña ndicani ini ndó.

²⁸Ta ni co ndítahan ndicani ini ndó saha jáhma candixi ndó. Candehé ndo ndá quiahva ndató sáhnu itá yucu. Mé ita jan ni co cája chúun a ta ni co cávaha jáhma á. ²⁹Joo mé a ndaa ná cáhan i xihin ndo ña núchí chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahin cuahá ñaha cuicá. ³⁰Candehé ndó ndaja ndaa vaha Ndióxi yucu ita vatí íin too a viti ta itaan cáyi a jándihi sahá. Ndaja ga ví caja Ndióxi xihin ndóhó ña quiahva mé á tóco ndihi ña xíní ñúhú ndó catacu ndó. Joo mé ndó co cándúsa ndó ña candaa mé á ndohó. ³¹Ña cán

quea a ndícani ini ndó saha ndá ña cuxu ndó á sahá ña coho ndó á sahá ña candixi ndó. ³²Jáchí nā cō xíní íchí cuéntá Ndióxi, nā cán cúú nā ndícani cuahá ini saha tóco ndihi ña yóho. Joo cúú ndó cuéntá Ndióxi, tátá ndo ín indiví ta xíní vaha mé á ña ndímaní nū ndó catacu ndó. ³³Joo ndítahan nū ndó ndiquiahva ndó mé ndó ndáha Ndióxi ña ná cacomí mé á cuéntá saha ndó ta já quiahva mé á ña ndímaní nū ndo catacu ndó. ³⁴A ndícani ini ndó sahá ña quixi nū ndó inga quiví itaan jáchí Ndióxi cuití va xíní a ndía vaxi nū ndó quiví itaan ta coó sahá ndícani ini ndó sahá ña ndoho ndó itaan.

Cō ndítahan candehe ndaa yó ñayivi

(Lc. 6:37-38, 41-42)

7 ¹A candehe ndaa ndó ñayivi já ná a candehe ndaa Ndióxi ndohó. ²Jáchí tá quiahva cája ndó xihín inga ñayivi quiahva já caja ri Ndióxi xihín ndohó va. Sahá ña cán quea tá quiahva sándehe ndaa ndó ñayivi quiahva já caja ri Ndióxi xihín mé ndó. ³Jáchí ndá cuéntá quea sándehe ndó ña núu cája ñani táhan ndó ta cō sándehe ndo ndá quiahva náhnu chága ña núu cája mé ndó. Cúú á tátuhun ndácaan in xehe loho nduchú núú ñani táhan ndó nani ndácaan in yító ndúhu cáhnu ini nduchú núú ndo. ⁴Ta tá a cuú cuni ndó yító cáhnu ndácaan ini nduchú núú mé ndó ndaja caja ndó cachi ndó xihín ñani táhan ndó: “Ñani i, ná tavá loho i xehe ndácaan nduchú núún jan.” ⁵Jándahvi ndó mé ndó xihín ña cája ndó. Xíní ñúhú tavá ndó yító cáhnu ndácaan nduchú núú mé ndó jan já ná nuna nū ndó cuni vaha ndó já ná cuu tavá ndó xehe loho ndácaan nduchú núú ñani táhan ndó.

⁶A quiahva ndó ña yíi cuéntá Ndióxi nuú ñayivi quini. Jáchí tá cája ndó já cúú á tátuhun tá ná quiahva ndó ñaha yíi nuú tina ta tiahva náá ndicó coo rí tiin rí ndohó. Ta jári cúú á tátuhun tá ná quiahva ndó ñaha yahvi ndivaha tátuhun perla nū cóchí jáchí cuu cuani nihni rí ña.

Ndaja caja í caca í ñamaní nū Ndióxi

(Lc. 11:9-13; 6:31)

⁷Ndá ñaha ndímaní nū ndó xíní ñúhú caca ndó ña nū Ndióxi ta já quiahva mé á ña nū ndo. Ndinducú ndó ña cúni ndo ta ñehe ndó ña caja Ndióxi. Cúú á tátuhun catí ndáha ndo yéhe ta já nuna yéhe nū ndo. ⁸Jáchí nā xíca in ñaha, nā cán cúú nā ñehe va. Ta nā ndúcú ñaha, nā cán cúú nā ndínehe ña. Ta nā catí ndáha yéhe, nā cán cúú nā ndínuna yéhe nū.

⁹Ta ndá ndó, nā ndúu jahyi ta tá xíca jahyi ndó pan cuxu a nū ndo, ama cuéhe ri ndó quiahva ndó yuu nū á ña ná caxí a. ¹⁰Ta ama ná quiahva ri ndó in coo nū á caxi tá xíca tiyacá nū ndó cuxu a. Cō cája ndó já.

¹¹Candehe ndó. Vatí mé ndó cúú ndó ñayivi cája cuachi joo xíní vaha ndó

quiahva ndó ña vaha nuú jahyi ndó. Ndaja ga ví cája Ndióxi, tátá ndó, mé a íin indiví xihín ndó. Quiahva mé á ña vaha nu ndó tá ná caca ndó ña nu mé á.

¹²Candehé ndó. Tá quiahva cúni ndó caja ñayivi xihín ndó quiahva já ndítahan caja ri ndóhó va xihín ná jáchi ña yóho quéa sáhndá ley Moisés xihín ña nacahyí na profeta caja ndó.

Yéhé táhán cúu nuú quihvi na cuhun indiví

(Lc. 13:24)

¹³Cúu á tátuhun íin ivi yéhé. In yéhé cúu á ña táhán ndivaha ta xíní ñúhú ndinducú ndó ndihvi ndó cán. Jáchi inga yéhé cúu á ña ndíca ndivaha nuú ndihvi na cuhun indayá. Ta cuahá ndivaha ñayivi cúu na xíca íchi ndíca cuahan na indayá nuú ndihi saha ná. ¹⁴Joo ña cúu íchi ña ndáca ñayivi yéhé táhán nu ndihvi na indiví cúu á ichí táhán ndivaha ta yáncá ndivaha caca nuu í nu á. Ta chá ndivaha cúu na ndihvi cán.

Xihín cuihi cúun nuú in yító cuu ndicuní ndá yító cúu dó

(Lc. 6:43-44)

¹⁵Cuéntá coo ndó xihín na tuhún, na cáchi cáhan na cuéntá Ndióxi jan. Jáchi uun ndivaha cásaa na nu ndó. Joo cúu ná tátuhun ndivahyí quini ndivaha vatí náha na tátuhun ndicachi loho. ¹⁶Cúu ndicuni ndó na xihín ña cája na. Jáchi ñayivi quini co cája vaha toho na. Cúu á tátuhun tá a cuú cuun uva nuú tohínú ta ni a cuú jáquee ndó titó ñúhú nuú tohínú. ¹⁷Ña cán quéa tóco ndihi yító vaha ndinuhu cuihi vaha cuití cúun nu do. Joo yító quini ndinuhu cuihi quini cuití cúun nu do. ¹⁸Dó cúu yító vaha cán a cúu toho cana cuihi quini nu do ta ni yító quini cán a cúu cuun cuihi vaha nu do. ¹⁹Ta tóco ndihi yító, dó co cána cuihi vaha nuu, tahnda do ta quee dó nu cándaha núhu ña cayi do. ²⁰Sahá ña cán quéa xihín ña cája ñayivi já cuu ndicuni ndó á cúu ná ñayivi vaha á cúu ná na quini.

A juú ndihi toho ñayivi ndihvi na nuú cacomí Ndióxi cuéntá saha ná

(Lc. 13:25-27)

²¹A juú ndihi toho na cáchi cúu yehe xitoho na cuhun na nuú cacomí Ndióxi cuéntá saha ná. Na cája ña sáhndá Ndióxi, tátá i, mé a íin indiví na cán cuití cúu na cacomí mé á cuéntá saha. ²²Jáchi tá ná xinu coo quivi caja víi Ndióxi sahá ñayivi já quéa casahá cahan cuahá ndivaha ñayivi xihín i ta já cachi na já: “Jesús, mé ndó cúu xitoho nde ta xihín quivi mé ndó naxica nuu nde cáhan nde tuhun Ndióxi xihín ñayivi ta xihín quivi mé ndó natavá nde rí quini nasañuhu ínima ñayivi ta xihín quivi mé ndó nacaja cuahá ndivaha nde ña xitúhún”, cachi na xihín i. ²³Ta anda já

nducú ñehe e tũhun nu ná já cachi i já xihĩn ná: “Cọ xini toho i yo cúu ndóhó. Caxoo ndó nuú i jáchi ndinuhu ña quini cája ndó”, cachi i xihĩn ná.

Sácú Jesús quiahva sahá ivi da nacavaha vehe

(Mr. 1:22; Lc. 6:47-49)

24Ndá na xini johó ña cáhan i ta cája na ña, na cán cúu ná tátũhun in dataa, da iin xini túni ta nacavaha da vehe da jata in tóto. 25Ta tá naxinu javi já nasahnu yuta ta naxinu tachi quini jata vehe cán joo cóo nandicava vehe da jáchi tóyí cándichi vehe da jata tóto cán. 26Joo na xini johó nu cáhan i ta có cája na ña, na cán cúu ná tátũhun in dataa, da có xini túni ta nacavaha da vehe da nuú ñutí. 27Tá nandihi já naxinu javi já nasahnu yuta ta naxinu tachi quini jata vehe cán. Anda já nandicava vehe da ta chí nandihi sahá chí uun —nacachi Jesús jánaha ñayivi.

28Ta tá nandihi nacahan Jesús ña yóho já tóco ndihi ñayivi nacatontó na xini johó na ndá quiahva jánaha mé á 29jáchi tá jánaha mé á nu ná cáhan tá quiahva cáhan in da iin sahá cahnda chuun ta có cáhan toho a tá quiahva cája na jánaha ley Moisés.

Tá nandaja vaha Jesús in da ndóho cuehe táhyi

(Mr. 1:40-45; Lc. 5:12-16)

8 Tánanuu Jesús jata yucu nuú nasanúu a cán já ndíco cuahá ndivaha ñayivi jata cuahan. 2Ta ndaja coo já nacayati in dataa, da ndóho cuehe táhyi nu á. Ta já nacaxítí da nu á já nacachi da já xihĩn á:

—Cuu ndaja vaha ndó yehe, xitoho i tá cúni ndó —nacachi da xihín Jesús.

3Tá nandihi já nacani ndaa ndáha Jesús da já nacachi a já xihĩn dá:

—Cúni ña ná ndivahún ña cán quea nandivahún viti —cáchi a xihĩn dá.

Tá nacachi Jesús já chí ivi laá nandindaa cuehe táhyi nandoho da cán.

4Anda já nacachi Jesús já xihĩn dá:

—Candehé. A cáxi tũhun tohún ña yóho xihín ni in túhún ñayivi.

Cuáhán ndacún nahun mún nuú jutú. Ta ndítahan jocún ñaha nu Ndióxi tátũhun sáhdá ley Moisés sanahá caja na sa nandivaha. Já ná candaa ini tóco ndihi ñayivi ña sa nandindaa va cuehe nasandohún —nacachi Jesús xihín da cán.

Tá nandaja vaha Jesús in da cája chúun nuú in jefe soldado

(Lc. 7:1-10)

5Tá nandihvi Jesús ñuu Capernaum já nacayati in da sáhdá chuun nuú soldado naquixi ñuu Roma nu Jesús jáchi cúni da caca da in ñamaní nu á.

6Já nacachi da já xihĩn á:

—Á cō cūni ndó caja ndó ñamaní ndaja vaha ndó mozo i, datacú jáchi cándúhu da vehe quíhvi da naxihí tuchu yiquí cuñu da ta a juú quiahva cáhivhi yiquí cuñu da —ñacachi da cán xihín Jesús.

⁷Já ñacachi Jesús já xihín dá:

—Vaha va, cūhun i ndaja vaha i da —ñacachi Jesús.

⁸Anda já ñacachi tucu da sáhná chuun nuú soldado cán já xihín Jesús:

—Candehé ndó. Coó saha toho yehe ña ná ndihvi ndó vehe e. Joo cahnda cuití ndó chuun janda nu íin ndó yóho ta já ndivaha va mozo i.

⁹Jáchi ndúu java na náhnu chága sáhná chuun nuú i. Ta ndúu ri soldado sáhná ri yehe va chuun nuu. Ta tá chindahá i in da ña ná cūhun da nu cūni mí i cūhun da ta cuahan da. Ta tá sáhná i chuun nuú inga da ña ná quixi da nuú i ta vaxi da nuú i. Ta tá sáhná i chuun nu mozo i ña ná caja da ña sáhná i ta cája da ña —ñacachi da cán.

¹⁰Tá naxini johó Jesús ña yóho já ñacatontó a já ñacachi a já xihín na ndíco cuahan cán:

—Mé a ndaa ná cahan i xihín ndo ña a ñáha cuni i tañu na Israel in da cándeé cáhnu nahá ini Ndióxi tá quiahva cándeé cáhnu ini da yóho Ndióxi.

¹¹Candehé ndo ná cahan i xihín ndo ña quixi ñayivi ndijáá ní cúu saha ñuyiví ta cacoo na cuxu na xihín Abraham ta xihín Isaac ta xihín Jacob indiví nu íin Ndióxi cómi a cuénta sahá ñayivi. ¹²Joo cuahá na Israel, na nanditahan nuu coo cán a cóo toho na cán. Ña caja Ndióxi xihín na cán quea cuita na jata véhe cūhun na nuú naá ndivaha. Ta cán cuacu ndivaha na janda quiahva chicáhñá mé nuhu ná —cáchi Jesús.

¹³Tá nandihi já ñacahan tucu Jesús xihín da sáhná chuun nuú soldado cán já ñacachi a já xihín dá:

—Cuanúhu vehún. Nandivaha mosún tá quiahva cūnun jáchi ñacandúsún yehe —ñacachi Jesús xihín dá.

Chí mé hora já nandivaha mozo da cán.

Tá ñandaja vaha Jesús ña cúu xojo Pedro

(Mr. 1:29-31; Lc. 4:38-39)

¹⁴Ñasahan Jesús vehe Pedro ta tá naxinu a cán cándúhu ña cúu xojo Pedro quíhvi ña jáchi chícaan cáhni ndeé ña. ¹⁵Anda já natiin Jesús ndáha ña quíhvi cán ta chí nandindaa cáhni ña. Ta já ñandacoo ña cán cája ndíví ña nu ná.

Tá ñandaja vaha Jesús cuahá ndivaha na quíhvi

(Mr. 1:32-34; Lc. 4:40-41)

¹⁶Ta tá ñacuaá já ñéhe cuahá ndivaha na na quíhvi xihín na ñúhu ínima quini ini nuú Jesús. Ta xihín in túhún tūhun ñacahan mé á ñatavá ínima

quini ñúhu ínima ñayivi ta jári nandaja vaha mé á tóco ndihi na quíhvi.
 17Ta tóco ndihi ña yóho nayaha já ná xinu coo nuú tuhun ña nacahyí
 profeta Isaías tá nacachi da já: “Mé á nandiquehe ndihi a ña cávitá iní ta
 naxojo ndihi a cuehe yo”, cáchí tuhun Ndióxi.

Ná cúni candico Jesús

(Lc. 9:57-62)

18Tá naxini Jesús ña a juú quiahva cándíhi táhan ñayivi ndúu na xihín á
 já nasahnda chuun ña ná cojo cava na inga xoo tañuhú cán. 19Joo nacayati
 in da jánahá ley Moisés nu á já nacachi da já xihín á:

—Maestro, cúni candico i ndohó ndá nacuu nuú cuhun ndo —nacachi da xihín á.

20Já nanducú ñehe Jesús tuhun nu dá já nacachi a já xihín dá:

—Ndicuii cúu rí ta vatí íin cáva ñúhu rí. Ta laa cúu rí ta vatí íin táca
 ñúhu rí. Joo yehe, da nachindahá Ndióxi nduu ñayivi, chí ni nuú cuju mí i
 coó va —nacachi Jesús xihín dá.

21Ta inga da sa xíca xihín á nacachi da já xihín á:

—Maestro, quiahva jihna ndó ñamaní nuú i ña ná cuhun i jánduxu tátá i
 já quixi i candico i ndohó —nacachi da xihín á.

22Já nacachi Jesús já xihín dá:

—Xíní ñúhú candicún yehe viti jáchí ná cuhun mé ñayivi, na a ñáha
 cacu ndaa ínima jánduxu na ndií jan —nacachi Jesús xihín dá.

Tá najacatáji Jesús tachi xihín tañuhú tá ndícojo do

(Mr. 4:35-41; Lc. 8:22-25)

23Ta ndaja coo naquihvi Jesús ini in barco ta cátahan na xíca tuun xihín
 á cán cuahan na. 24Ta nani xíca na nuú tañuhú cán cuahan na ta in náá
 cuití naxinu in tachi quíni ndivaha nuú tañuhú cán. Ta a juú quiahva ndeé
 nacasáhá ndícojo ticuíf cán janda quiahva nandichutú ticuíf ini barco cán.
 Joo cándúhu Jesús ini barco quíji va. 25Anda já ndáva na xíca tuun xihín á
 cán nasahan na ndínehe na ña. Já nacayuhú na já cáchí na xihín á:

—Chindeé ndó ndehe, xitoho nde. Jáchí cácoo barco cahá tañuhú
 cuahan do —nacachi na xihín á.

26Anda já nanducú ñehe Jesús tuhun nu ná já nacachi a já xihín ná:

—Ndá cuéntá quéa yíhvi nahá ndo. Ndá cuéntá quéa co cándeé ini ndó
 yehe —nacachi a.

Já nandacoo a ta jánani a tachi quíni cán xihín tañuhú cán ta já nacatáji
 uun tóco ndihi a cán. 27Tá naxini na xíca tuun xihín á cán ña yóho já
 nacatóntó na ta nacasáhá ndáca tuhún táhan na já cáchí xihín táhan na já:

—Ta ndá da cúu dataa yóho ña janda tachi xihín tañuhú cándúsa nu
 cáhan da —cáchí xihín táhan na cán.

Tá naqueta ivi da ñúhu ínima quini ini nuú Jesús

(Mr. 5:1-20; Lc. 8:26-39)

²⁸Tá naxinu coo Jesús inga xoo tañuhú cán nu íin ñundáhyi cuénta Gadara já naqueta ivi da ñúhu ínima quini ini tañu nu ndúxu ndii. Ta nacayati da nuú Jesús. Ndívi mé da ñúhu ínima quini ini yóho cúu dá tátuhun quítí, rí cuehe ndivaha. Sahá ña cán quea ni in túhún ñayivi a cuú yaha chí íchi cán. ²⁹Tá naxini da Jesús já nacasáhá da cáyuhú da nu á já cáchí da já xihín á:

—Ndá cuénta quea vasún quihvi nuún xihín nde, Jesús, da cúu in túhún jini já jahyi Ndióxi. Á vasún jándoho yachún ini nde tá cámaní yii ndindaa tiempo ndoho ini nde —nacachi rí quini cán xihín Jesús.

³⁰Ta ndaja coo yati cán nasanduu cuahá ndivaha cóchí xixáhan rí. ³¹Ta mé rí quini ñúhu ini ndívi dataa cán naxica tahví rí nu Jesús já cáchí rí já xihín á:

—Tá ta ná tavún ndehe ini da yóho, quiahva ñamani nuú nde ña ná cuhún nde ndihvi nde ini cóchí ndúu cáa —nacachi rí xihín Jesús.

³²Anda já nacachi Jesús já xihín rí:

—Cuáhán ndó, dá já.

Chí naqueta rí quini cán ini ndívi dataa cán já nasahan rí nandihvi rí ini cóchí cán. Ta chí ivi laá xínu tóco ndihi cóchí cán cuahan rí núu rí nu ndáyí yuhú tañuhú cán. Ta najáqueta nuu rí mé rí ini tañuhú chí nacandaa rí ticuií já naxihí rí.

³³Ta chí a juú quiahva nayihví da ndáa cóchí chí naxinu ndivaha da cuahan da. Ta tá naxinu da ñuu já nacasáhá da ndícani da ndaja cáa ña nayaha xihín ndívi da nasañuhu ínima quini ini cán. ³⁴Anda já naqueta tóco ndihi ñayivi ñuu cán cuahan na candehé na Jesús. Ta tá naxini na mé á já naxica tahví na nu á ña ná quee a cuhún a.

Tá nandaja vaha Jesús in da naxihí tuchu saha

(Mr. 2:1-12; Lc. 5:17-26)

9 Tása nayaha tóco ndihi ña yóho já nandaa Jesús jatá in barco ta já naxojo cava inga xoo tañuhú cán janda quiahva naxinu coo a ñuu mé á. ²Ta cán ñehe na in da quihvi, da naxihí tuchu saha ta cándúhu da nu yívi loho ñehe na nacasaá na nu á. Ta tá naxini Jesús ndá quiahva cándeé ini da cán mé á já nacachi a já xihín da quihvi cán:

—Candehé, jahyi a. A ndícani toho inún jáchi cája cáhnu ini i saha cuachún viti —nacachi Jesús xihín dá.

³Java táhan da jánahá ley Moisés nacasáhá da cáhán da já: “Mé da yóho ndája núu da Ndióxi xihín tuhun cáhan da jáchi ni in túhún toho ñayivi a

cuú caja cáhnu ini sahá cuachi.” ⁴Joo sa nacandaa ini Jesús ña cáhvi ini da cán sahá ña cán quée nandaca tuhún a da já nacachi a já xihín dá:

—Ndá cuéntá quée cáhvi núu ini ndó sahá yehe. ⁵Á cáhán ndo ña ihvi chága cachi i xihín da yóho: “Nacaja cáhnu ini i sahá cuachún viti.” Á tá coó ta cachi i xihín dá: “Cuándacoo ta cuáhán.” ⁶Candehé vaha ndo ná naha i nu ndo ña íin sahá i, da nachindahá Ndióxi nduu ñayivi caja cáhnu ini i sahá cuachi cája ñayivi ñuyívi yóho —nacachi Jesús xihín dá.

Tá nandihi já nandicahan tucu a xihín da naxihi tuchu saha cán:

—Ta viti cáhan i xuhun cuándacoo ndiquehe xito lohún ta cuanúhu vehún —nacachi Jesús xihín dá.

⁷Chí ivi laá nandacoo da quíhvi cán ta já naquee da cuanúhu dá. ⁸Tá naxini ñayivi ndúu cán ña nacaja Jesús yóho já nayihví na ta nacasáhá cája cáhnu na Ndióxi sahá ña nasahan ndée mé á nuú ñayivi ña ná cuu caja na ña xitúhún.

Tá nacana Jesús Mateo ña caca tuun da xihín á

(Mr. 2:13-17; Lc. 5:27-32)

⁹Tá nandihi já naquee Jesús cuahan ta nani xíca cuahan já naxini a in dataa naní Mateo, da íin coo nu sácoo da játaca jiuhún cuéntá impuesto. Ta nacana Jesús da já nacachi a já xihín dá:

—Naha quíi candicún yehe.

Anda já nandaca ndichi Mateo ta nacasáhá ndíco da Jesús.

¹⁰Tá nandihi já íin coo Jesús xíxi a vehe da cán ta cán naxinu coo cuahá táhan na játaca jiuhún cuéntá impuesto xihín java ga ñayivi cája cuachi. Nasacoo na xíxi na xihín Jesús ta cán ndúu coo ri na xíca tuun xihín a cán.

¹¹Ta tá naxini na fariseo ña ndúu na cán xíxi na xihín Jesús já nacasáhá na ndaca tuhún na na xíca tuun xihín Jesús cán já:

—Ndá cuéntá quée xíxi xitoho ndó xihín na játaca jiuhún cuéntá impuesto ta xihín java ga na cája cuachi —nacachi na fariseo cán.

¹²Joo tá naxini johó Jesús ña yóho já nacachi a já xihín na fariseo cán:

—Ñayivi íin vaha co xíní ñúhú toho na da cája tátá ñahá joo na quíhvi, na cán cúu na xíní ñúhú da cája tátá ñahá. ¹³Ta yehe coó vaxi toho i cana i na sa íin vaha. Vaxi i cana i ñayivi, na cája cuachi ña ná jándacoo na cuachi cája na. Xíní ñúhú cuhun ndo jácuaha vaha ndó ña cúní cachi tuhun Ndióxi tá cáchí a já: “Ña cúní quée ná candáhví ini ndó ñayivi jáchí vaha chága ña yóho a juú ga ña ná joco ndó quítí nuú i”, cáchí tuhun Ndióxi —cáchí Jesús xihín ná.

Cáhan Jesús ndá sahá quéa cajuhun na

(Mr. 2:18-22; Lc. 5:33-39)

¹⁴Tá nandihí na xíca xihín Juan, da jácandúta ñayivi cán naxinu coo na nu Jesús. Já nacasáhá ndáca tuhún na mé á já nacachi na já xihín á:

—Ndávaha co xíjuhun toho na xíca xihín yóhó nani cuahá ndivaha xíjuhun mé nde xihín na fariseo —nacachi na cán xihín Jesús.

¹⁵Anda já nanducú ñehe Jesús tuhún nu ná já nacachi a já xihín ná:

—Á cáhán ndo canduu cuéha na ndúu in vicó tándaha nani íin mé da tándaha cán xihín ná. Uhun. Jáchi cájii ini na. Joo xinu coo quiví candaa na da tándaha cán anda jáví casáhá cajuhun na. Ta cáchí i xihín ndo ña vaxi quiví candaa na yehe nuú na yóho ta anda jáví casáhá na xíca tuun xihín i cajuhun na —nacachi Jesús.

¹⁶Ta nasacu Jesús inga quiahva nu ná já cáchí a já:

—Ama ná jándaha ñayivi jahmá yatá xihín in tuhún jáhma saá jáchi tá nandihí ndíndí a, sáhdá chága ví a jahmá yatá cán ta jándacáhu chága ví a yávi ña nandicahmá na cán. ¹⁷Ta ni co táan na vino saá ini vóso ní yatá jáchi jácáhdí mé vino cán ní ta cuíta mé vino cán ta tíví vóso ní cája dó. Sahá ña cán quéa ndítahan taán yo vino saá ini vóso ní saá ná a ndíhi sahá vino xihín vóso —cáchí Jesús.

Tá nandaja vaha Jesús jahyi jíhí Jairo xihín in ñá nacani ndaa ndáha jáhma á

(Mr. 5:21-43; Lc. 8:40-56)

¹⁸Ta nani cáhan Jesús cándichi a naxinu coo in da sáhdá chuun nuú na Israel. Já nacaxítí da nu á ta já nacachi da já xihín á:

—Jacá naxihí uun ña loho cúu jahyi jíhí i joo tá ná caja ndó ñamaní quixi ndó vehe e ta chinúu ndó ndáha ndó jata ña já nditacu tucu ña —nacachi da cán xihín Jesús.

¹⁹Anda já naquee Jesús cuahan xihín da cán ta ndáca na xíca tuun xihín á cán cuahan na. ²⁰Ta ndaja coo cán íin in ñáñáha, ña ndítahví ní ña tíxi uxu ivi cuia. Ta nacayati ña chí jata Jesús já nacani ndaa ndáha ña yuhú jáhma á. ²¹Jáchi nacahán ña: “Tá ná caní ndaa cuití ndáha í jáhma Jesús já ndivaha í”, nacahán ña. ²²Joo nandicoto nihni jata Jesús nu ña ta tá naxini a ña já nacachi a já xihín ña:

—A cáyihví tohún, jahyi a. Nandivahún jáchi nacandúsún yehe —nacachi Jesús xihín ña.

Ta chí mé hora já nandivaha ña.

²³Ta tá naxinu coo Jesús vehe da sáhdá chuun nuú na Israel cán já naxini a ña sa ndúu música cán ña ná cuhun na jánduxu na jahyi da cán.

Ta naxini a jandá johó sácu cóhó ñayivi ndúu na. ²⁴Ta chí já nācachi a já xihín tóco ndihi nā cán:

—Cuáhán queta ndó jata véhe. Jáchí coó naxihí toho ñá loho yóho.

Quíji cuití va ñá —nācachi Jesús xihín ñayivi ndúu cán.

Joo nācasáhá nā cán sácu ndaa ñahá nā. ²⁵Ta chí nātavá Jesús nā jata véhe. Ta tá nācayati a nū ñá cán já nātiin a ndáha ñá chí ivi laá nādacoo ñá. ²⁶Ta níí cúú ñundáhyi cán nādicuīta nuu tūhun sahá ñā nācāja Jesús cán.

Tá nāndaja vāha Jesús ivi dā cuaá

²⁷Tá nāquee Jesús cuāhan já ndíco ivi dā cuaá jatā cuāhan dā já nācasáhá cáyuhú cóhó dā já cáchí dā já xihín á:

—Jesús, dā nāquixi chīchi David cāja ndó ñāmanī candáhvī loho ini ndó ndehe —cáchí dā cáyuhú dā jatā Jesús.

²⁸Ta ndaja coo nāquihvi Jesús ini in vehe ta já nācayati ndíví dā cuaá cán nū á. Já nācasáhá ndāca tūhún a dā cán já nācachi a já xihín dá:

—Á cáchán ndo ñā cuu cāja i jāndiyehē nūu ndo —nācachi Jesús xihín dā cán.

—Ajan, xitoho nde. Cándúsa nde ñā cuu cāja ndó ñā —nācachi ndíví dā cuaá cán xihín Jesús.

²⁹Tá nāndihi já nācani ndaa ndáha Jesús nduchú núú dā cán ta já nācachi a já xihín ndíví dā cán:

—Ná coo tá quiahva cūnī ndo jáchí cāndeé ini ndó yehē —cáchí a.

³⁰Tá nāndihi já nācasáhá sāndehé ndíví dā cuaá cán. Ta nāsahnda Jesús chuun nū dá ñā ná a cáxi tūhun da nuú ñayivi sahá ñā nācāja mé á xihín dá.

³¹Joo tá jacá nāqueta uun dā cán já nācasáhá dā ndícani da nuú ndijáá ñayivi ndúu ñundáhyi cán sahá ñā nācāja Jesús xihín dá.

Tá nāndaja vāha Jesús in dā níhi

³²Nani nāquee dā cuaá cán cuāhan dā já nāsaa java ñayivi nū Jesús ñéhe na in dā níhi, dā ndācaan ínima quini ini. ³³Ta tá nātavá Jesús ínima quini ini dā cán chí ivi laá nācasáhá cáhan dā. Ta a juú quiahva nācatóntó ñayivi ta já cáchí nā já:

—Ni in tūhún tañu coó naxini nde in ñaha tátūhun ñā yóho ñundáhyi Israel —nācachi nā cán.

³⁴Joo nā fariseo cán nācasáhá cáchí nā já:

—Rí cúú tiñáhá sacuahā nū rí quini sáhan rí ndée rí nuú Jesús yóho ñā ná tavá a ínima quini ini ñayivi —nācachi nā fariseo cán.

Táhn̄da ini Jesús sahá ñayivi

³⁵Ndijáá ñuu náhnu xihín ñuu válí naxica nuu Jesús jánaha tuhun Ndióxi ini veñuhu na cán. Ta nacaxi tuhun a tuhun vaha xihín ñayivi ña sa nacayati quiví cacomí Ndióxi cuéntá sahá ná. Ta nandaja vaha mé á tá nuú cuehe ndóho ñayivi. ³⁶Ta tá naxini Jesús ñayivi cuaha cán já natahvi ini a sahá ná jáchi ndóho ini na ta cávitá ini na tátuhun ndicachi, rí coó da candaa ñahá. ³⁷Anda já nacachi Jesús já xihín na xica tuun xihín a cán:

—Mé á ndaa ndúu cuahá ndivaha ñayivi, na cuni cuni johu tuhun Ndióxi joo chá cuití na cuni cuhun na cahan na ña xihín ñayivi. Cúú á tátuhun iin cuahá ndivaha ní ña xíní ñúhú jáquee joo ndímaní ñayivi jáquee na ña. ³⁸Sahá ña cán quea xíní ñúhú caca tahví ndó nu Ndióxi ña ná chindahá mé á chága na cája chúun cuéntá mé á —cáchi Jesús xihín ná.

**Chíndahá Jesús na xica tuun xihín á ña ná cuhun na cahan na tuhun
Ndióxi xihín ñayivi**

(Mr. 3:13-19; Lc. 6:12-16)

10 Tánandihi já nacana Jesús ndíhuxu ivi na xica tuun xihín á cán. Ta já nasahan ndée nu ná ña ná cuu tavá na ínima quini ini ñayivi. Ta nasahan ndée nu ná ña ná ndaja vaha na tá nuú cuehe ndóho ñayivi. ²Ña yóho cúú quiví ndíhuxu ivi na cúú apóstol xica tuun xihín á cán: Da nu cuítí cán naní da Simón ta cahan ri na Pedro xihín dá. Ta inga da cán cúú Andrés ñani da. Ta inga da cúú Jacobo xihín ñani da, Juan. Ndíví da yóho cúú dá jahyi Zebedeo. ³Ta ñu na cán ndácaan ri Felipe xihín Bartolomé xihín Tomás xihín Mateo, da najátaca jiuhún cuéntá impuesto. Ta cán ndácaan ri Jacobo, da cúú jahyi Alfeo xihín Lebeo, da cahan ri na Tadeo xihín. ⁴Ta cán ndácaan ri Simón, da naxica cuéntá na cananista xihín Judas Iscariote, mé da najicó túhún Jesús tá nu ndíhí cán.

⁵Tá nachindahá Jesús ndíhuxu ivi na cán já nacachi a já xihín ná:

—Coto a cuhun ndó chí ñuu ñayivi tóho, na co cúú na Israel. Ta ni a quíhvi ndó ñuu ñúhu chí estado Samaria. ⁶Vaha chága ná cuhun ndó cahan ndó tuhun Ndióxi xihín na Israel jáchi cúú ná tátuhun ndicachi, rí nandiñúhú. ⁷Cuáhán ndó caxi tuhun ndó xihín ná ña sa nacayati quiví cacomí Ndióxi cuéntá sahá ñayivi. ⁸Ta ndaja vaha ndó na quíhvi ta jánditacu ndó ndíi ta ndaja vaha ndó na ndóho cuehe táhyi. Ta tavá ndó rí quini ñúhu ínima ñayivi. Ta a quéhe ndó yahvi sahá ña cája ndó jáchi coó naxeen ndó ndée ñéhe ndó jan. ⁹A cáñehe toho ndó ni jiuhun cuáán ni jiuhun cúxú ni jiuhún caa cuahá caca nuu ndó. ¹⁰Ta ni a cáñehe ndó yátí cuhun ndó íchi. Ta ni a cáñehe ndó inga naha jáhma ndó cuhun xihín ndo.

Ta ni a cáñehe ndó inga ndusa ndó cūhun ndo. Ta ni garróte a cáñehe ndó cūhun ndo. Jáchí nditahan nuú ñayivi quiahva na ña nu ndo.

11'Tá ná xinu coo ndó in ñuu cáhnu á ñuu loho, xini ñúhú ndinducú ndó in ñayivi, na cuu candeé ini ndó ta vehe na jan canduu ndó janda quiahva ná xinu quiví quee ndó cūhun ndo. 12Ta tá ná xinu coo ndó vehe jan cahan Ndióxi ndó xihin ná. 13Ta tá ná ndiquehe vaha ñayivi vehe jan ndohó já quea cachi ndó xihin ná ña ná coo vaha ini na. Joo tá co cūni na ndiquehe vaha na ndohó já quea a cahan ndo xihin ná ña ná coo vaha ini na. 14Ta tá co cūni na ndiquehe vaha na ndohó ta ni co cūni na cuni johu na nu cahan ndo já quea cuáhán queta ndó vehe jan á ñuu jan ta catí ndó ña yácá saha ndó já ná naha ña cuahan cuachí na cán jata mé va na. 15Jáchí mé a ndaa ná cahan i xihin ndo ña tá ná xinu coo quiví caja víi Ndióxi sahá ñayivi ndúu ñuyiví já quea jándoho chága Ndióxi ini ñayivi ñuu jan a juú ga tá quiahva najándoho a ini na ñuu Sodoma xihín ñuu Gomorra sanahá sahá ña coo ndiquehe na ndohó.

Vaxi quiví caja xíxi ñayivi xihín na xíca cahan tuhun Ndióxi

16'Candehé ndo. Yehe chindahá i ndohó cūhun ndó tañu ñayivi quini. Cúu ndó tátuhun ndicachi válí tañu ndivahyí ña cán quea xíní ñúhú cuénta vaha coo ndó tá quiahva cája coo. Ta xíní ñúhú coo mánsó ndo tá quiahva cája ndijata. 17Cuénta coo ndó jáchi tiin na ndohó ta ndiquiahva na ndohó ndahá na jutixia. Ta cani na ndohó ini veñuhu. 18Ta saha mí i cañehe na ndohó cūhun ndó nuú na cúu gobernador á nuú na cómi cuénta sahá in nación. Ta já ná cuu ndicani ndó sahá i nuú na cán ta xihín nuú na tóho, na co cúu na Israel. 19Joo a ndicani ini ndó saha ndá tuhun cahan ndó tá ná ndiquiahva ñayivi ndohó ndahá na cán. Jáchí tá ná ndindaa hora cahan ndó xihin ná já quea quiahva mé va Ndióxi tuhun nu ndó ña ná cuu cahan ndó sahá i nuú na cán. 20Jáchí a juú jini mé ndó quixi ña cahan ndo. Ínima yíi Ndióxi cacuu ña quiahva tóco ndihi ña cahan ndo.

21'Ta java ta jicó túhún da ñani da ta java da jicó túhún da jahyi da ña ná cahní ñahá na. Ta java na ndicuítā na cani táhan na xihin tátā na ña ná cahní ñahá na. 22Ta ndaja táhan ñayivi ndúu ñuyiví yóho candají na ndohó sahá yehe. Joo ndá na ná candico tuun íchi mí i janda ná xinu quiví quiví na, na cán cacuu na cacu ndaa ínima. 23Tá ná ndicuítā na caja xíxi na xihin ndó in ñuu já cunu ndó cūhun ndó inga ñuu. Jáchí mé a ndaa ná cahan i xihin ndo ña tá sa xinu coo tucu yehe, da nachindahá Ndióxi nduu ñayivi já a ñaha caca nuu ndó ndijáá ñuu ndácaan ñundáhyi Israel.

24'Candehé ndo. Ni in túhún toho da xíca jácuaha tiaha chága da nu mé dá jánaha ñahá cán. Ta ni in túhún mozo co cúu dá da cáhnu chága nuú xitoho da. 25In da jácuaha ndítahan cajii íni da tá sa xíni ndihi da ña

xíní maestro da. Ta da cúú mozo ndítahan cajíi ini da tá ná xínu da cacuu da cáhnu tátuhun xitoho da. Candehé ndo. Tá ná cachi ñayivi xihín da cúú xitoho ndó ña cúú da Beelzebú, rí cúú tiñáhá sacuahá ndaja ga ví cachi na xihín ndóhó.

Yo já ndítahan cayihví yo

(Lc. 12:2-7)

26 Candehé ndo. A cáyihví toho ndó ñayivi jáchi ni in túhún toho ñaha cája ñayivi a cúu coo jehé nahá jáchi vaxi quivi tá ndáca náha nu á. Ta vatí cáhan jehé ñayivi tuhun joo vaxi quivi tá candaa ini ñayivi sahá. 27 Ña cáhan yehe xihín ndó nuú naá xíní ñúhú cáhan ndó ña ndiví táhyí nani yehe candii. Ta ña cáhan jehé e xihín ndo xíní ñúhú ndaa ndó jini véhe cayuhú ndó ña. 28 A cáyihví toho ndó ñayivi, na cuu caja cahní yiquí cuñu ndó jáchi ni in ñaha a cúu caja na xihín ínimá ndo. Ndióxi queá xíní ñúhú cayihví ndo jáchi mé á cuu jándihi a sahá yiquí cuñu ndó ta cuu jácana mé á ínimá ndo ini indayá anda ama cáa quivi.

29 Candehé ndo. Laa válí ndáchí rí nu táchi ta núu ndivaha jícó na rí. Joo ni in rí cán co cúyu nu ñúhu ña quivi rí tá co sáhan Ndióxi, tátá ndó ñamaní. 30 Ta viti caja ndó cuéntá xihín mé ndó. Janda ijí jini ndó jan ndáhvi tá in tá in a nu Ndióxi. 31 Ña cán queá a cáyihví toho ndó jáchi ndíyahvi chága ndo nu Ndióxi a juú ga cuahá ndivaha laa válí.

Tá cáhan cáxi ñayivi ña cúú ná cuéntá Jesús

(Lc. 12:8-9)

32 Ndá na cáxi tuhun nuú ñayivi ña cuahan na cuéntá mí i já queá cachi mí i sahá na nu Ndióxi, tátá i, mé a íin indiví, ña mé a ndaa cúú ndusa na cán cuéntá mí i. 33 Joo ndá na ná cachi xihín ñayivi ña co xíní toho na yehe já queá ni yehe a ndícuni toho i na ña cúú ná cuéntá mí i nu Ndióxi, tátá i, mé a íin indiví.

Cája Jesús ña sáhdá java táhan ñayivi

(Lc. 12:51-53; 14:26-27)

34 A cáhán toho ndó ña naxinu i ñuyiví yóho caja i ña ná coo vaha ini ñayivi. Co cája i já. Jáchi ña vaxi yehe caja i queá ná cahnda java táhan na. 35 Vaxi i jácani táhan i dataa xihín tátá da sahá yehe. Ta vaxi i jácani táhan i in ñáñáha xihín náná ña sahá yehe. Ta vaxi i jácani táhan i ña cúú sanu xihín xojo ña sahá yehe. 36 Ta ndaja vehe mé ñayivi ndicuíta na caní táhan na sahá yehe.

37 Ta ndá na cúni chága tátá na á náná na a juú ga yehe já queá coó sahá toho na cacuu na cuéntá mí i. Ta ndá na quíhvi ini chága jahyi yíi na

á jahyi jíhí na a juú ga yehe já quéa coó saha toho na cacuu na cuéntá mí i. ³⁸Ndá na co cúní ndoho ini sahá ña candico na yehe ta co ín tiahva na quivi na sahá i já quéa coó saha toho na cacuu na cuéntá mí i. ³⁹Jáchí ndá na cátóo coo chága na ñuyíví yóho, na cán cúu na ndihi saha. Joo na sahan ndeé ini quivi sahá i, na cán cúu na ñehe táhvi na catacu na anda ama cáa quivi.

Ña quiahva Ndióxi nuú ñayivi

(Mr. 9:41)

⁴⁰Ndá na ndíquehe vaha ndohó, ndíquehe vaha ri na yehe va. Ta ndá na ndíquehe vaha yehe, ndíquehe vaha ri na Ndióxi, mé a nachindahá yehe vaxi i ñuyíví yóho. ⁴¹Ndá na ndíquehe vaha in profeta vaxi cuéntá Ndióxi já quéa tá quiahva coo yahvi ndiquehe profeta cán quiahva já coo ri yahvi ndiquehe na cán. Ta ndá na ndíquehe in taa vaha sahá ña cúu dá ñayivi vaha já quéa ndiquehe na cán yahvi na tá quiahva cáa yahvi ndiquehe taa vaha cán. ⁴²Ta ndá na ná quiahva ñaha vatí in yáxi ticuí nuú in na cúu jahyi i yóho sahá ña ndico na íchi cuéntá mí i, mé a ndaa ná cahan i xihin ndó ña chahvi Ndióxi sahá ñamaní cája na xihin ná —cáchi Jesús.

Juan, da jácandúta ñayivi nachindahá da java da xica xihin dá nuú Jesús

(Lc. 7:18-35)

11 Tánandihi nanaha Jesús nuú na xica tuun xihin á cán ña ndítahan caja na já naquee a cuahan jánaha nuú ñayivi ta cáxi tuhun a tuhun Ndióxi nuú ñayivi ndúu ñundáhyi cán.

²Mé tiempo já nasandacaan Juan vecaa, mé dá cúu dá da jácandúta ñayivi. Ta cán nañehe dá tuhun sahá ña náhnu cája Jesús. Anda já nachindahá da java na xica xihin dá nu á ³ña ná ndaca tuhún na Jesús á jivi ndusa cúu á Cristo, mé a chindahá Ndióxi cacomí a cuéntá sahá ñayivi, á ndítahan candati na inga ga quixi. ⁴Tá nandihi nandaca tuhún da cán Jesús sahá ña yóho já nacachi Jesús já xihin ná:

—Cuáhán ndó ndicani ndó nu Juan tóco ndihi ña naxini ndó cája i xihin tóco ndihi ña naxini johó ndó cahan i. ⁵Ta ndicani ndó nu dá ña ndínuna nuú na cuaá ta ndícaca na réncó cája i. Ta ndaja vaha i na ndóho cuehe táhyi. Ta jándinuna i johó na johó já ná cuni johó na. Ta jánditacu u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínima ná. ⁶Tahví nacuu na co jándacoo ña cándéé ini na yehe —nacachi Jesús.

⁷Tá naquee na nachindahá Juan cán cuahan na já nacasáhá Jesús cahan xihin ñayivi já cáchi a já xihin ná:

—Ndía nacahan ndo cuni ndó tá naqueta ndó nasahan ndó sándeheé ndo Juan yucú íchí cán. A juú da cán cúu taa láhá já quíji nuu da tátuhun quíji

nuu in tóyoó cája tachi. ⁸Ndía naqueta ndó candehé ndó. A juú da cán cúu taa ndíxi jahmá lándá ndivaha. Sa xíní vaha ndó ña co ndúu toho da ndíxi jahmá lándá yucú íchí. Ndá da ndíxi jahmá lándá cúu da ndúu vehe rey cuití va. ⁹Ndía nasahan ndó candehé ndó cán. Á coó nasahan ndó cuni johó ndó nu cáhan in da cúu profeta nu ndó. Mé a ndaa da cán cúu dá in profeta ta íin chága saha dá a juú ga inga profeta nasanduu sanahá.

¹⁰Jáchí mé Juan cúu dá da cáhan tuhun Ndióxi saha tá cáchí a já:

Chindahá i in da cánúu cūhun nu mún,

já ná caja tiahva da íchí nuú quisún, já nacahyí a sanahá.

¹¹Candehé ndó ná cáhan i xihín ndó. Tañu tóco ndíhi ñayivi coó ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuéntá saha ná, vatí cúu ná na coó saha, na cán cúu na cáhnu chága a juú ga Juan.

¹²Janda quiví naxinu Juan, da jácandúta ñayivi ta janda viti ñúhú ndíhi ndivaha ini ñayivi ndiquiahva na mé ná ndáha Ndióxi. Ta na sáhan tuhun ndeé ini, na cán cúu na ñehe táhvi cacomí Ndióxi cuéntá saha. ¹³Janda tá cámani xinu Juan tóco ndíhi ña nacahyí na profeta xihín ña nacahyí Moisés cáhan ña vaxi quiví cacomí Ndióxi cuéntá sahá ñayivi. ¹⁴Ta tá cúní ndó candúsa ndó ña nacahyí na cán sanahá já cuu candaa ini ndó ña Juan cúu dá da nacahan na cán saha tá nacachi na ña ndítahan quixi tucu profeta Elías ñuyiví yóho. ¹⁵Na íin johó, ná cuni johó na.

¹⁶Ná cáhan i xihín ndó ndaja íin ñayivi ndúu tiempo viti. Cúu ná tátuhun na valí sácoo sájíquí na nuú yahvi ta cáyuhú na nuú java ga na valí ndúu cán ta já cáchí na já: ¹⁷“Nativí nde tótiví nu ndó joo coó naxeen ndó cata sáhá ndó. Ta naxita cuéha ndivaha nde nu ndó ta ni coó nasacu ndó.” ¹⁸Quiahva já íin ñayivi ndúu tiempo viti jáchí tá naquixi Juan, da jácandúta ñayivi ta naxijuhun da ta ni coó naxihi da vino joo nacachi ndó saha dá ña ndácaan ínima quini ini da. ¹⁹Ta tá naxinu yehe, da nachindahá Ndióxi nduu ñayivi ta xíxi i pan ta xíhi i vino já nacasáhá cáchí ndó sahá i ña cúu u in taa ndehé ndivaha ta xíhi ndivaha i. Ta cáchí ndó ña cátóó ndivaha i cacuu amigo na cája cuachi xihín na játaca jiuhún cuéntá impuesto. Joo na cúní cándaa ini ña ndaa, na cán cúu na cándaa ini ña cája Juan ta cája ri yehe ña ndaa —nacachi Jesús xihín ná.

Ñayivi sáa ini co cúní na caja na ña cúní Ndióxi

(Lc. 10:13-15)

²⁰Tá nandíhi já nacasáhá Jesús jánani a ñayivi ndúu ndíjáa ñuu nuú nacaja cuaha chága mé á ña xitúhún. Jáchí vatí nacaja cuaha mé á ña xitúhún nu ná coó nandicó coo ini na nu Ndióxi. Na cán quéa nacachi Jesús já xihín ná:

21—Ndáhví nahá nacuu ndó, na ñuu Corazín. Ta ndáhví nahá nacuu ndó, na ñuu Betsaida. Cuahá ndivaha ña náhnu nacaja i nu ndo joo coo naxeen ndó ndicó coo ini ndó jándacoo ndó cuachi ndó. Sanahá najándihi Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña náhnu nuú na cán tá quiahva nacaja i nu mé ndó, sa najándacoo va na cán cuachi na, nduu. Ta chí ivi laá ndaca ndixi na jahmá ndii ta jácuyu na yaa yiquí jíní na, nduu. Jáchí xihín ña yóho jánaha na ña nandicó coo ini na sahá cuachi na. 22Mé a ndaa ná cahan i xihin ndo tá ná xinu quiví caja vií Ndióxi sahá ñayivi já ndoho chága ini mé ndó, na ñuu jan a juú ga tá quiahva nandoho ini ñayivi nasanduu ñuu Tiro xihín ñuu Sidón sanahá. 23Ta viti cahan i xihin ndó, na ndúu ñuu Capernaum. Janda indiví cúní ndó cūhun ndó joo sahá ña sáa ini ndó cūhun ndó janda indayá, caja Ndióxi. Jáchí tá ná caja i ña xitúhún nuú ñayivi ñuu Sodoma tá quiahva nacaja i nu ndóhó ta ni a ndíhi sahá ñuu cán, nduu. 24Mé a ndaa ná cahan i xihin ndo ña tá ná xinu quiví caja vií Ndióxi sahá ñayivi já ndoho chága ini mé ndó, na ñuu jan a juú ga tá quiahva nandoho ini ñayivi nasanduu ñuu Sodoma sanahá —nacachi Jesús.

Tá nacajii ndivaha ini Jesús

(Lc. 10:21-22)

25Mé tiempo cán nacahan Jesús já nacachi a já:

—Cája cáhnu i ndohó, tátá Ndióxi, ña cúú xitoho tóco ndihi ñaha ndúu indiví xihín ñuyiví. Jáchí najánaha ndó ña ndíchí ndivaha nuú ñayivi, na coo cuahá saha nuú java ga na. Ta nacaja ndó ña ná a cuú candaa ini na ndíchí xihín na tácu ini ñaha mé ndó. 26Já nacaja ndó jáchí já nasacu ini ndó caja ndó —nacachi Jesús.

27Anda já nacachi a já xihín na ndúu cán:

—Nandiquiahva tátá i tóco ndihi ñaha ndahá i ña ná cacomí i cuénta sahá. Ta ni in túhún toho ñayivi co xíní vaha na yehe, da cúú in túhún jíní já jahyi Ndióxi. Mé Ndióxi, tátá i cuití va xíní vaha yehe. Ta ni in túhún toho na co xíní vaha na yo cúú tátá i. In túhún yehe, da cúú jahyi a xíní vaha i yo cúú mé á. Ta yehe cúú da caxi ndá ñayivi jánaha i nuu sahá Ndióxi, tátá i já ná candaa vaha ini na yo cúú mé á. 28Naha ndihi ndó nuú i, na sa nacanaá cája chúun. Taxi ndó ña ndójo ndó jan nuú i ta já yehe caja i ña ná ndiquehe ndée ndo. 29Yehe cúní ña ná ndiquiahva ndó mé ndó ndahá i. Ta ña yóho cúú á tátuhun in yúcu chínúu na sahá jiquí tindiquí. Ta xíní ñúhú catiahva ndó caja ndó tá quiahva cája yehe. Jáchí coo cama jíní i xihín ñayivi ta cúú u taa manso ndivaha. Quiahva já caja ndó já ñehe íní ndo ndiquehe ndée ndo. 30Jáchí yúcu chínúu i jata ndo xihín ñaha jácojo i jata ndo cúú á ña cama ñúhú laá —nacachi Jesús.

Ña nacaja na xica tuun xihín Jesús in quivi ndíquehe ndée ñayivi

(Mr. 2:23-28; Lc. 6:1-5)

12 Ta ndaja coo inquivi ndíquehe ndée ñayivi xica Jesús cuahan tañu nuú naxutu na trigo. Ta sahá ña cuico na xica tuun xihín Jesús sahá ña cán queá nacasáhá na túhún na java yucu jini trigo cán ta tává na trigo sáxí na. ²Tá naxini na fariseo ña yóho já nacasáhá na cáhan cuachí na nuú Jesús. Já cáchí na já:

—Candehé. Na xica tuun xuhun jan cája na chuun ña co ndítahan caja ñayivi quivi ndíquehe ndée yó —nacachi na xihín Jesús.

³Já nanducú ñehe Jesús tuhun nu ná já nacachi a já xihín ná:

—Á a ñáha toho cahvi ndó nuú tuhun Ndióxi nu cáhan sahá ña nacaja David sanahá tá nacuico da xihín na xica xihín dá. ⁴Ña nacaja da queá naquihvi da ini veñuhu Ndióxi ta naxixi da pan ña yii. Ta ni nu mé dá ta ni nuú na xica xihín dá cán co cáni a nuu cuxu na pan cán. In túhún jutú cuití va cáni a nuu cuxu na pan cán. ⁵Ta á a ñáha toho cahvi ndó ña nacyhyí Moisés nu ley tá nacyhyí da ña co cája toho jutú cuachi nu Ndióxi vatí cája chúun da veñuhu quivi ndíquehe ndée ñayivi. ⁶Mé a ndaa ná cahan i xihín ndo ña iin chága sahá i, da cándichi yóho a juú ga sahá veñuhu nu cája cáhnu na Ndióxi jan. ⁷Mé ndó co cándaa toho ini ndó ña cúní cachi tuhun Ndióxi tá cáchí a já: “Yehe cúní ña ná candáhví ini ndó ñayivi jáchí vaha chága ña yóho a juú ga ña ná joco ndó quítí nuú i”, cáchí tuhun Ndióxi. Jáchí tá ná cándaa ini ndó tuhun yóho, nduu ta a chícáan toho ndó cuachi jatá ñayivi, na coó cuachi. ⁸Candehé ndó. Yehe, da nachindahá Ndióxi nduu ñayivi, iin sahá i cahnda i chuun sahá quivi ndíquehe ndée ñayivi —nacachi Jesús.

Tá nandaja vaha Jesús in da nahichi ndáha

(Mr. 3:1-6; Lc. 6:6-11)

⁹Tá nandihi já naquee Jesús cuahan já nandihvi a veñuhu mé ñuu cán. ¹⁰Ta cán nasandacaan in dataa, da nahichi ndáha. Ta sahá ña nducú na fariseo ndúu cán ndá quiahva caja na já ná cuu chícáan na cuachi jatá Jesús sahá ña cán queá nandaca tuhún na mé á já nacachi na já:

—Á sahan Ndióxi ñamaní ndaja vahún na quíhvi quivi ndíquehe ndée yo —nacachi na cán xihín á.

¹¹Anda já nacachi Jesús já xihín ná:

—Candehé ndó. Tá iin in ndicachi loho jana ndo ta tá ná ndicava rí ini in táhvi quivi ndíquehe ndée yo, ama ná a cúhun ndó tavá ndó rí. ¹²Ta ndíyahvi chága ñayivi a juú ga ndicachi. Ña cán queá sahan Ndióxi ñamaní cája í ña vaha quivi ndíquehe ndée yo —nacachi Jesús xihín ná.

¹³Tá nandihí nācachi a já xihín dāta, dā nahichí ndáha cán já:
—Jándacaa ndáhun —nācachi a xihín dá.

Tá najándacaa dā ndáha dá já nandivaha ndáha dá. Ta cáa tá quiahva cáa inga ndáha dā cán. ¹⁴Joo tá naqueta nā fariseo cán já nacasáha nā jándique táhan na tūhun na ña cahní nā Jesús.

Ña cáhan Isaías sahá Jesús

¹⁵Tá ñañehe Jesús tūhun ña ndúcú nā cán cahní ñahá nā já naquee a cuahan va ta cuahá ndivaha ñayivi ndíco jatá cuahan. Ta ndaja táhan na quíhvi nandaja vaha Jesús. ¹⁶Ta nasahnda Jesús chuun nuú nā sa nandivaha cán ña ná a cáxi tūhun nā nuú ñayivi yo cúu mé á. ¹⁷Tóco ndihi ña yóho nayaha já ná xinu coo nuú tūhun nācayí profeta Isaías tá nācayí dā já:

¹⁸Yóho iin dā cája chúun cuéntá mí i, mé dá nācaxi i.

Quíhvi ndivaha ini i dā ta cájii ínii i xihín ña cája da.

Ta jáchutu ndaa i ínima dá xihín ínima yíi mí i,

ñā ná jánahā dā nuú ñayivi ndúu ñuyívi ndá quiahva cája vií i saha ná.

¹⁹Ta ni a cáhan cuachi toho da ta ni a cáyuhú cóhó dā,

já queá a cúni johō ñayivi xíca cállé nū cáhan dā.

²⁰Tá quiahva a jácuachi toho da ndoo, dó sa natahnu,

quiahva já a jácuachi toho da ñayivi, nā cávitá ini.

Ta quiahva já ni a ndáhvā toho da tití ñúhu loho, ña sa cúni ndahva janda quiahva ná quee vaha ña ndaa xihín ña ihvi.

²¹Ta ndaja táhan ñayivi ndúu níi cúu ñuyívi tandaa candeé ini na mé dá, nācayí Isaías sanahá.

Jácojo na cuachi jatá Jesús ña cája chúun a xihín ndée tiñáhá sacuahā

(Mr. 3:20-30; Lc. 11:14-23; 12:10)

²²Java ñayivi ñehe na in dā cuaá ta cúu dá dā níhi jáchi ndácaan rí quini ini da. Ta tá nandaja vaha Jesús dā já nasandehé dā ta nandicahan dā. ²³Tá naxini ñayivi ndúu cán ña yóho já nācatóntó ndivaha na já nacasáha ndáca tūhún táhan na já cáchí nā já:

—Á a juú dā yóho cúu dā naquixi chichi rey David —cáchí xihín táhan na.

²⁴Tá naxini johō nā fariseo ña cáhan ñayivi cán já nacasáha cáchí mé nā fariseo cán já:

—Taa yóho cúu tává dā rí quini ñúhu ini ñayivi jáchi mé Beelzebú, rí cúu tiñáhá sacuahā nū rí quini cán sahan rí ndée rí nū dá cája da ña —nācachi na.

²⁵Ta sa xini va Jesús ña cáhvi ini na cán sahá ña cán quéa nacachi a já xihin ná:

—Tá sáhdá java táhan ñayivi ndúu in nación ta ndúu na cuaha táhdá já cásahá cáni táhan ndaja táhan mé va na já cama chá ndihi sahá nu ndúu na cán. Ta quiahva já yaha ri xihin in nuu á in vehe tá sáhdá java táhan ndaja táhan mé ná já quéa jándihi na saha ná. ²⁶Ta quiahva já yaha xihin Satanás, rí cúu tiñahá sacuaḥa. Ta tá ná tavá rí inga rí quini ini ñayivi á tá ná cani táhan ndaja táhan mé rí já quéa ndihi saha ndée ña cómí ri. ²⁷Mé ndó cáchí ndo ña tává i rí quini ini ñayivi xihin ndée Beelzebú, rí cúu tiñahá sacuaḥa. Joo tá mé a ndaa cúu ndusa ña cáchí ndo sahá i jan, ndáchí quéhe na cúu cuéntá mé ndó jan ndée tavá na rí quini ini ñayivi. Ama ná cachi ndó ña tává ndo rí quini xihin ndée tiñahá sacuaḥa. Na yóho náha ña co cáhvi ndaa ini ndó. ²⁸Candehé ndo. Yehe tává i ínimá quini ini ñayivi xihin ndée ínimá yii Ndióxi. Ta xihin ña yóho náha cáxi a ña sa naxinu coo quivi cacomí Ndióxi cuéntá saha ndó.

²⁹Candehé ndo. Sácú u in quiahva nu ndo. Ni in dataa a cúu ndihvi da caja cuíhná da ñaha vehe in da ndacú joo tá ná cató da da ndacú cán já cuu quehe da ñaha da cán.

³⁰Ndá na coo cuahan xoo i, cúu ná na co cúní yehe. Jáchí ndá na co chindee yehe xihin ña cája i, cúu ná na sájí nuu nuu i.

³¹Ña cán quéa cáchí i xihin ndo ña caja cáhnu ini Ndióxi saha tá nuú cuachi cája ñayivi xihin saha tá nuú tūhun quini cáhan na. Joo tá ná cahan núu na saha ínimá yii Ndióxi já quéa a cája cáhnu toho ini Ndióxi sahá ña nacaja na. ³²Caja cáhnu ini Ndióxi janda saha ndá na ná canahá xihin yehe, da nachindahá Ndióxi nduu ñayivi joo tá ná canahá na xihin ínimá yii Ndióxi já quéa a cája cáhnu toho ini Ndióxi saha ná ni nani tácu na ndúu na ñuyíví yóho ta ni tá cūhun na cavií saha ná nu Ndióxi.

Xihin cuihi cúun nuú in yító cuu ndicuní ndá yító cúu dó

(Lc. 6:43-45)

³³Xini ñúhú jándee ndó yító vaha ña ná cuun cuihi vaha nu do. Jáchí tá ná jándee ndó yító núu já quéa cuihi núu cuun nu do. Jáchí xihin cuihi cúun nuú in yító cuu ndicuní ndá yító cúu dó. ³⁴Mé ndó cúu ndó tátūhun coo jáchí cúu ndó na quini sahá ña cán quéa cáhan ndó tūhun quini ta a cúu cana tūhun vaha yūhu ndo. Jáchí yūhu ñayivi cána tóco ndihi ña nandicutú ñúhu ínimá ná. ³⁵In taa vaha cáhan da ndinuhu ña vaha jáchí ndinuhu ña vaha ñúhu ínimá dá. Ta in taa quini cáhan da ndinuhu ña núu jáchí ña núu quéa ndácaan ínimá dá. ³⁶Mé a ndaa ná cahan i xihin ndo ña tá ná ndindaa quiví caja víi Ndióxi sahá ñayivi ndúu ñuyíví anda jáví ndiquiahva ñayivi cuéntá nu Ndióxi sahá ndaja táhan tūhun núu nacahan

na ñuyíví yóho. ³⁷Jáchí saha mé tuhun nacahan ndó jan caja víí Ndióxi saha ndo. Ta xihín ña jan cachi Ndióxi ña á íin cuachi ndó á coó cuachi ndó —cáchi Jesús.

Xíca ñayivi quini ña ná caja Jesús ña xitúhún nu ná

(Mr. 8:12; Lc. 11:29-32)

³⁸Java na fariseo xihín na jánaha ley Moisés nacahan na xihín Jesús já nacachi na já xihín á:

—Maestro, cúní nde ña ná caja ndó in ñaha xitúhún nuú nde já ná cuni nde —nacachi na xihín Jesús.

³⁹Já nanducú ñehe Jesús tuhun nuú na cán já nacachi a já xihín ná:

—Ñayivi quini, na co cúní cándusa Ndióxi, na yóho cúu na cúní cuni ña xitúhún. Joo a cúní toho na ña. Ña cuni ndusa na quéa ña ndoho i tá quiahva nandoho Jonás, da nasacuu profeta sanahá. ⁴⁰Jáchí tá quiahva nasandacaan Jonás uní quívi xihín uní ñuú tixi tiyacá cáhnu tá nacocó rí da quiahva já ndacaan ri yehe, da nachindahá Ndióxi nduu ñayivi tixi ñundáhyi uní quívi xihín uní ñuú. ⁴¹Ta ñayivi nasanduu Nínive sanahá cán ndacuíta na chicaan na cuachi jata ndó tá ná xinu quívi caja víí Ndióxi sahá cuachi ñayivi ndúu viti. Jáchí mé na nasanduu ñuu Nínive cán najándacoo na cuachi cája na tá nacahan Jonás xihín ná ña nacachi Ndióxi coo. Ta yehe íin chága sahá i a juú ga Jonás joo co cándusa ndó yehe.

⁴²Jári tá ná xinu quívi caja víí Ndióxi sahá cuachi ñayivi ndúu tiempo viti anda já ndacuíta in ña nasacomí cuénta sahá ñayivi ndúu chí xoo sur sanahá ta chicaan ña cuachi jata ñayivi ndúu tiempo viti. Jáchí mé ña cán vatí nasahiin xíca ndivaha ña nu rey Salomón sanahá nasahan ña cuni johó ña tuhun ndíchí cáhan da. Ta yehe íin chága sahá i a juú ga Salomón joo co cándusa ndó yehe.

Jánaha Jesús ña cuahá tañu ndicó coo tucu ínima quini ini ñayivi vatí sa naquee rí

(Lc. 11:24-26)

⁴³Tá quéta in ínima quini ini in dataa já quée rí cuahan rí xíca nuu rí ndijáa yucú íchí ndínducú rí nuú candoo rí. Ta tá co ndíñehe rí ña já cásahá cáhvi ini rí já: ⁴⁴“Coho ndicó coo tucú ini da nuú nasandacaan í cán jáchi cúu á tátuhun vehé”, cáhán rí. Ta tá xinu coo rí ini da cán já sándehe rí ña íin víí va ini da cán tá quiahva víí ini vehe tá natihvi á ta nandaca ndójó vaha tóco ndihi ñaha ini a. ⁴⁵Anda já quée tucu mé rí quini cán cuahan rí quehe rí usa ga rí quini chága a juú ga mé rí já xinu ndihi rí ndihvi rí ini dataa cán. Ta mé da cán ndiquini chága da a juú ga tá

nasandacaan in tálaá rí ini da. Quiahva já ndoho ri ñayivi quini ndúu tiempo viti —cáchi Jesús.

Náná Jesús xihín ñani a cúní na cuni na a

(Mr. 3:31-35; Lc. 8:19-21)

⁴⁶Nani cáhan yíi va Jesús xihín ñayivi já naxinu coo náná Jesús xihín ñani a ña ná cáhan na xihín á cúní na. Joo nacandoo na ndíta na jata véhe.

⁴⁷Já nasahan in na cáxi tuhun na nuú Jesús já cáchi na já xihín á:

—Jata véhe cáa íin nánún xihín ñanún ta cáhan na xuhun cúní na —nacachi na xihín Jesús.

⁴⁸Joo nanducú ñehe Jesús tuhun nuú na cán já nacachi a já xihín ná:

—Cáhan i xihín ndó ndá na cúu ndusa náná i xihín ñani i —nacachi Jesús xihín ná.

⁴⁹Anda já nanaha ndáha mé á na xíca tuun xihín á cán já nacachi a já:

—Na yóho cúu ná tátuhun náná i xihín ñani i. ⁵⁰Jáchi ndá na cája ña cúní Ndióxi, tátá i, mé a íin indiví, na cán cúu ná tátuhun ñani i xihín quiahva i xihín náná i —nacachi Jesús xihín na cán.

Sácú Jesús quiahva sahá in da sátá tata

(Mr. 4:1-9; Lc. 8:4-8)

13 Sa mé quívi já naqueta Jesús vehe cán já nasahan nasacoo a yati yuhú tañuhú cán. ²Ta sahá ña nataca cuahá ndivaha ñayivi nu á sahá ña cán quea nandaa mé á jatá in barco loho ta nasacoo a jatá do cán nani ndúu ñayivi ñutí yuhú tañuhú cán. ³Anda já nacasáhá jánaha cuahá ñaha nu ná ta nasacu a quiahva nu ná já nacachi a já xihín ná:

—In da sátá tata naquee da cuahan da cata da ña. ⁴Ta tá sátá da ña cuahan da já nacuyu java ña íchi ta cán naxinu laa ta nasaxí rí ña. ⁵Ta java ña nacuyu a tañu yuu nuú coo cuaha núhu. Ta cama chá nanduta mé tata jáchi co cúná núhu nuú nacuyu a. ⁶Joo tá naqueta candii já najáhichi ñahá sahá ña coo cuaha yóho a chí nandihi sahá. ⁷Ta java tata nacuyu tañu tohíñú ta tá nasahnu tohíñú cán já nanditáha ndihi a nacaja tohíñú. ⁸Ta java tata nacuyu a nu ñuhú vaha ta já nasahan cuahá ñaha ña jáquee na nu á. Java ña nasahan in ciento a nuú in in tata ta java ña nasahan uni jícó uxu a ta java ña nasahan oco uxu a nuú in in tata. ⁹Na íin johó, ná cuni johó na —nacachi Jesús.

Ndícani Jesús ndá sahá quea nasacu a quiahva nu ná

(Mr. 4:10-12; Lc. 8:9-10)

¹⁰Na xíca tuun xihín Jesús cán nacayati na nu á já nacasáhá ndáca tuhún na mé á ndá cuénta quea jánaha mé á xihín quiahva cuití va nuú ñayivi. ¹¹Anda já nacachi Jesús já xihín ná:

—Ñā cōó nācandaa ini ndó jihna ñā cán cándaa ini ndó viti jáchi nasuná Ndióxi xíní túní ndo cándaa ini ndó ndá quiahva cacomí mé á cuéntá sahá ñayivi. Joo nā a ñaha cacomí Ndióxi cuéntá sahā, nā cán cúú nā sácú u quiahva nuu. ¹²Jáchi ndá nā sa íin ñaha nuu, ñehe táhvi nā coo chága ñaha nu ná. Joo nā cō á ñaha nuu, janda ñā chá íin nu ná ndindaa. ¹³Sahá ñā cán quēa cáhan i xihín ndinuhu quiahva xihín mé ndó jáchi vatí sándehé nā joo cúú ná tátuhun nā cō tívi nuu. Ta vatí xíní johō na joo cúú ná tátuhun nā johō jáchi cō cándaa ini na ñā cáhan i xihín ná. ¹⁴Ta xihín ñā yóho xínu cōo nuú tuhun nācachi profeta Isaías sanahá ndivaha tá nācachi da já:

Vatí xíní johō na joo cúú ná tátuhun nā johō jáchi cō cándaa ini na ñā cáhan i xihín ná.

Ta vatí sándehé nā joo cúú ná tátuhun nā cō tívi nuu.

¹⁵Jáchi nandaji xíní túní tóco ndihi ñayivi ñuu yóho.

Ta ndájí tuun johō na ta ndájí tuun nduchú núú nā.

Ñā cán quēa a cuú cuni johō na,

ta ni a cuú candehé nā,

ta ni a cuú cándaa ini na ñā xíní johō na.

Ta xihín ñā yóho cō ndíco cōo na nuú i ñā ná ndaja vaha i nā, nācayí Isaías sanahá.

¹⁶Joo tahví nācuu ndó jáchi cándaa ini ndó ñā sándehé ndó xihín ñā xíní johō ndó. ¹⁷Mé a ndaa ná cáhan i xihín ndo ñā cuahá ndivaha na profeta xihín cuahá ndivaha ñayivi vaha naxica ini na cuni na ñā xíní ndó yóho viti joo cōó naxini na ñā ta naxica ini na cuni johō na ñā xíní johō ndó yóho joo cōó naxini johō na ñā.

Ndícani Jesús ñā cúní cachi quiahva nasacu a nu ná

(Mr. 4:13-20; Lc. 8:11-15)

¹⁸Cuni johō ndó ñā cúní cachi quiahva nasacu u sahá da sátá tata cán. ¹⁹Ñayivi, nā xíní johō tuhun vaha sahá ñā sa nācayati quiví cacomí Ndióxi cuéntá sahá ñayivi joo cō cándaa ini na ñā, nā cán cúú ná tátuhun tata ñā nācuyu íchi cán. Jáchi xínu tiñáhá sacuahā ta tává rí tuhun Ndióxi cán ínimā ná. ²⁰Ta tata ñā nācuyu tañu yuu cán náha ndá quiahva íin ñayivi, nā cájii ndivaha ini ndíquehe tuhun Ndióxi. ²¹Joo sahá ñā cō ñehe íní yóho a cūhun cúná a sahá ñā cán quēa chá tiempo cuití va cándúsa na tuhun Ndióxi. Jáchi tá cásahá ndóho ini na sahá tuhun Ndióxi chí jándacoo va na ñā. ²²Ta tata ñā nācuyu tañu tohínú cán náha ndá quiahva íin ñayivi, nā xíní johō tuhun Ndióxi joo cō jándacoo na íchi naxica na jihna. Ta cásahá ndícani ini na sahá ñaha ñuyiví yóho ta cásahá nā cátóó na canduu cuahá ñaha cuicá nu ná ta cásahá ndícají ini na caja na ñā núu.

Sahá ña cán quéa cúú á tátuhun tata ña co cána ñaha jáquee na nuu jáchi coó nasahnu na xihín tuhun Ndióxi. ²³Joo tata ña nacuyu nuú ñuhú vaha cán náha ndá quiahva íin ñayivi, na xini johó tuhun Ndióxi ta cándaa ini na ña ta cája na ña cájii ini Ndióxi xihín. Java na cúú ná tátuhun yucu trigo ña nasahan in ciento a nuú in in tata. Ta java na cúú ná tátuhun tata ña nasahan uni jico uxu a nuú in in tata. Ta java na cúú ná tátuhun tata ña nasahan oco uxu a nuú in in a —nacachi Jesús xihín ná.

Sácú Jesús quiahva sahá yucu quini nána tañu trigo

²⁴Anda já nasacu Jesús inga quiahva nuú ñayivi ndúu cán já nacachi a já xihín ná:

—Tá ná casahá cacomí Ndióxi cuénta sahá ñayivi já cacuu a tátuhun tá naxutu in dataa trigo ña vaha nu ñúhu dá. ²⁵Joo tá sa ndúu ndihi na quíji na já naxinu coo in da co cúní táhan xihín dá ta nachihin da tata yucu quini tañu trigo cán já naquee da cuahan da. ²⁶Ta tá nasahnu trigo cán ta nacasahá cána yóco a já nanduta ri yucu quini cán. ²⁷Anda já nasahan na cája chúun cán cáhan na xihín xitoho na já nacachi na já: “Candehé ndo. Tata vaha quéa nachihin ndó nu ñúhu ndo joo co cándaa ini nde ndáchí naquixi yucu quini nanana xihín á yóho”, nacachi na cán xihín xitoho na. ²⁸Anda já nanducú ñehe da cán tuhun nu ná já nacachi da já xihín ná: “Ndá da co cúní yehe, da cán cúú da nacaja ña yóho”, nacachi da. Anda já nacachi na cája chúun nu dá cán já xihín dá: “Á co cúní ndó ña ná quihvi nde tuhun ndihi nde yucu quini cáa tañu trigo”, nacachi na xihín dá. ²⁹Anda já nacachi da já xihín ná: “Ná coo mé á jáchi tiaha náá nani túhun ndó yucu quini jan cuu tuhun ndó yucu trigo xihín á. ³⁰Vaha chá ná quiahva í ñamaní cuahnu a xihín trigo janda quiahva ná ndindaa tiempo jáqueé trigo. Ta tá sa jáqueé já cahnda i chuun nuú na jáquee ña ná tavá xóo na yucu quini jihna ñuhú ta ná cató na ña tá nuhni tá nuhni ña ná chicaan ñúhu ná ña. Ta anda jáví ná jataca na trigo taán vaha na ini yáca ñaha i”, nacachi da —cáchi Jesús sácú a quiahva nu ná.

Sácú Jesús inga quiahva sahá ndíqui mostaza

(Mr. 4:30-32; Lc. 13:18-19)

³¹Ta nasacu Jesús inga quiahva nu ná já nacachi a já xihín ná:

—Tá ná xinu coo quiví cacomí Ndióxi cuénta sahá ñayivi já cúú á tátuhun in ndíqui mostaza ña chíhin in dataa nu ñúhu da. ³²Cúú á ndíqui loho chága nu tóco ndihi ndíqui válí íin ñuyiví. Joo sáhnua a janda quiahva ndúu a in yíto, dó cáhnua nu ndíhi yíto nu xinu coo laa cávaha rí choho ri nu ndáha do —cáchi Jesús.

Sácú Jesús quiahva sahá yusá naxaa

(Lc. 13:20-21)

³³Ta nasacu Jesús inga quiahva nu ná já nacachi a já xihín ná:

—Tá ná cacomí Ndióxi cuéntá sahá ñayivi já cacuu a tátuhun tá cává táhan in ñáñáha uní táhndá náhnu harina xihín loho yusá naxaa ña ná jánañu a tóco ndihi mé yusa cán —nacachi Jesús.

Sácú Jesús quiahva cuití va nuú ñayivi

(Mr. 4:33-34)

³⁴Xihín ndinuhu quiahva cuití najánaha Jesús tóco ndihi ña yóho nuú ñayivi. ³⁵Já nacaja Jesús ña ná xinú coo nuú ña nacachi in da profeta sanahá tá nacachi da já:

Xihín ndinuhu quiahva cuití va cahan i xihín ñayivi,
ta cahan i sahá ñaha nasahiin jehé nu ná janda mé saha tá cámaní
cava sahá sahá ñuyíví —cáchi tuhun Ndióxi.

Ndicani Jesús ña cúní cachi quiahva nasacu a sahá yucu quini nanana tañu trigo cán

³⁶Tá nandihí nandindayí Jesús ñayivi cuaha ndúu cán já naquihvi a ini vehe. Anda já nacativi na xíca tuun xihín a cán nu á já nacachi na já xihín á:

—Ná ndicani ndó nuú nde ndía cúní cachi quiahva nasacu ndó sahá yucu quini nanana tañu trigo cán —nacachi na.

³⁷Anda já nacachi Jesús já xihín ná:

—Da xútu tata vaha cúú yehe, da nachindahá Ndióxi nduu ñayivi. ³⁸Ta ñúhu nu xútu u tata cúú á ñayivi ñuyíví. Ta tata vaha cán cúú á yuhú nuú na cómí Ndióxi cuéntá saha. Ta yucu quini cán cúú á yuhú nuú ñayivi quini, na cúú cuéntá rí quini. ³⁹Ta da co cúní táhan xihín i nasahan da naxutu da yucu quini nu ñúhu cán ta cúú dá yuhú nuú tiñáhá sacuahá. Ta tiempo jáquee na cán cúú á tá ná xinú coo quiví caja vií Ndióxi sahá ñayivi ndúu ñuyíví. Ta na xíca jáquee cán cúú ná tátó Ndióxi. ⁴⁰Ta tá quiahva nacaja na cán xihín yucu quini tá najátaca na ña ta nachicaan ñúhu na ña quiahva já yaha ri xihín ñayivi ñuyíví yóho tá ná tandaa quiví ndihi sahá ñuyíví. ⁴¹Ta yehe, da nachindahá Ndióxi nduu ñayivi chindahá i tátó mí i ña ná cahnda java táhan na na cómí i cuéntá saha xihín na co cúú cuéntá mí i. Jáchí na cán jácahan na inga na caja na cuachi xihín java ga na cája ña núu. ⁴²Ta jáqueta nuu i na ini indayá ta cán cuacu na anda quiahva chicáhñá nuhu na jáchí ndóho ndivaha ini na. ⁴³Ta anda já na cája ña cúní

Ndióxi ndiyihvi ndaa na tá quiahva yéhe candii nuú cacomí Ndióxi cuéntá sahá ná, mé á cúú á tátá na. Ndá na íin johó, ná cuni johó na.

Sácú Jesús quiahva sahá sató jiuhún ndácaan jehé

44"Ta ná cacomí Ndióxi cuéntá sahá ñayivi cacuu a tátuhun ña yáha xihín in dataa tá ndínehe dá in sató jiuhún ña ndácaan jehé in ñundáhyi. Ta tá nandihí já chíjahvi tucu da ña xihín ñúhu. Ta já cávatá ndivaha da cuhun da jicó da tóco ndihí ña cómí da ña ná cueen da ñundáhyi nuú nanduxu mé sató jiuhún cán.

Sácú Jesús quiahva sahá in jíqui sándacu na ña yahvi ndivaha

45"Ta ná cacomí Ndióxi cuéntá sahá ñayivi cacuu a tátuhun tá xíca nuu in da cája ndahvi ndúcú da jíqui sándacu na ña yahvi ndivaha. 46"Ta tá ndítahan da in jíqui yahvi ndivaha já cuahan da jicó da ndihí ñaha cómí da ña ná cueen da jíqui yahvi ndivaha cán.

Sácú Jesús quiahva sahá in ñúnu tává tiyacá

47"Ta tá ná cacomí Ndióxi cuéntá sahá ñayivi cacuu a tátuhun in ñúnu jácana na nuú tañuhú ta já tíin na tá nuú tiyacá. 48"Ta tá sa nachutú ñúnu cán já tává na tiyacá cán yuhú tañuhú ta cán sácoo na ndacahnda java na ri. Ta rí vaha cán táan vaha na ini toyicá na joo rí núu cán xíta ri cája na. 49"Quiahva já yaha ri xihín ñayivi tá ná ndihí sahá ñuyíví. Jáchí queta tátó Ndióxi ndacahnda java na vaha tañu na quini. 50"Ta ñayivi quini cán chicaa na ini indayá ta cán cuacu na janda quiahva chicáhná nuhu na jáchí ndóho ndivaha ini na —cáchí Jesús.

Tá jánaha Jesús sahá ña saá xihín ña yatá

51"Ta nandihí já nandaca tuhún Jesús na já nacachi a já:
—Á cándaa ini ndó tóco ndihí ña cáhan i yóho —cáchí a.
—Ajan, cándaa ini nde ña —nacachi na cán xihín á.

52"Ánda já nacachi Jesús já xihín ná:

—Tá jácuaha in da jánaha ley Moisés sahá ndaja ndiquiahva da mé dá ndáha Ndióxi cacomí a cuéntá sahá dá já cúú dá tátuhun in dataa, da íin ñaha ini vehe. Ta xíní vaha da tavá da ñaha da á cúú á ña saá á ña yatá —cáchí a.

Tá cuahan Jesús ñuu Nazaret

(Mr. 6:1-6; Lc. 4:16-30)

53"Ta nandihí najánaha Jesús xihín quiahva yóho já naquee a cuanúhu a. 54"Ta naxinu a ñuu mé á já nacasáha jánaha ini veñuhu cán. Ta jandá johó catóntó ñayivi ñuu cán já cáchí na já:

—Ta ndájá n̄acatiahva nahá ri da yóho ña xini da. Ta ndaja cája da ñaha xitúhún yóho. ⁵⁵Á a juú da yóho cúu jahyi da cája chúun xihín yito. Á a juú náná da yóho cúu María. Ta ñani da cúu Jacobo xihín José xihín Simón xihín Judas viti. ⁵⁶Ta sa mé ñuu yóho ndúu ri quiahva da jan. Ndájá n̄acatiahva nahá da ña jánaha da nu yo, dá já —n̄acachi xihín táhan na cán.

⁵⁷Ta chí coó n̄axeen na candúsa ñahá na. Sahá ña cán quéa n̄acachi a já xihín ná:

—Vatí tóco ndihi ñayivi cája cáhnu na in profeta joo na vehe da xihín na ñuu da co candúsa na da —cáchi Jesús.

⁵⁸Ta coó n̄acaja cuahá Jesús ña xitúhún ñuu cán jáchi coó n̄acandúsa toho ñayivi cán mé á.

Tá n̄axihí Juan, da n̄acaja ndúta ñayivi

(Mr. 6:14-29; Lc. 9:7-9)

14 Mé tiempo cánnaxini johō Herodes, da cúu gobernador cán ña ndítúhún na sahá Jesús. ²Anda já n̄acachi da já xihín mozo da:

—Á a juú Jesús cúu á Juan, da najácandúta ñayivi ta viti n̄anditacu tucu da. Sahá ña cán quéa íin ndée da cája da tóco ndihi ña cája da yóho —cáchi Herodes.

³Jáchi janda mé saha n̄atiin Herodes Juan n̄acató ñahá da ta n̄achicaan da da vecaa. Ta n̄acaja da ña yóho sahá Herodías, ña nasacuu ñájihí Felipe, ñani da. ⁴Jáchi mé Juan najánani ñahá da sahá ña íin Herodes xihín ña ta já n̄acachi da:

—Co ndítahan coún xihín ñájihí ñanún —n̄acachi Juan xihín dá.

⁵Ta janda já n̄anducú Herodes cahní da Juan joo a cuú caja da ña jáchi yíhví da ñayivi sahá ña cándúsa na ña cúu Juan in profeta n̄achindahá Ndióxi. ⁶Joo in tañu nani ndácaan Juan vecaa já n̄acavaha Herodes víco sahá quiví n̄acacu da. Ta n̄andaca ndíchí ña cúu jahyi Herodías cán n̄axita sáhá ña nu ndíhi na ndúu víco cán. Ta a juú quiahva n̄acajii ini Herodes xihín ña yóho. ⁷Sahá ña cán quéa quiví Ndióxi tává da tá sáhan da tūhun da nu ña cán ña quiahva da nu ña ndá ña cúní mé ña caca ña nu dá. ⁸Tá n̄andihi n̄andaca tūhún jihna ña náná ña já ndáva ña nasahan ña nu Herodes já cáchi ña já xihín dá:

—Viti ñúhú cúní ña ná quiahva ndó yiquí jíní Juan, da jácandúta ñayivi nuú i ini in coho cáhnu —n̄acachi ña xihín dá.

⁹Tá n̄acachi ña já xihín Herodes já n̄acacuéha ndivaha ini da. Joo sahá ña sa natavá da quiví Ndióxi tá nasahan da tūhun dá nu ña cán ta sahá ña cúní da candoo vaha da nuú na ndúu víco xihín da cán sahá ña cán quéa nasahnda da chuun ña ná quiahva na ña nu ñá. ¹⁰Chí nasahnda da chuun

ñā ná chitúhūn ná yiquí jíní Juan ini vecāa cán. ¹¹Ta já nāchicaan nā yiquí jíní da ini in cōhō cáhnu já nāsahān nā ñā nū ñá cán. Anda já nāndiquiahva ñá cán ñā ndáha náná ñā.

¹²Anda jáví nāxīnū nā nāxīca xīhīn Juan cán já nāsahān nā nāndiquehe na yiquí cūñu da ta najánduxu nā da. Ta já nāsahān nā nācaxi tūhun na ñā yóho nuú Jesús.

Tá nāsahān Jesús ñā cuxu uhun mil taa

(Mr. 6:30-44; Lc. 9:10-17; Jn. 6:1-14)

¹³Tá nāxini jōho Jesús sahā Juan já naquee xóo a ini in barco loho cuahān nuú cō ndúu ñayivi. Joo tá nāxini jōho ñayivi ñā cuahān Jesús já naquee na ñūu na ndíco nā cuahān sáhá nā nū íin a. ¹⁴Ta tá nanuu Jesús barco cán já nāxini a cuahā ndivaha ñayivi ta natahvi ini a sahā ná. Ta chí nāndaja vaha mé á nā quíhvi nāquixi tañu nā cán. ¹⁵Ta tá sa cáhini cuahān já nācayati nā xīca tuun xīhīn a cán nū á. Já cáhí nā já xīhīn á:

—Sa nahini va ta a juú xoo nū ndúu ñayivi queā yóho. Ndindayí ndó ñayivi ná cūhūn nā ñūu válí yati jan já ná cueen na ñā cuxu na —nācachi nā cán xīhīn á.

¹⁶Anda já nācachi a já xīhīn ná:

—Cō xíní ñúhú toho quee na cūhūn nā. Mé ndó quiahva ndó ná cuxu na —nācachi Jesús.

¹⁷Anda já nācachi tucu nā cán já xīhīn á:

—Cō mé ñāha va cuxu na yóho. Uhun víxí pan xīhīn ivi laá tiyacá cuití va íin yóho —nācachi na xīhīn Jesús.

¹⁸—Taxi ndó a chóho —nācachi Jesús xīhīn ná.

¹⁹Anda já nāsahnda Jesús chuun ñā ná ndaca nduu ndihi nā cán nuú yucu. Anda já nātiin a ndíhūhūn pan xīhīn ndíví tiyacá cán já nāsandehé a chí indiví já nāndiquiahva ndixahvi nū Ndióxi. Tá nāndihi já nāsahnda java pan ta nāsahān ñā nuú nā xīca tuun xīhīn á cán ta nā cán nāndicahnda na ñā nuú ñayivi cuahā cán. ²⁰Ta tóco ndihi na nāxixi na jānda quiahva nāchutú nā. Ta tá nāndihi nāxixi na já najátaca na ñā nācandoo cán ta najáchutú nā uxu ivi toyicá xīhīn ñā nācandoo cán. ²¹Ta tóco ndihi na nāxixi cán nāsacuu na tátūhun uhun mil taa. Cō cáhan sahā najihí xīhīn nā valí.

Tá nāxīca sáhá Jesús nuú tañuhú

(Mr. 6:45-52; Jn. 6:16-21)

²²Ta tá nāndihi já nācaja Jesús ñā ná ndihvi nā xīca tuun xīhīn á cán ini in barco ñā ná cūhūn cuéé nā inga xoo tañuhú cán nani candoo too mé á jāndindayí a ñayivi cuahā cán. ²³Ta tá sa najánduta tóco ndihi ñayivi já

nāndaa mé á yúcu cuahān caca tahví a nu Ndióxi. Tá nāndihi já nācuaá ta in túhún mé á ndācaan xíca tahví a nu Ndióxi cán. ²⁴Ta ndaja coo barco loho, dó cándojó nā xíca tuun xihín á cán sa naxinu coo dó janda mahñú tañuhú cuahān dō. Ta ndícojō ndivaha tañuhú jáchi xoo cuahān nā vaxi tachi. ²⁵Joo tátuhun sa cuahān tívi já xíca sáhá Jesús cuahān nuú tañuhú naxinu a nu ná. ²⁶Ta tá naxini na xíca sáhá Jesús vaxi a nuú tañuhú cán já nācatóntó nā. Ta nācasáhá nā cáyuhú cóhó nā sahá ña yíhvi nā já cáchi nā já:

—Ínima quēa vaxi yóho —cáchi nā.

²⁷Joo ivi laá nādicahān Jesús xihín ná já cáchi a já:

—Ndacú coo ini ndó jáchi yehe va cúu u. A yíhvi toho ndó —nācachi a xihín ná.

²⁸Anda já nācachi Pedro já xihín Jesús:

—Xitoho i, tá ta jivi cúu mé ndó cahnda ndó chuun ña ná cuu saa i nu ndo ta ná caca i nuú tañuhú —nācachi da xihín Jesús.

²⁹Ta já cáchi Jesús já:

—Naha quíi —cáchi a xihín dá.

Anda já nanuu Pedro barco cán ta nācasáhá xíca sáhá da nuú tañuhú cuahān da nuú Jesús. ³⁰Joo tá naxini da tachi ndeé xícó nuú tañuhú cán já nayíhvi da. Chí ivi laá nācasáhá quēta nuu da cuahān da ini tañuhú. Já nācayuhú cóhó da já cáchi da já xihín Jesús:

—Chindeé ndó yehe, xitoho i —nācachi da xihín á.

³¹Ta cama chá nātiin Jesús ndáha da ta já nācachi a já xihín dá:

—Ndá cuéntá quēa co cándeé chāga inún yehe ta nācasáhá cáhvi ivi joho inún —nācachi Jesús xihín dá.

³²Ta tá nāndaa ndíví nā jata barco já nācatáji tachi cán. ³³Anda já nācāja cáhnu nā ñúhu ini barco cán Jesús já cáchi nā já xihín á:

—Mé a ndaa táhyí cúu jivi ndusa ndó in túhún jini já jahyi Ndióxi —nācachi na xihín á.

Tá nāndaja vaha Jesús nā quíhvi ndúu ñundáhyi Genesaret

(Mr. 6:53-56)

³⁴Ta já nāxica loho ga nā nuú tañuhú cán já naxinu coo na ñundáhyi Genesaret. ³⁵Ta tá nādicuni ñayivi ndúu cán mé á já nāchindahá nā chuun nāsaḥān nuú ndaja táhan ñayivi ndúu ndijáá ñundáhyi cán. Já ñéhe ndihi na nā quíhvi nācasaa nā nu á. ³⁶Ta nā quíhvi cán nāxica tahví nā nu á ña ná quiahva ñamaní caní ndaa ndáha ná yuhú jahmá níhnu a ta tóco ndihi nā nācani ndaa ndáha jahmá a nāndivaha na.

Ña cája quini ínimā ñayivi

(Mr. 7:1-23)

15 Ndajacoo java na fariseo xihín java na jánaha ley Moisés ndúu ñuu Jerusalén cán nacayati na nuú Jesús já nacasáhá cáchí na já xihín á:

²—Ndávaha co cája na xíca tuun xuhun ña nacachi tásáhnú jícó yō caja na. Ndávaha xíxi na tá cámaní ndahá na tá quiahva sáhndá ley caja na —nacachi na cán xihín Jesús.

³Anda já nanducú ñehe Jesús tuhun nu ná já nacachi a já:

—Ta jári ndóhó va, ndá cuéntá quēa jándacoo ndó ña sáhndá Ndióxi nu ndó caja ndó. Ta ña cája ndó quēa ndíco ndó costumbre mé va ndó. ⁴Jáchí sáhndá Ndióxi chuun já cáchí a já: “Caja cáhnún tátún xihín nánún.” Ta jári cáchí a: “Ndá na ná chícaan cháhan jata tátá na á náná na, ndítahan quivi na”, cáchí a. ⁵Joo ndóhó, jánaha ndó nuú ñayivi ña cuu cahan na já xihín tátá na á náná na: “A cuú chindeé e ndohó jáchi sa nasacu xoo i ñaha i quiahva i ña nu Ndióxi”, cáchí na. ⁶Tá ná cachi na ña yóho já quēa co ndúsa ga chindeé na tátá náná na. Quiahva johó cája ndó ta sácu xóo ndó ña nasahnda Ndióxi chuun nu ndo ta ndája ndó a tátuhun in ñaha ña coó saha. Jáchí ndíco cáhnú ndó ña najándacoo tásáhnú jícó ndo nu ndo. ⁷Co cúú ndó tá quiahva ndáa ndó. Mé a ndaa nacahan profeta Isaías saha ndo sanahá tá nacyhyí da ña nacachi Ndióxi:

⁸Yuhú ninu uun na cája cáhnú na yehe.

Ta co cája cáhnú na yehe xihín ndinuhu ínimā na.

⁹Ta mé a uun quēa cája cáhnú na yehe,

jáchí ña jánaha na nuú ñayivi cuití va cúú á ña quíxi jini mé va na, nacachi profeta Isaías sanahá ndivaha —nacachi Jesús xihín na cán.

¹⁰Tá nandihi já nacana Jesús tóco ndihi ñayivi ndúu cán já nacachi a já xihín ná:

—Cuni johó vaha ndó ña cahan i xihín ndó ta ná candaa ini ndó ña. ¹¹A juú ñaha xíxi ñayivi ndája quini ínimā ná. Tuhun quini quéta yúhu ná ña jan quēa cája quini ñahá —nacachi Jesús.

¹²Tá nandihi já nacayati na xíca tuun xihín Jesús cán nu á já nacachi na já xihín á:

—Chí a váha mé nacyu ini na fariseo tá naxini johó na ña nacachi ndó jan —nacachi na cán.

¹³Anda já nacachi Jesús já xihín ná:

—Ñayivi, na co ndíquehe vaha tuhun Ndióxi cúú ná tátuhun in yíto, dó coó najándee Ndióxi, tátá i ña íin indiví. Saha ña co cúú dó cuéntá mé á já tandaa quivi ña tuhun mé á do anda yóho do. ¹⁴Saha ña cán quēa co

ndítahan ndicani ini ndó sahá na jan jáchi na cuaá va cúu ná. Ta a cúu toho caja in da cuaá candaca da inga da cuaá cūhun da jáchi ndíví já da ndacava da yávi —nacachi Jesús.

¹⁵Tá nandihí já nacachi Pedro já xihín Jesús:

—Ndicani loho ndó nuú nde ndaja cáa ña cáchí ndo ña co cája quini toho ña xíxi ñayivi mé ná jáchi co cánda ini nde ña —nacachi Pedro xihín Jesús.

¹⁶Já nacachi Jesús já xihín ná:

—Á coó toho xíní túni ri ndóhó va, vaha. ¹⁷Jáchi co cánda ini ndó ña tóco ndihí ñaha xíxi ñayivi a cúu caja quini a na. Jáchi ña xíxi ñayivi co xínu a ini ínima ná joo xínu coo ña tixi va na já queta tucu a yiquí cuñu na. ¹⁸Ña cuu ndaja quini ñayivi cúu ña quíxi ínima ná tátuhun tūhun cáhan na xihín ña cája na. ¹⁹Jáchi chí ínima ñayivi quíxi ña cáhvi núu ini na tátuhun ña cáhvi ini na cahní na ndii. Ta sa mé cán quíxi ña cáhvi ini in dataa coo da xihín ñájíhí ñani táhan da á xihín in ña co cúu ñájíhí da. Ta sa mé cán quíxi ña ndiáva íní da caja cuíhná da. Ta sa mé cán quíxi ña cávaha jíquí da tūhun sahá ñani táhan da ta jári quíxi ña cánahá da xihín Ndióxi. ²⁰Tóco ndihí ña cáhvi núu ini ñayivi caja na, ña yóho quéa ndája quini a na. Joo co cáquini toho ñayivi sahá ña co ndáhá na tá cámaní cuxu na tá quiahva íin costumbre na —nacachi Jesús xihín na xíca tuun xihín á cán.

Tá nacandeeé ini in ña tóho Jesús

(Mr. 7:24-30)

²¹Tá nandihí já naquee Jesús cuahan chí ñundáhyi cuéntá Tiro xihín cuéntá Sidón cán. ²²Ta nu xíca cuahan cán naqueta in ñañáha ñundáhyi Canaan nu á já cáyuhú ña já cáchí ña já xihín á:

—Xitoho i, da naquixi chichi David caja ndó ñamaní candáhvi loho ini ndó yehe. Chindeé ndó jahyi jíhí i jáchi rí quini ndácaan ini ña —nacachi ñañáha cán xihín Jesús.

²³Joo ni in túhún tūhun coó nanducú ñehe Jesús nu ña. Anda já nacativi na xíca tuun xihín a cán nu á já nacachi na já xihín á:

—Taxi ndó ña jan ná quee ña cūhun ña jáchi cáyuhú ña ndácaa ña jata yó vaxi ña —nacachi na cán xihín Jesús.

²⁴Anda já nacachi Jesús xihín ñañáha cán já:

—Nachindahá Ndióxi yehe vaxi i nuú ñayivi Israel cuití va, mé na cúu tátuhun ndicachi, rí nandíñuhú —nacachi Jesús.

²⁵Anda já ndáva ña cán naxínu coo ña nacaxítí ña nu Jesús já cáchí ña já xihín á:

—Caja ndó ñamaní chindeé loho ndó yehe, xitoho i.

²⁶Anda já nacachi Jesús já xihín ñá:

—A váha toho candaa i pan ndahá na valí ta já cana i ña nuú tina —nacachi Jesús xihín ñá cán.

²⁷Anda já nacachi ñá cán já xihín Jesús:

—Mé a ndaa cáhan ndo joo anda tina, rí ndúu tixi mesa xíxi rí ña jácuyu jahyi xitoho rí —nacachi ñá cán xihín Jesús.

²⁸Anda já nacachi Jesús já xihín ñá:

—Mé a ndaa cándeé cáhnu inún Ndióxi. Ná coo a tá quiahva cúni mún —nacachi Jesús xihín ñá.

Chí mé hora já nandivaha jahyi jíhí ña.

Ndaja vaha Jesús cuahá na quíhvi

²⁹Tá nandihi já naquee Jesús cuahan já naxinu coo a yati yuhú tañuhú Galilea. Já ndaa in jini yucu ta cán nasacoo a. ³⁰Ta já nacasáhá nataca cuahá ndivaha ñayivi já ñéhe na na quíhvi saha xihín na cuaá xihín na níhi xihín na réncó ndáha. Ta cuahá ga nuú na quíhvi ñéhe na nacasaá na nachinduu na na nu Jesús. Ta ndaja vaha mé á na. ³¹Ta xihín ña yóho a juú quiahva nacatontó na tá naxini na ña nacasáhá ndicahan na níhi. Ta nacatontó na tá naxini na ña nandivaha ndahá na réncó ta ndícaca vaha na quíhvi saha ta quiahva já nandivaha ri na cuaá. Ta nacasáhá na cája cáhnu na Ndióxi, mé a cómi cuéntá sahá na Israel.

Tá nasahan Jesús ña cuxu comi mil nataa

(Mr. 8:1-10)

³²Anda já nacana Jesús na xíca tuun xihín á já nacachi a já xihín ná:

—Táhnda ndivaha ini i sahá ñayivi yóho jáchi sa naxinu uni quivi ndúu na xihín i ta chí coó ga ña cuxu na. Ta co cúni chindahá i na nuhu na vehe na jáchi cámani cuxu na ta tiahva náá cuitá na ta cuyu na íchi —nacachi Jesús.

³³Anda já nacachi na xíca tuun xihín a cán já:

—Coó toho ñuu yati va ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —nacachi na cán xihín Jesús.

³⁴Já nacachi Jesús já:

—Ndaja pan cómi ndo.

Já nacachi na cán já:

—Usa pan xihín java tiyacá válí.

³⁵Anda já nasahnda Jesús chuun ña ná cacoo ndihi ñayivi nu ñúhu cán.

³⁶Ta já natiin a ndíhusa pan cán xihín java tiyacá válí cán já nandiquiahva ndixahvi nu Ndióxi. Ta já nasahnda java ña ta nasahan ña nuú na xíca tuun xihín á cán ña ná ndicahnda na ña nuú ñayivi cuahá cán. ³⁷Ta naxixi

tóco ndihi na janda quiahva nachutú tixi na. Ta tá najánditaca na ña nacandoo cán já nachutú usa toyicá xihín ña. ³⁸Ta na naxixi cán cúu ná comi mil taa ta co cáhan sahá najihí xihín na valí. ³⁹Ta tá nandihí nandindayí Jesús ñayivi já nandihvi a ini barco já naxinu coo a ñundáhyi cuéntá Magdala.

Cúni na fariseo xihín na saduceo cuni na in ña xitúhún caja Jesús

(Mr. 8:11-13; Lc. 12:54-56)

16 Ta ndaja coonaxinu coo na fariseo xihín na saduceo nu Jesús. Ta sahá ña cúni na coto ndojó cuití ñahá na sahá ña cán quéa naxica na nu á ña ná caja in ña xitúhún cuéntá indiví já ná candaa ini na á mé a ndaa cúu á ña nachindahá Ndióxi. ²Anda já nanducú ñehe Jesús tuhun nu ná já nacachi a já xihín ná:

—Tá nahini já cáchí ndo já: “Tiempo vaha ndivaha cacuu a jáchi ndiyéhe cuáhá indiví”, cáchí ndo. ³Ta naha cáchí ndo já: “Viti ndusa quéa cuun ndeé ndivaha javi jáchi iin víco ndivaha ta iin víco cuáhá indiví”, cáchí ndo. Co cúu ndó tá quiahva ndaa ndó. Ndá cuéntá quéa tiahva ndó ndicuni ndó ndá quéa coo tá sándehe ndó indiví joo co tiáhva ndó ndicuni ndó ndá tiempo cúu á viti. ⁴Ñayivi quini, na co cúni candúsa Ndióxi, na cán cúu na xica ña ná caja i ña xitúhún nu ná. Joo ni in túhún toho ñaha xitúhún a cája ga i nu ná. In túhún ña candehe na cacuu a ña tandaa quivi ndoho i tá quiahva nandoho profeta Jonás sanahá ndivaha —nacachi Jesús xihín ná.

Já naquee a cuahan.

Tá sácú Jesús quiahva sahá na fariseo

(Mr. 8:14-21)

⁵Ta ndaja coo naxinu coo a inga xoo tañuhú xihín na xica tuun xihín á cán ta nandindójó na cán cañehe na pan cuxu na. ⁶Tá nandihí já nacachi Jesús já xihín ná:

—Candehe ndo. Cuéntá coo ndó xihín na fariseo ta xihín na saduceo jan jáchi ña jánaha na cúu á tátuhun yusa naxaa ña cáva táhan na xihín harina cávaha na pan —nacachi Jesús.

⁷Joo na xica tuun xihín á cán ndítúhún xihín táhan na ña nacachi Jesús já sahá ña coo pan ñehe na cuahan xihín ná.

⁸Ta tá nacandaa ini Jesús ña cáhan na já nacachi a já xihín ná:

—Ndá cuéntá quéa co cándéé cáhnu ini ndó yehe ta cáhan ndo ña cáchí i ña yóho xihín ndo sahá ña co ñehe ndó pan vaxi ndó. ⁹A ñaha cándaa ini ndó. Ndítahan ndicuhun ini ndó ña ndajaja cuahá i uhun víxí pan tá naxixi uhun mil taa. Ta sa xini ndó ndaja toyicá najáchutú ndo xihín ña

naꝥandoo cán. ¹⁰Ta ndítahan ndicuhun ini ndó ña naꝥaja i xihín usa pan tá nandicahnda i ña naꝥixi comi mil taꝥ ta sa xini ndó ndaja toyicá najáchutú ndo xihín ña naꝥandoo cán. ¹¹Ndá cuéntá quea co cándaa toho ini ndó ña coo naꝥachi i ña yóho xihín ndó sahá ña coo pan ñéhe ndó vaxi ndó. Joo naꝥachi i ña cuéntá coo ndó xihín na fariseo ta xihín na saduceo jáchi ña jánaḥa na cúu á tátuhun yusá naꝥaa ña cáva táhan na xihín harina cávaḥa na pan —naꝥachi Jesús.

¹²Tá naꝥachi Jesús ña yóho já naꝥandaa ini na xica tuun xihín á cán ña a juú toho sahá yusá naꝥaa cáhan Jesús saḥa. Ña cúni Jesús cachi a xihín ná quea cuéntá vaḥa ná coo na xihín ña jánaḥa na fariseo xihín na saduceo.

Tá cáxi tuhun ndaa Pedro ña cúu Jesús mé á naꝥindahá Ndióxi cacomí a cuéntá sahá ñayivi

(Mr. 8:27-30; Lc. 9:18-21)

¹³Tá naꝥinu coo Jesús ñundáhyi Cesarea cuéntá Filipo já nandaca tuhún a na xica tuun xihín á cán já naꝥachi a já xihín ná:

—Ndá da cáchi ñayivi cúu yeḥe, da naꝥindahá Ndióxi nduu ñayivi —naꝥachi Jesús.

¹⁴Já naꝥachi na cán já:

—Java na cáchi na ña cúu ndó Juan, da naꝥaja ndúta ñayivi. Ta java na cáchi na ña cúu ndó profeta Elías. Ta java na cáchi na ña cúu ndó profeta Jeremías. Ta java na cáchi na ña cúu ndó in táhan profeta naꝥanduu sanahá —naꝥachi na.

¹⁵Anda já naꝥachi Jesús já xihín ná:

—Ta ndóhó ri, ndá da cáchi ndó cúu u —naꝥachi a.

¹⁶Anda já nanducú ñeḥe Simón Pedro tuhun nu Jesús já naꝥachi da já xihín á:

—Mé ndó cúu Cristo, ña naꝥindahá Ndióxi cacomí cuéntá sahá ñayivi. Ta cúu ndó in túhún jini já jahyi Ndióxi, mé a tácu íin indivi —naꝥachi da.

¹⁷Anda já nanducú ñeḥe Jesús tuhun nu dá já naꝥachi a já xihín dá:

—Tahví nahá cúun, Simón, jahyi Jonás jáchi ni in túhún ñayivi coo naꝥaxi tuhun ña yóho xuhun. In túhún tátá i, mé a íin indivi nanaha ña yóho nuun.

¹⁸Ta quiahva johó cáchi ri yeḥe saḥa yóhó: Yohó cúun Pedro ta quivun cúni cachi a tóto. Ta cúun tátuhun yuu ndúhu sahá in veḥe nuú cavaha i veñuhu mí i jáchi yóhó caca nuún cahun sahá i nuú ñayivi já ná quee vaḥa na xihín tiñahá sacuaḥa já ná a cuhun na indayá. ¹⁹Ta caja i xuhun ña ná cuu ndicanún nuú ñayivi ndaja ndiquiahva na mé ná ndáha i cacomí i cuéntá saḥa ná. Cacu a tátuhun quiahva i yáví nuun ña ná cunún íchi nuú ndihvi ñayivi cacomí i cuéntá saḥa ná. Tá co sáhun ñamaní ná ndihvi ñayivi cán já quea a quiahva toho i ñamaní nu ná. Joo tá sáhun ñamaní nu ná ndihvi na cán já quea quiahva ri yeḥe ñamaní nu ná —cáchi a xihín Pedro.

²⁰Anda já nasahnda Jesús chuun nuú ná xíca tuun xihín á cán ña ná a cáxi tuhun na xihín ni in túhún ñayivi ña cúu mé á Cristo, mé á nachindahá Ndióxi cacomí cuéntá sahá ñayivi.

Tá cáxi tuhun Jesús ña quivi a

(Mr. 8:31-9:1; Lc. 9:22-27)

²¹Ta janda mé quivi já nacasáhá Jesús cáxi tuhun a xihín ná xíca tuun xihín á ña ndítahan nu á cuhun a ñuu Jerusalén. Ta mé cán ndoho ndivaha ini a ndahá na sacuahá veñuhu xihín ndahá na sacuahá nuú jutú xihín ndahá na jánahá ley Moisés. Ta caja xíxi ri ná cán va xihín á ta cahní ñahá na. Joo tá ná xinú uní quivi nditacu tucu a. ²²Anda já natavá xóo Pedro Jesús já nacasáhá da jánani ñahá da já nacachi da já xihín á:

—Ama ná yaha ña yóho xihín ndó, xitoho i. Ná a quiahva toho Ndióxi ñamaní ndoho ndó já —nacachi Pedro xihín Jesús.

²³Joo nacava nuu Jesús sándehe a nu Pedro ta já cáchi a já xihín dá:

—Cuáhán quee Satanás, rí cúu tiñáhá sacuahá. Tá quiahva ín na sáji nuu nu ná quiahva já íún nuú i. Jáchi co cáhvi ínún tá quiahva cáhvi ini Ndióxi joo cáhvi ínún tá quiahva cáhvi ini ñayivi cuéntá ñuyíví yóho —nacachi Jesús xihín dá.

²⁴Anda já nacachi Jesús já xihín ná xíca tuun xihín a cán:

—Ndá na cúní candico yehe ndítahan nu ná ndíhi chága ini na sahá yehe a juú ga sahá mé ná. Ta ndítahan coo tiaha na ndoho ini na sahá yehe. Ta coo caja toho a ná quivi na sahá i. ²⁵Jáchi ndá na catóo coo chága ñuyíví yóho ndíhi sahá ná. Joo ndá na sáhan ndeé ini quivi sahá i xihín sahá tuhun Ndióxi, ñehe táhvi ná catacu na anda ama cáa quivi. ²⁶Vatí ná quee vaha in na ñuyíví yóho ta cómi ná tóco ndíhi ñaha ñuyíví yóho joo ndá chuun quéa tá nu ndíhi ndíhi sahá ná indayá. Jáchi ni in ñaha a cuú chahvi in na sahá ínimá ná ña ná a cuhun na indayá. ²⁷Jáchi yehe, da nachindahá Ndióxi nduu ñayivi quixi tucu u xihín ndée Ndióxi, tátá i ta xihín ndée táto Ndióxi. Mé tiempo cán náha ndaja cáhnu cúu yehe. Anda já chahvi i nuú in in ñayivi sahá ñaha nacaja na nani nasanduu na ñuyíví yóho. ²⁸Mé a ndaa ná cahan i xihín ndo ña java na ndúu yóho a quíví toho na janda quiahva ná xinú quivi cuni na quixi tucu yehe, da nachindahá Ndióxi nduu ñayivi cacomí i cuéntá sahá na cúu cuéntá mí i —cáchi Jesús.

Tá nandijama nuu Jesús quiahva cáa

(Mr. 9:2-13; Lc. 9:28-36)

17 Tánayaha iñu quivi já nandaa Jesús in yucú jícó ta ndáca táhan Pedro xihín Jacobo xihín ñani da Juan cuahan na xihín á. ²Ta nu

táhyí mé nā cán nandijama quiahva cáa. Ta a juú quiahva nandiyéhe nuu á tá quiahva ndiyéhe candii. Ta jáhma ndíxi a nandiyaa cachi ña ta chí a juú quiahva yéhe ña. ³Ta ndaja coo nandaca náha Moisés xihín Elías ta nacasáhá ndítuhún da xihín Jesús. ⁴Anda já nandicahan Pedro xihín Jesús já nacachi da já xihín á:

—Vaha cúu ndúu nde yóho, xitoho nde. Tá cúní ndó cavaha nde uní vehe tiyahvá válí. In a coo mé ndó ta inga coo Moisés ta inga coo Elías —cáchi Pedro.

⁵Ta nani cahan Pedro nanuu in vico jata ná ta nacava nuu a na. Ta a juú quiahva ndató yéhe a. Ta tañu vico cán naxini johó na ña cahan in a ta já cáchi a já:

—Da yóho cúu jahyi maní i ta cájii ini i xihín dá. Cuni johó ndó nu cahan da —nacachi mé a cán.

⁶Tá naxini johó na xíca tuun xihín Jesús cán ña cahan yóho já nacaxítí na janda quiahva naxinu nuu ná nu núhu. Ta a juú quiahva ná yihví na.

⁷Anda já nacayati Jesús nu ná ta nacani ndaa ndáha na já nacachi a já xihín ná:

—Cuándacoo ndó. A cáyihví toho ndó —nacachi Jesús xihín ná.

⁸Ta tá nandiñehe na cán nuu ná já naxini na ña íin in túhún jini mé va Jesús.

⁹Ta tá nanuu na jini yúcu cán já nasahnda Jesús chuun nu ná já nacachi a já xihín ná:

—A cáxi tuhun ndó ña naxini ndó yóho nuu ni in ñayivi janda quiahva ná nditacu tucu yehe, da nachindahá Ndióxi nduu ñayivi —nacachi Jesús.

¹⁰Já nacachi na cán já xihín á:

—Ndávaha cáchi na jánaha ley Moisés ña ndítahan quixi jihna núhú profeta Elías —nacachi na.

¹¹Já nacachi Jesús já xihín ná:

—Mé a ndaa jihna núhú quixi Elías ta ndaja vaha ndihi da ñaha. ¹²Joo mé a ndaa ná cahan i xihín ndó ña sa naquixi va Elías joo coo naxeen na ndicuni na da. Ta nacaja na tá quiahva cúní mé ná xihín dá. Ta quiahva já jándoho ri na ini yehe, da nachindahá Ndióxi nduu ñayivi —nacachi Jesús.

¹³Anda jáví nacandaa ini na xíca tuun xihín Jesús cán ña cahan Jesús saha Juan, da najácandúta ñayivi tá nacachi a ña sa naquixi va Elías.

Tá nandaja vaha Jesús in da loho ndácaan ínimá quini ini

(Mr. 9:14-29; Lc. 9:37-43)

¹⁴Ta tá sa nanuu na ta naxinu coo na nu ndúu cuahá ñayivi cán já naxinu coo in dataa ta já nacaxítí da nu Jesús. Já nacachi da já xihín á:

¹⁵—Candáhví loho ini ndó jahyi i, xitoho i jáchi xíhi yíhi da ta ndóho ndivaha ini da. Ta cuahá tañu ndícava da nu ñúhu ita á ini ticuí. ¹⁶Ta ñéhe e da nacasa i nuú na xíca tuun xihín ndó yóho joo coó nacuu ndaja vaha na da —nacachi da xihín Jesús.

¹⁷Anda já nacachi Jesús já:

—Ndáhví nahá nacuu ndó jáchi sa cuahá ndivaha quivi íin i xihín ndo ta a ñáha candeé ini ndó yehe. Cúu ndó ñayivi quini ndivaha chí co ndeé ga ini i xihín ña cája ndó. Taxi ndó taa loho jan chóho —nacachi Jesús.

¹⁸Anda já najánani Jesús rí quini ndácaan ini da loho cán. Chí naqueta rí cuahan ri ta mé hora já nandivaha da loho cán.

¹⁹Tá nandihi já nacaan jehé na xíca tuun xihín Jesús cán xihín á já nacachi na já:

—Ndávaha coó nacuu caja nde tavá nde ínima quini nasandacaan ini da loho jan —nacachi na xihín Jesús.

²⁰Já nacachi Jesús já xihín ná:

—Coó nacuu caja ndó jáchi co candeé cáhnu ini ndó yehe. Mé a ndaa cáchi i xihín ndó, loho tinn ndivaha cáa in ndíqui mostaza joo ndúu dó in yíto cáhnu. Tá candeé loho ini ndó yehe viti vaxi quivi candeé chága ini ndó yehe. Anda jáví cuu caja ndó in ñáha ihvi ndivaha tátuhun ña cuu cachi ndó xihín in yúcu ña ná caxoo a ta chí caxoo ndusa ña. Tóco ndihi ñáha cuu caja ndó tá ná candeé ini ndó yehe. ²¹Joo tá cúni ndó tavá ndó ínima quini tátuhun rí yóho xíní ñúhú cajuhun ndó ta caca tahví ndó nu Ndióxi —cáchi Jesús xihín ná.

Tá cáxi tūhun tucu Jesús ña quivi a

(Mr. 9:30-32; Lc. 9:43-45)

²²Ta ndaja coo xíca tútú ndihi na xíca tuun xihín Jesús cán cuahan na xihín á chí estado Galilea. Ta já nandicaní Jesús nuú na cán ña tandaa quivi ndiquiahva ñayivi mé á ndáha na cahní ñahá, mé a nachindahá Ndióxi nduu ñayivi. ²³Ta nacachi a xihín ná ña tá sa ná yaha uní quivi já nditacu tucu a. Tá nacachi Jesús ña yóho xihín na xíca tuun xihín á cán já nacacuéha ndivaha ini na.

Tá nachehvi Jesús jiuhún impuesto cuénta veñuhu cáhnu ñuu Jerusalén

²⁴Tá naxinu coo Jesús ñuu Capernaum xihín na xíca tuun xihín á já naxinu coo na jácata jiuhún impuesto cuénta veñuhu nu Pedro. Já nacachi na já xihín dá:

—Á co cháhvi toho Jesús, da jánaña ndohó jan jiuhún impuesto cuénta veñuhu ñuu Jerusalén —nacachi na xihín Pedro.

²⁵Anda já nacachi Pedro já:

—Cháhvi a ña —ñacachi da.

Anda já nandihvi Pedro ini vehe nu ndácaan Jesús joo jihna ñúhú nandicahan Jesús xihín dá já ñacachi a já:

—Ndía cáhvi inún, Simón. Yo já ndítahan nuu cháhvi jiuhún cuénta impuesto nuú na sáhndá chuun ñuyíví yóho. Á na ñuu mé ná á na ñuu tóho —ñacachi Jesús.

²⁶Já ñacachi Pedro já:

—Na tóho va sá cháhvi jiuhún cája na —ñacachi Pedro.

Já ñacachi tucu Jesús já:

—Sahá ña cán queá mé na ñuu co cháhvi toho na. ²⁷Joo mí co cúni yo ña ná ndicuítá na xohó sahá ña cán queá cuhún tañuhú. Ta mé cán tavún tiyacá. Ta rí nu cuítí ná tavún jan candehún yúhu rí jáchi jan nditáhún in jiuhún caa. Ta cañehe a cuhún chahvún saha mún ta saha mí i jáchi queta va —ñacachi Jesús xihín Pedro.

Ndícani Jesús ndá na cúu na iin chága saha

(Mr. 9:33-37; Lc. 9:46-48)

18 Mé tañu jánacayati na xíca tuun xihín Jesús nu á já ñacasáhá ndáca tuhún ñahá na já ñacachi na já xihín á:

—Yo já cacuu da cáhnu chága tá ná tandaa quívi cacomí Ndióxi cuénta sahá ñayivi —ñacachi na xihín Jesús.

²Anda já nacana Jesús in da loho já nasacandichi a da mahnú java na cán. ³Já ñacachi a já:

—Mé a ndaa ná cahan i xihín ndo ña ndítahan ndaja núu ndó mé ndó ta nduu ndó tátuhun na valí já cuu cacomí Ndióxi cuénta saha ndo. ⁴Na cúni cacuu na cáhnu chága tá cacomí Ndióxi cuénta sahá ñayivi ndítahan nduu na tátuhun in na coó saha ta já nduu na tátuhun taa loho yóho. ⁵Ta ndá na ná ndiquehe in aloho tátuhun da yóho sahá ña cúni na yehe, na cán cúu na ndiquehe ri na yehe viti.

Tá jándacava ñayivi inga na nuú cuachi

(Mr. 9:42-48; Lc. 17:1-2)

⁶Ta ndá na ná jándacava in na ndahví, na cándéé ini yehe nuú cuachi janda vaha chága ná candico in yuú yojó jico ná ta ná ndihi sahá na cahá tañuhú. ⁷Ndahví nahá nacuu ñayivi ñuyíví yóho jáchi mé a ndaa iin cuahá ndivaha ña núu ñuyíví yóho. Ña cán queá ndácava cuahá ñayivi nuú cuachi joo ndahví nahá nacuu na jándacava inga na nuú cuachi.

⁸Sahá ña cán queá tá ndaha ndo á saha ndo jándacava ndohó nuú cuachi, chituhun ndó a ta jácana xíca ndó ña ná cuhún a. Jáchi vaha chága ná cuhún réncó ndó á lundu ndó indiví a juú ga ña ná cuhún ní yiquí cuñu

ndó indayá nū cáyī ñúhu ita anda ama cáa quiví. ⁹Ta tá nduchú núú ndo jándacava ndohó nuú cuachi, tavá ndó ña ta jácana xíca ndó ña ná cūhun a. Jáchi vaha chága ná cūhun ndó indiví xihín in túhún nduchú núú ndo a juú ga ña ná cūhun ndó xihín ndíví nduchú núú ndo indayá nū cáyī ñúhu ita.

Tá sácú Jesús quiahva sahá in ndicachi, rí nandiñúhú

(Lc. 15:3-7)

¹⁰Coto a quéhe núu ndó ni in na cúu cuéntá mí i jáchi cáchí i xihín ndó ña tátó Ndióxi, mé na ndáa na cán níí tiempo ndíta na nū Ndióxi, tátá i indiví. ¹¹Jáchi yehe, da nachindahá Ndióxi nduu ñayivi naquixi i jácacu u ñayivi, na cája cuachi.

¹²Cuni johó ndó ná cahān i xihín ndo: Tá cómí in dataa in ciento ndicachi ta tá ndiñúhú in rí já quéa ña cája da quéa jándacoo da comí jico sahūn comí rí cán yúcu ta já quee da cūhun da ndinducú da mé rí nandiñúhú cán. ¹³Ta tá ndiñehe dá rí cajii chága ini da sahā rí nandiñúhú cán a juú ga sahā comí jico sahūn comí rí sa ndúu nū dá cán. ¹⁴Ta quiahva já ndoho ri Ndióxi, tátá i jáchi co cúni mé á ña ná ndihi sahā ni in na cándéé ini mé á.

Ndítahan caja cáhnu iní sahā ñani táhan í

(Lc. 17:3)

¹⁵Tá cája quini ñani táhan ndó xihín ndo já quéa tavá xóo ndó da ta cahān ndó xihín dá ña ná ndicuni da ña a váha toho cája da. Ta tá ná tahví ini da sahā cuachi cája da já quéa sa nandiquehe táhan maní tucu ndó xihín dá. ¹⁶Joo tá co cúni da cuni johó da nū cahān ndo já quéa ndítahan nū ndó cana ndó in á ivi chága ñani táhan ndó já ná cacuu na testigo sahā ña cahān ndo. ¹⁷Ta tá co cúni da cuni johó da nū cahān na cán xihín dá já quéa ndítahan cūhun ndó nū tóco ndihi na cúu cuéntá Jesús táca veñuhu. Ta tá co cúni da cuni johó da nū cahān ndihi na cán xihín dá já quéa ndítahan caja ndó xihín dá tá quiahva cája ndó xihín in da tóho, da co cándúsa Ndióxi á in da jácata jihún cuéntá impuesto.

¹⁸Mé a ndaa ná cahān i xihín ndo ña tóco ndihi ñaha ná cató ndo ñuyíví yóho candico a janda indiví. Ta tóco ndihi ña ná ndaxí ndo ñuyíví yóho janda indiví ndaxí ña.

¹⁹Ta jári cahān i ña yóho xihín ndó. Tá jándique táhan tuhūn ivi ndó ñuyíví yóho ta tá mé a ndaa in cúu ndó sahā ña xíca tahví ndó nū Ndióxi, mé á iin indiví já quéa quiahva tátá i ña nū ndo. ²⁰Jáchi nū ndúu ivi á uní na ta táca na cuéntá mí i já quéa tañu na cán ndacaan i —nacachi Jesús.

Tá sácú Jesús quiahva sahá in da co cúní caja cáhnu ini da sahá inga da

²¹Ta ndaja coo nacayati Pedro ndáca tuhún da Jesús já nacachi da já:

—Xitoho i, ndaja tañu xíní ñúhú caja cáhnu ini i sahá ñani táhan i tá caja núu da xihín i. Á ndítahan nuú i caja cáhnu ini i saha dá janda usa tañu —nacachi da xihín Jesús.

²²Já nacachi Jesús já xihín dá:

—A juú janda usa tañu cuití ndítahan caja cáhnu inún sahá ñani táhún. Vaha janda comi ciento comi jíco uxu tañu ndítahan nuun caja cáhnu inún sahá ñani táhún.

²³Cáchí i ña yóho xihín ndó jáchi tá cómí Ndióxi cuéntá sahá ñayivi cúu á tátuhun ña nayaha xihín in rey tá nacasáhá da játaca da cuéntá nuú na yícá nu dá. ²⁴Mé tañu já ñéhe na in da yícá cuahá millón nu dá nacasaá na. ²⁵Ta sahá ña coó nacuu chahvi da ña yícá da sahá ña cán quea nasahnda rey chuun ña ná jicó na mé dá xihín ñájíhí da xihín jahyi válí da ta janda ñaha da viti ña ná cuu ndiquehe rey cán cuéntá da. ²⁶Anda já nacaxítí da yícá cán nu mé rey já nacasáhá xíca tahví da já cáchí da já: “Caja ndó ñamani, xitoho i candati too chága ndó yehe, ndáhvi i, já chahvi ndihi i ña yícá i nu ndo”, nacachi da xíca tahví da nu rey cán. ²⁷Anda já nacandáhvi ini rey cán da ta nacaja cáhnu ini a saha tóco ndihi ña yícá da já najaní a da cuahan da.

²⁸Ta tá naqueta da yícá cán cuahan da já nandique táhan da xihín inga da cúu mozo. Ta mé mozo cán yícá da loho va nuú da cán. Ta já nacasáhá da ndáca yihí da cuéntá nuú da cúu mozo jácuahnú ñahá da. Já cáchí da já: “Chahvún ña yícún nuú i”, cáchí da cán. ²⁹Anda já nandacava xítí mé da cúu mozo cán nu dá já nacasáhá xíca tahví da nu dá já cáchí da já xihín dá: “Cajún ñamani candati too chágún yehe, ndáhvi i, já chahvi ndihi i ña yícá i nuun”, nacachi da cúu mozo cán. ³⁰Joo coó naxeen da ta ña nacaja da quea nasahan da nachicaan da da cúu mozo cán vecaa janda quiahva ná cuu chahvi ndihi da ña yícá da nu dá. ³¹Ta tá naxini java ga na cúu mozo cán ña yóho já nandihíhvi ndivaha ini na ta chí ndáva na nasahan na nacaxi tuhun na nu mé rey cán ndaja cáa ña nacuu. ³²Anda já xójo ndivaha ini mé rey cán chí nacana da da nasayicá cán já nacachi da já xihín dá: “Mozo quini ndivaha cúu yóhó. Cuahá ndivaha jiahún nasayicún nuú i joo nacaja cáhnu ini i saha tóco ndihi a jáchi naxíca tahvún nuú i. ³³Quiahva já ndítahan ri nu yóhó va caja cáhnu inún sahá ña yícá ñani táhún nuun jáchi já nacaja i xuhun”, nacachi rey cán. ³⁴Ta sahá ña xójo ndivaha ini mé rey cán xihín dá sahá ña cán quea nandiquiahva da da yícá cán ndáha na jácaxáhan ñahá cán janda quiahva ná chahvi da saha tóco ndihi ña yícá da —cáchí Jesús.

³⁵Já nacachi tucu Jesús já:

—Quiahva já caja ri Ndióxi, tátá i, mé a iin indiví xihín ndóhó va tá cō cāja cáhnu ini ndó sahá ñani táhan ndó xihín ndinuhu ini ndó —cáchi Jesús.

Jánaḥa Jesús nuú na sa natandaha ña cō ndítahan jándacoo táhan na

(Mr. 10:1-12; Lc. 16:18)

19 Tánandihi nacachi Jesús ña yóho já naquee a estado Galilea já naxinu cōo a estado Judea, ña iin inga xoo yuta Jordán cán. ²Ta a juú quiahva cuahá ñayivi nandico jatá ta nandaja vaha mé á na quíhvi.

³Joo ndaja cōo java na fariseo nacayati na nu Jesús sahá ña coto ndojó ñahá na cúni na. Já nacachi na já xihín á:

—Á núna nuú in dataa jándacoo da ñájíhí da sahá ndá ña nacuu —nacachi na fariseo cán.

⁴Anda já nacachi Jesús já:

—Á a ñaha cahvi ndó tūhun Ndióxi nu cáchi a ña janda mé sahá tá nacavaha Ndióxi ñayivi nu cuítí já nacavaha dataa ta nacavaha ñáñáha.

⁵Ta nacachi tucu a ña ndítahan nuú dataa jándacoo da tátá da xihín náná da já ndique táhan da xihín ñájíhí da. Já xinu ndíví na cán cacuu na tátūhun in víxí yiquí cuñu na. ⁶Sahá ña cán quéa cō cúú ga na ivi yiquí cuñu sahá ña nanduu na tátūhun in túhún yiquí cuñu na. Sahá ña cán quéa cō ndítahan nuú da cán janí táhan da ña najácatáhan Ndióxi tá natandaha ná —nacachi Jesús.

⁷Anda já nandaca tūhún tucu na cán Jesús já nacachi na já:

—Joo já cachi ndó xihín nde: ndá cuéntá quéa nasahnda ri Moisés chuun ña cuu cavaha in dataa in tutu quiahva da nu ñájíhí da ta xihín ña cán cuu jándacoo da ña —nacachi na cán xihín Jesús.

⁸Já nacachi Jesús já:

—Sahá ña táhyí ndivaha ínima ndo sahá ña cán quéa sahan Moisés ñamaní nu ndó ña cuu cavaha ndó tutu quiahva ndó nu ñájíhí ndo ña ná jándacoo ndó ña. Joo tá nacavaha Ndióxi ñayivi nu cuítí cōo nacacúni toho a cōo ña yóho. ⁹Cuni johó ndó ná cahan i xihín ndo. Tá ná jándacoo in dataa ñájíhí da ta cō cúú á sahá ña nacaja ña cuachi xihín inga taa ta tá tándaha dá xihín inga ña já quéa cāja da cuachi nu Ndióxi. Ta quiahva já iin ri cuachi da ná tandaha xihín ña nacandoo cán —cáchi Jesús.

¹⁰Tá naxini johó na xíca tuun xihín Jesús cán ña yóho já nacachi na já:

—Tá ta quiahva já cáa janda vaha chága ná a tándahá ñayivi, dá já —nacachi na cán.

¹¹Já nacachi Jesús já:

—A juú ndihi ñayivi canda*a* ini ña cáhan i yóho. Ndinuhu na ndínuna xíní túní cája Ndióxi, na cán cúu na cánda*a* ini ña yóho. ¹²Ndúu java dataa ta a cuú tandaha da jáchi já nacacu da ta já taa cúu mé va da. Ta java da a cuú tandaha da jáchi já nacaja ñayivi xihín ná ta já taa cúu mé va na. Ta java da a tándaha da jáchi cúni da ndiquiahva níi da mé dá nu Ndióxi ña ná cacomí a cuénta saha dá. Ta ndá ndó, na ndínuna xíní túní, canda*a* ini ndó ña yóho —nacachi Jesús.

Cája y*i* Jesús na valí

(Mr. 10:13-16; Lc. 18:15-17)

¹³Tá nandihí já ñéhe na java na valí nacasa*a* na nu Jesús ña ná chinúu a ndahá a jini ná ta já caca tahví a nu Ndióxi saha ná. Joo ndaja coo na xíca tuun xihín á cán nacasáhá na cája cuehe na xihín na ndáca na valí cán.

¹⁴Já nacachi Jesús xihín na xíca tuun xihín á cán já:

—Quiahva ndó ñamani ná quixi na valí nuú i ta a cáji nuu ndó nu ná jáchi cacomí Ndióxi cuénta saha ñayivi tá ná caja na tá quiahva cája na valí yóho —nacachi Jesús.

¹⁵Tá nandihí já nacinúu Jesús ndáha á jini na valí cán. Anda já naquee a cuahan.

Ndítuhún in da cuicá xihín Jesús

(Mr. 10:17-31; Lc. 18:18-30)

¹⁶Ta ndaja coo naxinu in dataa nu iin Jesús ta nandaca tuhún ñahá da já nacachi da já:

—Maestro, mé ndó cúu ndó taa vaha ña cán quea ndáca tuhún i ndohó ndia ndítahan caja i já ná ñehe táhvi i cuhun i indiví coo i anda ama cáa quivi —nacachi da xihín Jesús.

¹⁷Já nacachi Jesús já xihín dá:

—Ndá cuénta quea cáchún xihín i ña cúu u da vaha. Ni in tuhún toho ñayivi co cúu ná na vaha ñuyiví yóho. In tuhún Ndióxi cuití va quea vaha. Tá cúnun catacún nu iin mé á já quea xíní ñúhú cajún ña sáhdá tuhún Ndióxi —nacachi Jesús xihín dá.

¹⁸Já nacachi da cán já:

—Ndá cúu mé ña ndítahan caja i —nacachi da.

Já nacachi Jesús já xihín dá:

—Coto a cáhnún ndii. Coto a cóun xihín ñájíhí á yí ñani táhún. Coto a cája cuíhnún. Coto a cáhun ña tuhún saha ñayivi. ¹⁹Ndítahan caja cáchún tátún xihín nánún. Ta ndítahan quihvi inún ñani táhún tá quiahva quihvi inún mún —nacachi Jesús.

²⁰Já nacachi da yúta cán já xihín á:

—Janda taa loho nasacuu u nacasáhá i cajú i tóco ndihi ña sáhdá Ndióxi cajú i. Ndía cúu ga ndítahan cajú i —nacachi da.

²¹Já nacachi Jesús já xihín dá:

—Tá ta cúnun cacuún in taa ndacú nu Ndióxi cuáhán jicún tóco ndihi ñahún jan ta ndacahndún jiuhún jan nuú na ndahví já ñehe táhvun coo cuahá ñahún indiví. Ta tá nandihí já quisún candicún yehe —nacachi Jesús.

²²Tá naxini johó da yúta cán ña yóho já naquee cuéha ndivaha da cuahan da jáchi da cuicá ndivaha cúu dá.

²³Anda já nacachi Jesús xihín na xíca tuun xihín á cán já:

—Mé a ndaa ná cachi i xihín ndó ña ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná.

²⁴Jáchi janda cama chága cuu yaha in camello ini in yávi sahá yítucú a juú ga ña ná ndiquiahva in da cuicá mé dá ndáha Ndióxi ña ná cacomí a cuéntá saha dá —nacachi a.

²⁵Tá naxini johó na xíca tuun xihín Jesús cán ña yóho já nacatóntó ndivaha na ta nandaca tuhún táhan na já cáchi na já:

—Ndá na cúu na cuu cacu ndaa ínima, dá já —cáchi na.

²⁶Nandicoto nihni Jesús nu ná já nacachi a já xihín ná:

—Ni in na a cúu cajú ña yóho joo Ndióxi quéa cuu cajú ña jáchi ni in ñaha co íhvi toho nu Ndióxi —nacachi Jesús.

²⁷Anda já nacachi Pedro já:

—Joo ndehe, najándacoo ndihi nde ñaha nasacomí nde ta ndíco nde ndohó. Ndía ñehe táhvi nde cajú ndó —nacachi Pedro xihín Jesús.

²⁸Anda já nacachi Jesús já xihín dá:

—Mé a ndaa ná cachi i xihín ndo. Tá ná tandaa quivi nduu saá tóco ndihi ñaha já cacoo yehe, da nachindahá Ndióxi nduu ñayivi nuú ndicáhnú ndivaha i. Ta cán cacoo ri ndóhó, na naxíca tuun xihín i nuú uxu ivi táyi vaha. Ta cán cajú ví ndó sahá ndíhuxu ivi táhdá na naquixi chichi Israel.

²⁹Ta ndá na najándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi na sahá yehe, na cán cúu na ñehe ná cuahá chága ví ñaha. Ta jatá ña cán ñehe táhvi ná catacu na nu Ndióxi anda ama cáa quivi. ³⁰Ta ndúu cuahá na íin saha ñuyívi yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyívi yóho viti joo vaxi quivi cacuu na na íin saha nu Ndióxi —nacachi Jesús.

Sácú Jesús quiahva sahá java da sáhdá uva

20 Jánacachi Jesús já sácú a quiahva:

—Nuú cacomí Ndióxi cuéntá sahá ñayivi cúu á tátuhun ña yóho: Íin in dataa naha chá naquee da cuahan da nducú da mozo cajú chún da

cahnda da uva nu ñúhu dá. ²Ta ñacandoo da chahvi da in jiuhún caa naní denario in quivi. Ta já ñachindahá da mé mozo cán cuahan da caja chúun da nu ñúhu dá. ³Tá ñandihi já ñaquee tucu da xihín ñaha ñúhu cán tátuhun caa in naha já ñanditahan da java da ndúu núná uun nuú yahvi. ⁴Já ñacachi mé da xihín ñaha ñúhu cán já: “Cuáhán ri ndóhó va cahnda ndó uva nu ñúhu i ta já chahvi i ndohó tá quiahva ndítahan nu ndó quehe ndó”, ñacachi da. Já ñaquee mozo cán cuahan da jáquee da nu ñúhu dá. ⁵Ta tá ñacuu caxivi já ñaqueta tucu da xihín ñaha ñúhu cán cuahan da ta natiin da java ga da caja chúun xihín dá. Ta tá ñacuu caa uni natiin chága da da jáquee nu ñúhu dá. ⁶Ta tá ñacuu tátuhun caa uhun sahini ñaqueta tucu da ta nuú yahvi cán ñaxini chága da da ndúu núná uun. Já ñacachi da já xihín da ndúu cán: “Ndá cuéntá quea sa ñacuu ndiví yaa ndúu ndó yóho”, ñacachi da xihín da ndúu cán. ⁷Ta ñanducú ñehe da cán tuhun já cáchí da já: “Co cája chúun nde jáchí coo ña quíxi ndúcú nde caja chúun nde”, ñacachi da cán. Anda já ñacachi da xihín ñaha ñúhu cán já: “Cuáhán ri ndóhó va cahnda ndó uva nu ñúhu i. Ta já chahvi i ndohó tá quiahva ndítahan nu ndó quehe ndó”, ñacachi da.

⁸Ta tá sa ñacuaá já ñacachi da xihín ñaha ñúhu cán xihín da cómí chuun nu mozo cán ña ná cana da da cúu mozo cán já ná quehe yahvi da sahá chuun ñacaja da. Ta da ñaquihvi ñacaja chúun nu ndíhí cán, da cán cúu da jihna ñúhú ná quehe yahvi. Tá ñandihi cán ná quehe yahvi da ñaquihvi nu cuítí. ⁹Anda já ñacasaa da ñaquihvi caja chúun caa uhun sahini já ñaquehe in in da cán in denario. ¹⁰Ta ndaja coo tá ñacani a nuú da ñaquihvi caja chúun janda naha cán quehe yahvi da já quea ñacahán da ña cuaha chága jiuhún ndiquehe da nuú da ñaquihvi caa uhun sahini cán. Joo quiahva já in denario ñaquehe ri in in da cán. ¹¹Sahá ña cán quea ñacasáhá da cáhan cuachí da xihín da xihín ñaha ñúhu cán. ¹²Já ñacachi da já: “Da ñandai cuu caja chúun nu ndíhí cuítí yóho in hora cuití ñacaja chúun da. Ta tá quiahva ñachahvi ndó ndehe, da ñacaja chúun ndiví yaa nu ndítahyí quiahva já ñachahvi ri ndó nuú da cáa va”, ñacachi da cáhan cuachí da cán. ¹³Anda já ñacachi da xihín ñaha ñúhu cán xihín in táhan mozo cán já: “Candehé, amigo. Co cája quini toho i xuhun. Á a juú in denario ñacandoo i chahvi i nuun. ¹⁴Júhun ña ndítahan quehún ta cuanúhun. Jáchí cúní chahvi i nuú da ñacaja chúun in hora cuití va tá quiahva ñacandoo i chahvi i nu yóhó. ¹⁵Jáchí núná nuú i caja i ña cúní mí i xihín jiuhún i. Ta co ndítahan cahihvi inún sahá ña vaha ini i”, ñacachi da xihín ñaha ñúhu cán xihín da cáhan cuachí cán —ñacachi Jesús sácú a quiahva.

¹⁶Ta ñacachi tucu a já:

—Sahá ña cán quéa ndúu cuahá na íin saha ñuyíví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyíví yóho viti joo vaxi quivi cacuu na na íin saha nu Ndióxi —ñacachi a.

Cáxi tūhun tucu Jesús ña quivi a

(Mr. 10:32-34; Lc. 18:31-34)

¹⁷Ta tá sa ñaquee tucu Jesús cuahan chí Jerusalén já íchi cán ñatavá xóo a ndíhuxu ivi na xíca tuun xihin á cán já ñacachi a já xihin ná:

¹⁸—Candehé ndo. Yóho ndáa í cuahan yó chí Jerusalén nuú ndiquiahva na yehe, da ñachindahá Ndióxi nduu ñayivi ndahá na sacuahá nuú jutū xihin nuú na jánahá ley Moisés. Ta na cán cúu na cacu ini sahá ndaja quivi i. ¹⁹Anda já ndiquiahva na yehe ndahá na tóho ña ná cuacu ndaa na yehe. Ta caní na yehe ta já cata caa na yehe ndica crúxu joo tá ná yaha uní quivi já nditacu tucu u —ñacachi Jesús.

Tá ñaxica náná Jacobo xihin Juan ñamaní nuú Jesús

(Mr. 10:35-45)

²⁰Anda já ñacayati ñájíhí Zebedeo, ñá cúu náná Jacobo xihin Juan nuú Jesús. Ta ndáca ñá ndíví jahyi ñá ñacasaa ñá ñacaxítí ña nu á jáchi cúni ñá caca ñá in ñamaní nuú Jesús. ²¹Anda já ñacachi Jesús já xihin ña:

—Ndá quéa cúni ndó —ñacachi a.

Já ñacachi ñá cán já:

—Ña cúni quéa ná caja ndó ñamaní cahnda ndó chuun ña ná cacoo in in jahyi i xoo jíin ndó. In da xoo cuáha ta in da xoo íti jíin ndó indiví tá ná cacomí ndó cuéntá sahá ñayivi —ñacachi ñá cán.

²²Anda já ñacachi Jesús já xihin ña:

—Co cándaa ini ndó ña xíca ndó nuú i —ñacachi a.

Anda já ñacachi a já xihin Jacobo xihin Juan cán:

—Á cuu ndoho ini ndó tá quiahva nditahan nuú i ndoho ini i. Jáchi ña vaxi nuú i ndoho ini i cúu á tátuhun coho i in yáxi ndutá ova. Á íin tiaha ndó ndoho ini ndó tá quiahva ndítahan nuú i ndoho ini i anda quiahva ná quivi i —ñacachi Jesús xihin ndíví da cán.

—Cuu caja nde ña —ñacachi ndíví da cán xihin Jesús.

²³Anda já ñacachi tucu a já xihin dá:

—Mé a ndaa tandaa quivi coho ndó ña ova núhu in yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. Joo sahá ña xíca ndó cacoo in ndó xoo cuáha i ta in ndó xoo íti i a juú yehe cúu dá cuu quiahva i ña nu ndo. Jáchi sa ñandicaxi Ndióxi na ñehe táhvi cacoo cán —ñacachi a.

²⁴Joo ndaja coo tá naxini johó ndíhuxu chága na xíca tuun xihín Jesús cán ña yóho já nacasáhá na xójo ini na xihín ndíví da cúu ñani cán.

²⁵Anda já nacana Jesús tóco ndihi na xíca tuun xihín a cán já nacachi a já xihín ná:

— Sa xini ndó ndaja cája na sáhndá chuun nuú ñayivi ndúu ñuyíví yóho. Ña cája na quéa jácandíhi na ñayivi ta cája na tá quiahva cuni mé ná.

²⁶Joo co ndítahan coo ña cán tañu mé ndó jáchi ndá da cuni cacuu da cáhnu chága tañu ndó xini ñuhú cacuu da in da cája chúun cuéntá ndihi ndó. ²⁷Ta ndá da cuni cacuu da nu cuítí tañu ndóhó ndítahan cacuu da da cája ndíví nuú ndihi ndó. ²⁸Jáchi ni yehe, da nachindahá Ndióxi nduu ñayivi coo naquixi i ñuyíví yóho ña ná caja ndíví ñayivi nuú i. Ña naquixi i caja i quéa caja ndíví i nu ná ta ndiquiahva i mí i quivi i já ná cuu cacu ndaa ínima cuahá ñayivi ná a cühun na indayá —nacachi a.

Tá nandaja vaha Jesús ivi da cuaá

(Mr. 10:46-52; Lc. 18:35-43)

²⁹Ta tá naqueta Jesús ñuu Jericó xihín na xíca tuun xihín á cán já ndíco cuahá ndivaha ñayivi jatá cásahan na. ³⁰Ta ndaja coo yati jín íchi cán nasanduu coo ivi da cuaá ta tá naxini johó da ña yáha Jesús cuahan já nacasáhá ndíví da cáyuhú da já cáchí da já:

—Jesús, da naquixi chichi David, caja ndó ñamaní candáhví loho ini ndó ndehe —cáchí da.

³¹Anda já nacasáhá cája cuehe ñayivi xihín ndíví da cuaá cán ña ná catáji yúhu dá. Joo ví ga ví cáyuhú da já cáchí da já:

—Jesús, da naquixi chichi David, caja ndó ñamaní candáhví loho ini ndó ndehe —nacachi da.

³²Anda já nandaca ndichi Jesús já nacana ndíví da cuaá cán. Ta já nandaca tuhún a da já nacachi a já xihín dá:

—Ndía cuni ndó ña ná caja i xihín ndo —nacachi a.

³³Já nacachi ndíví da cuaá cán já:

—Candehé nde cuni nde, xitoho.

³⁴Anda já nacandáhví ini Jesús da ta nacani ndaa ndáha á nuu dá. Chí ivi láa nanuna nuú da cuaá cán ta nacasáhá da ndíco da jatá Jesús cuahan da.

Ndíhvi Jesús ñuu Jerusalén

(Mr. 11:1-11; Lc. 19:28-40; Jn. 12:12-19)

21 Ta tása ja chá xinu coo na ñuu Jerusalén já naxinu na in ñuu loho naní Betfagé yati jín yúcu naní olivo. Ta cán nasahnda Jesús chuun nuú ivi táhan da xíca tuun xihín á cán. ²Já nacachi a já xihín dá:

—Cuáhán ndó ñuu loho jan ta tá ná xinu coo ndó jan ndiñehé ndo in búrrō jíhí ndíco ndaa rí ta xihin mé rí jan cándichi inga búrrō loho. Ndaxí ndó rí ta cañehé ndó ndíví rí quixi ndó. ³Ta ndá na ná cañan xihin ndo já quéa cachi ndó xihin ná ña xíní ñúhú xitoho ndó rí joo tá ná ndihi chuun rí já nducú ñehé tucu da rí, já cachi ndó xihin ná —ñacachi Jesús xihin ndíví da cán.

⁴Tóco ndihi ña yóho nayaha já ná xinu coo nuú ña ñacahyí in da profeta já:

⁵Joho cachi ndó xihin na ñuu Jerusalén:

“Candehé ndo. Ndáhví uun cáa da cómí cuéntá saha ndó.

Vaxi da nu ndo ta canúu da jata búrrō jíhí,

jahyi in rí ndiójo, canúu da vaxi da nu ndo”, cáchí tūhun Ndióxi.

⁶Ta ndíví da xica tuun xihin Jesús cán nasahan da ñacaja da tá iin nasahnda Jesús chuun nu dá. ⁷Já ñehé da búrrō jíhí cán xihin búrrō loho, jahyi rí naxinu na nuú Jesús. Anda já ñachojó na cotó ndéé na jata rí ta nandaa Jesús jata rí. ⁸Ta mé cuahá ñayivi ndúu cán ñacasáhá na chinduu na cotó ndéé na íchi mé nuú yaha Jesús cán. Ta java na ñacasáhá na sáhná na ndahá yito ta chinduu na do íchi mé nuú yaha Jesús cūhun a.

⁹Ta ñayivi cuahan chí nuu ta jári na vaxi chí jata ñacasáhá na cáyuhú na já cáchí na já:

—Cája cáhnu í da ñaquixi chichi David yóho. Ndicáhnu nahá ná cacuu da cómí cuéntá saha yo jáchi cúu dá da vaxi yuhú nuu Ndióxi. Cáhnu ná cacuu Ndióxi —cáchí ñayivi cuahá cán cáyuhú na cāsahan na xihin á.

¹⁰Ta tá ñandihvi Jesús ñuu Jerusalén cán tóco ndihi ñayivi ñacasáhá cátóntó ndivaha na. Já cáchí xihin táhan na já:

—Ndá da cúu da yóho —cáchí xihin táhan na.

¹¹Java táhan na cán cáchí na:

—Da yóho cúu in profeta, da ñuu Nazaret cuéntá estado Galilea —cáchí xihin táhan na.

Tá ñataxí Jesús na ndúu jícó ñaha yéhé veñuhu

(Mr. 11:15-19; Lc. 19:45-48; Jn. 2:13-22)

¹²Anda já ñandihvi Jesús veñuhu cáhnu cán já ñacasáhá táxi ndihi a na ndúu jícó xihin na ndúu xéen cán. Ta ñaxícó ñehé a mesa na ndúu ndíjama jiuhún cán ta ñaxícó ñehé a táyi sácōo na ndúu jícó ndijata. ¹³Já ñacasáhá cáchí a já xihin ndihi na cán já:

—Já cáchí tūhun Ndióxi já: “Vehe mí i cacuu a vehe nuú quixi na caca tahví na nu Ndióxi”, cáchí tūhun Ndióxi. Joo ndóhó ñandai cuu ndó yóho caja cuíhná ndo nuú ñayivi —ñacachi Jesús xihin ná.

¹⁴Tá nandihí já nacayati java na cuáá xihín java na réncō nū á ini mé veñuhu cáhnu cán ta nandaja vaha mé á na. ¹⁵Joo xójo ndivaha ini na sacuahā nuú jutū xihín na jánahā ley Moisés tá naxini na ña xitúhún nacaja mé á ta tá naxini johō na ña cája cáhnu na valí cán mé á tá cáchí na já: “Cája cáhnu í da naquixi chichi David.” Sahá ña cán quēa xójo ini na ¹⁶ta já nacachi na já xihín Jesús:

—Á xini johún ña cáhan na valí yóho —nacachi na xihín Jesús.

Já nacachi Jesús já:

—Ajan, xini johō í ña cája cáhnu na Ndióxi. Á coó nahavi ndó tuhun Ndióxi nū cáchí a já:

Jandā na valí ta jandā na chíchí nacaja Ndióxi xihín ná,
ñā ná cuu caja cáhnu na mé á, cáchí tuhun Ndióxi —nacachi Jesús
xihín na cán.

¹⁷Anda já najándacoo a na já naqueta jatá ñuu cán cuahan chí ñuu Betania ta cán nahaiin a.

Tá nachicaan Jesús cháhan jata titó ñuhú

(Mr. 11:12-14, 20-26)

¹⁸Ta inga quiví itaan tá nandicó coo a cuahan chí Jerusalén já nacasáhā cuíco a cuahan. ¹⁹Ta yuhú íchi cán naxini a cándichi in titó ñuhú. Ta chí nahān sándehe a á íin cuihi nū do caxí a. Joo coó ñaha ná ndiñehe a. Ndáha uun dó cán cuití va íin. Anda já nacachi a já xihín do:

—Ni in túhún ga tañu a cána cuihi nū yóhó —nacachi a xihín do.

Chí ivi laá nahichi titó ñuhú cán. ²⁰Tá naxini na xíca tuun xihín Jesús cán ña yóho já nacatóntó na já cáchí na já:

—Ndá cuéntá quēa nahichi titó ñuhú cán ivi tuhun —nacachi na xihín Jesús.

²¹Ta nanducú ñehe Jesús tuhun nū ná já nacachi a já:

—Mé a ndaa ná cahan í xihín ndo ña tá ná candeé ini ndó yehe ta ni loho co cáhvi ivi johō ini ndó já quēa cuu caja ndó ña náhnu chága nuú ña nacaja í yóho. Ta jandā cuu cachi ndó xihín in yucu: “Caxoo ta cuáhán jáquetún mún ini tañuhú”, ta chí já ndusa coo. ²²Ta tá ná candeé ini ndó yehe nani xíca tahví ndo nū Ndióxi ta co cáhvi ivi johō ini ndó já quēa ñehe ndó ña xíca ndo nū á —nacachi Jesús.

Tá ndáca tuhún na Jesús yo sáhan ndée nū á ña jánahā mé á nuú ñayivi

(Mr. 11:27-33; Lc. 20:1-8)

²³Tá nandihí já nandihvi Jesús ini veñuhu cáhnu cán ta nani jánahā tuhun Ndióxi nuú na ndúu cán naxinu na sacuahā nuú jutū xihín na sacuahā nuú na Israel cán nū á. Já nacachi na já xihín á:

—Yo já sáhan ñamaní nuun cajún ña cájún yóho —ñacachi na.

²⁴Anda já nanducú ñehe Jesús tuhun nu ná já ñacachi a já:

—Ta ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndó yo já nasahan ñamaní nuú i caja i ña cája i yóho. ²⁵Ta viti cachi ndó xihín i yo já nachindahá Juan ña ná quixi da caja ndúta dá ñayivi. Á Ndióxi nachindahá da á ñayivi nachindahá ñahá —ñacachi Jesús ndáca tuhun a na.

Já ñacasáhá ndítuhún xihín táhan na já cáchí na já:

—Tá ná cachí ña Ndióxi quéa nachindahá Juan ta já nducú ñehe Jesús tuhun nu yo já cachi da xoho: “Ndá cuéntá quéa coó naxeen ndó candúsa ndó da, dá já”, cachi Jesús xoho. ²⁶Ta tá ná cachí ña ñayivi cúu na nachindahá Juan já yihví yo ña ndicuita ñayivi xihín yo. Jáchí tóco ndihi na cándúsa na ña naquixi Juan jáyaha da ña ñacahan Ndióxi nuú ñayivi —cáchí na ndítuhún xihín táhan na.

²⁷Sahá ña cán quéa ñacachi na já xihín Jesús:

—Co xini toho nde yo já nachindahá Juan.

Anda já ñacachi Jesús já xihín ná:

—Ta ni yehe a cáxi tuhun i nu ndo yo já nasahan ñamaní nuú i caja i ña yóho —ñacachi Jesús xihín na cán.

Sácu Jesús quiahva sahá ivi da cúu jahyi in dataa

²⁸Anda já ñacachi tucu Jesús xihín na cán já:

—Cuni johó ndó ña nayaha in tañu. Íin in dataa ta nasahiin ivi jahyi taa da. Ta nasahan da nuú in táhan da cán já ñacachi da já xihín dá: “Jahyi a, cuáhán caja chúun lohún nu ñuhú i nu cáa tó uva”, ñacachi da xihín jahyi da. ²⁹Já ñacachi jahyi da já xihín dá: “A cúhun toho i jáchí co xíca ini i cúhun i”, ñacachi da. Joo tá nandihí ñacahvi ini da ña a váha ná cuu ini da chí já ñaquee da cuahan da caja chúun da nu ñúhu tátá da. ³⁰Ta jári nasahan tátá da cáhan da xihín inga jahyi da ta quiahva já nasahnda ri da chuun nuú da cán. Ta da cán ñacachi da já xihín tátá da: “Ajan. Cúhun i”, cáchí da. Joo tá nandihí coó nasahan toho da. ³¹Ta viti cachi ndó xihín i ndá da cúu da ñacaja ña cúní tátá da —ñacachi Jesús.

Já ñacachi na cán:

—Da nu cuítí.

Anda já ñacachi tucu Jesús já:

—Mé a ndaa ná cahan i xihín ndo ña íin chága sahá na játaca jiuhún cuéntá impuesto xihín najihí xíca jii ña ná cacomí Ndióxi cuéntá saha ná a juú ga ndohó. ³²Jáchí naquixi Juan, da jácandúta ñayivi najánaha da ndohó ndaja ndítahan caja ndó ta coó naxeen ndó candúsa ndó da. Joo na játaca jiuhún cuéntá impuesto xihín najihí xíca jii ñacandúsa na ña

nacahan da. Ta vatí naxini ndó ña yóho joo coó naxeen ndó ndijama ndó ña cája ndó jáchi coó naxeen ndó candúsa ndó mé Juan.

Sácú Jesús quiahva sahá java mozo, da nacaja quini xihín xitoho da

(Mr. 12:1-12; Lc. 20:9-19)

33'Cuni johó ndó ná cacu u inga quiahva nu ndó. Nasahiin in dataa ta najándee cuaha dá tó uva nu ñúhu dá. Ta nasacu da in corra yító nu do. Ta nacavaha da in nuú cuhni mé uva cán ña cavaha vino. Ta nacavaha da in nu jícó canúu da já cuu candaa da tóco ndihi dó cán.

'Anda já nasahan ndojó da ñúhu dá nuú java na caja chúun na ña. Ta já naquee da cuahan xicá da. 34'Ta tá naxinu tiempo jáquee na já nachindahá da java mozo da ña ná cuhun na nuú na ndúu cája chúun ñúhu da cán ña ná ndiquiahva na nu dá ña cáni nu dá ndiquehe da saha ñúhu dá ña nasahan ndojó da nuú na cán. 35'Joo ndaja coo na cája chúun nu ñúhu cán natiin na in táhan da cúu mozo da cán ta nacani na da. Ta inga táhan da cán nasahní na. Ta inga táhan da cán nandicuíta ñee na xihín yuu. 36'Joo mé da xihín ñaha ñúhu cán nachindahá cuaha chága da mozo da nasahan da nu ñúhu dá. Ta tá quiahva nacaja na xihín mé java mozo nasahan nu cuítí cán quiahva já nacaja ri na xihín tóco ndihi mozo cán.

37'Tá nandihí já nasacu ini da xihín ñaha ñúhu cán chindahá da jahyi da jáchi nacahan da: “Cája i cuéntá coo toní ñúhú na xihín jahyi i”, nacahan da xihín ñaha ñúhu cán. 38'Joo tá naxini na cája chúun ndojó ñúhu cán ña vaxi da cúu jahyi da xihín ñaha ñúhu cán já nacachi xihín táhan na já: “Candehé ndó. Yóho vaxi da cúu jahyi xitoho í. Ta tá ná xinu quivi quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mí”, nacachi xihín táhan na cán. 39'Ña cán quéa natiin na da ta natavá na da janda yuhú cútu ta cán nasahní na da —nacachi Jesús sácú a quiahva.

40'Anda já nandaca tuhún Jesús na ndúu cán já nacachi a já:

—Ndía cahní ndó caja da xihín ñaha ñúhu yóho xihín na cája chúun nu ñúhu dá —nacachi a.

41'Anda já nacachi na cán já xihín Jesús:

—Ña caja da quéa cahní da na quini, mé na nacaja chúun tóo nu ñúhu da cán. Ta já ndiquiahva ndojó da ñúhu da nuú java ga na ña ná caja chúun na nu á. Ta tá jáquee na ndiquiahva na nu dá ña cáni nu dá ndiquehe da saha ñúhu dá —nacachi na cán xihín Jesús.

42'Já nacachi Jesús já xihín na cán:

—Á a ñaha cahvi ndó tuhun Ndióxi nu cáchí a:

Mé yuu ña najácana da cávaha vehe,

ñá cán cúu ña nanduu yuu ndúhu sahá vehe ña íin chága saha.

Ña yóho quéa nacaja Ndióxi,

ta cúu á in ñaha cáhnu ndivaha nu yó, cáchí tuhun Ndióxi.

⁴³Ña cán quéa cáhan i xihín ndó ña cacu xoo Ndióxi ndohó ña ná a cácomí ga mé á cuéntá saha ndó. Ta quiahva mé á ñamaní nuú java ga ñayivi ña ná ndihvi na nuú cacomí Ndióxi cuéntá saha ná, mé na ndiquiahva na nu á ña cáni nu á ndiquehe a. ⁴⁴Ta cáchí i xihín ndó ña yehe cúu u tátuhun mé yuu cáhan i saha. Ta ndá na ná ndicava jatá yuu cán chí chachi xéhe na. Quiahva já ndihi sahá ñayivi tá co cúni na candúsa na yehe. Ta tá mé yuu cán ná yaha ndicava jatá in na já caji ndihi ñahá. Quiahva já ndihi sahá ñayivi ini indayá tá co cúni na candúsa na yehe —nacachi Jesús.

⁴⁵Tá naxini johó na cúu sacuahá nuú jutú xihín na fariseo cán ña yóho, nacandaa táhyí ini na ña saha mé ná cáhan Jesús. ⁴⁶Sahá ña cán quéa nanducú na tiin na mé á joo coó nacuú caja na sahá ña nayihví na ñayivi jáchi cándúsa ñayivi cán ña cáhan Jesús cuéntá Ndióxi.

Sácú Jesús quiahva sahá vicó tándaha

(Lc. 14:15-24)

22 Tánandihí já nacasahá tucu Jesús jánaha ñayivi xihín ndinuhu quiahva. Já cáchí a já xihín ná:

²—Nuú cacomí Ndióxi cuéntá sahá ñayivi cúu á tátuhun ña nayaha xihín in rey tá nacavaha da in víco ña tandaha jahyi ta da. ³Nachindahá da mozo da ña ná cuhun da cana da na ndítahan quixi. Joo coó naxeen na quixi na mé víco. ⁴Anda já nachindahá chága da mozo da ña ná caxi tuhun da nuú na ndítahan quixi cán ña sa nacaja ndíví da ña cuxu na. Sa naxihí tindiquí xihín java ga quíti, rí nandaha. Sa nacandíví ndihi ñaha cuéntá víco tándaha sahá ña cán quéa ná quixi na. Ña yóho cúu chuun natahnda nu mozo cán cachi da xihín na ndítahan quixi cán. ⁵Joo co ndaa na cán cuhun na. In táhan da cán naquee da cuahan da candehé da nu núhu dá. Ta inga da naquee da cuahan da caja ndahví da. ⁶Ta java ga na cán natiin na mozo mé rey cán ta nacaja xíxi na xihín dá janda quiahva nasahní ñahá na. ⁷Anda já naxojo ndivaha ini rey cán sahá ña cán quéa nachindahá da soldado da ña ná cuhun na cahní na na nasahní ndíi cán ta ná chicaan núhu dá nuu na. ⁸Anda já nacachi tucu rey cán já xihín java ga mozo da: “Sa nacandíví tóco ndihi ñaha ña coo víco joo na nacana i cán coó saha toho na quixi na víco. ⁹Ña cán quéa cuahán ndó ndijáá cáyé náhnu ta ndá ñayivi nacuú cana ndó na ná quixi na víco tándaha yóho”, nacachi rey cán nasahnda da chuun nu mozo da. ¹⁰Anda já naquee mozo da nasahan na ndijáá cáyé ta ndaja cáa mé ñayivi najátaca na. Ñayivi vaha xihín na quini viti nataca nacaja na. Ta já najácutú na vehe nuú coo víco tándaha cán xihín ñayivi.

¹¹Anda já nandihvi rey nu ñúhu na cán já naxini da ndácaan in dataa, da co ndíxi jáhma ña ndíxi na ndúu víco tándaha. ¹²Ta nacayati mé rey nu dá já nacachi da já xihín dá: “Amigo, ndaja nacajún naquihvún yóho tá co ndíxi tohún jáhma ña ndíxi na ndúu víco tándaha”, nacachi rey xihín da cán. Joo coó nanducú ñehe da tuhun nu rey. ¹³Anda já nasahnda rey chuun nu mozo da. Já nacachi da já xihín ná: “Cató ndó ndáha dá xihín saha dá. Ta jácana ndó da chí jata nuú naá yávi. Cán cuacu ndivaha da anda quiahva cahña nuhu da”, cáchí da. ¹⁴Jáchí cuahá ndivaha cúu ná nacana Ndióxi ña ná cacomí a cuéntá saha joo chá cúu ná ndiquiahva na ndáha mé á ña ná cuu caxi a na —nacachi Jesús.

Ndáca tuhún na Jesús á ndítahan nu ná chahvi na jiuhún cuéntá impuesto
(Mr. 12:13-17; Lc. 20:20-26)

¹⁵Tá nandihi já naquee na fariseo nasahan na jándique táhan na tuhun na ndaja caja na coto ndojó na Jesús xihín tuhun cáhan mé á já ná cuu jácojo na cuachi jata. ¹⁶Ña cán quéa nachindahá na java na cuéntá mé ná xihín java na cuéntá Herodes nuú Jesús já nacachi na já xihín á:

—Maestro, xini nde ña ndinuhu ña ndaa cáhan mé ndó. Ta cándaa ini nde ña jánahá ndó ña ndaa saha íchí cuéntá Ndióxi. Ta co quéhe ndó cuéntá tá cáhan núu ñayivi saha ndo. Ta cándaa ini nde ña tá cáhan ndó sahá in ñaha cája ñayivi cúu á sahá ña sándehe ndó janda ínima ná. ¹⁷Sahá ña cán quéa cuni nde candaa ini nde ndía cachi ndó sahá ña yóho: Á ndítahan nuú nde chahvi nde jiuhún cuéntá impuesto nuú da cómí cuéntá sahá ñuu Roma. Á chahvi nde ña á a cháhvi toho nde ña —nacachi na cán xihín Jesús.

¹⁸Joo sa nacandaa ini Jesús ña cáhvi núu ini na sahá ña cán quéa nacachi a já xihín ná:

—Co cúu ndó tá quiahva ndaa ndó jáchí cuni ndó coto ndojó cuití ndó yehe. ¹⁹Jánahá ndó in táhan jiuhún ña cháhvi ndó impuesto jan nuú i —nacachi Jesús.

Anda já nasahan na in jiuhún caa naní denario nu á. ²⁰Tá naxini Jesús ña yóho já nacachi a já xihín ná:

—Yo nahná ta yo quiví quéa ndaa nu á —nacachi a.

²¹Já nacachi na cán já xihín á:

—Ñehe a nahná xihín quiví da cómí cuéntá sahá ñuu Roma —nacachi na.

Anda já nacachi tucu Jesús já:

—Ndiquiahva ndó ña cúu ñaha da cómí cuéntá sahá ñuu Roma jan nu dá. Ta ndiquiahva ndó ña cúu ñaha Ndióxi nu á —nacachi a.

22Tá naxini johó nā cán ñā yóho já nacatóntó nā ta najándacoo na a naquee na cuahan nā.

Tá ndáca tuhun nā Saduceo Jesús á mé a ndaa nditacu ndii

(Mr. 12:18-27; Lc. 20:27-40)

23Ta sa mé quivi já nasahan java nā saduceo cahan nā xihín Jesús. Ta mé nā saduceo yóho có cándusa na ñā nditacu tucu nā sa naxihi. Sahá ñā cán quea nandaca tuhún nā Jesús já cáchí nā já xihín á:

24—Maestro, nū ley nacahyí Moisés sanahá natahnda chuun ta cáchí a já: “Tá tándaha in dataa xihín ñájíhí da ta tá xihí da ta cóo jahyi da cácu já quea ndítahan nuú ñani da tandaha dá xihín ñā cuáan nacandoo cán. Ta já ná coo jahyi da cán xihín yuhú nuú ñani da”, cáchí ley Moisés. 25Ta viti cuni johó ndó ná cacu nde in quiahva nū ndó. Tañu mé nde yóho nasanduu usa ñani. Ta da nū cuítí cán natandaha dá xihín in ñáñáha. Tá nandihi já naxihi da. Joo sahá ñā cóo jahyi da nacacu xihín ñájíhí da sahá ñā cán quea nandiquehe ñani da, da chí ivi jata dá ñā cuáan cán. 26Ta quiahva já nandoho ri da chí ivi cán jáchí naxihi da ta cóo jahyi da nacacu xihín ñā. Ta janda ndíhusa ñani cán natandaha xihín ñā ta ndíhusa da naxihi ta ni in da cóo nacacu jahyi xihín ñā. 27Ta tá nū ndíhí naxihi ri ñáñáha cán va. 28Ta viti cachi ndó xihín nde tá ná xinu quiví nditacu tucu ndii, ndá da cacuu ndusa yí ñā cán jáchí ndíhusa ñani cán natandaha xihín ñā ñuyiví yóho —nacachi nā saduceo cán xihín Jesús.

29Anda já nacachi Jesús já:

—A váha toho cáhán ndo jáchí có xini ndó ndaja cáhan tuhun Ndióxi ta ni có xini ndó ndá quiahva cáhnu cúu ndee Ndióxi. 30Jáchí mé quivi tá ná nditacu tucu ndii a tándaha ga ná ta ni a quiahva na jahyi jíhí nā tandaha ná. Cacuu na tátuhun táto Ndióxi ndúu indiví ta có tándaha nā cán. 31Joo sa xini yo ñā nditacu tucu ndii. Á a ñáha cahvi ndó tuhun Ndióxi nū cáchí a já: 32“Yehe cúu Ndióxi ñā cája cáhnu Abraham ta yehe cúu Ndióxi ñā cája cáhnu Isaac ta yehe cúu Ndióxi ñā cája cáhnu Jacob viti”, nacachi a. Ta ñā yóho cúni cachi a ñā tácu yii va Abraham xihín Isaac xihín Jacob vatí sa naxihi yiquí cuñu na —nacachi Jesús.

33Tá naxini johó ñayivi ndúu cán ñā yóho já nacatóntó nā xihín ñā jánaha Jesús nū ná.

Tá cáhan Jesús ndá ley quea cáhnu chága

(Mr. 12:28-34)

34Tá ñañehé nā fariseo tuhun ñā naquee vaha Jesús nasahnu a nuú na saduceo já nanditútú ndihi na. 35Ta in táhan mé da cán, da jánaha ley

Moisés nandaca tühún da Jesús jáchi cúní da coto ndojó da mé á. Já nacachi da já:

³⁶—Maestro, ndía cúú ña cáhnu chága sáhndá ley Moisés caja í —nacachi da cán xihín Jesús.

³⁷Já nacachi Jesús já xihín dá:

—Ña cáhnu chága nū ley Moisés cúú ña yóho: “Ndítahan quihví ini ndó Ndióxi, xitoho ndó xihín tóco ndihi ínimā ndó ta xihín ndinuhu ini ndó ta xihín tóco ndihi xíní túní ndo.” ³⁸Ña yóho cúú ley nū cuítí ta cúú á ña cáhnu chága nū tóco ndihi ley. ³⁹Ta tá quiahva íin ña nū cuítí yóho quiahva já íin ri ña chí iví va ta cáchí a já: “Xíní ñúhú quihví ini ndó ñani táhan ndó tá quiahva quíhvi ini ndó mé ndó.” ⁴⁰Ta jata ndíví ña yóho tíin tóco ndihi ley Moisés xihín ña najánaha na profeta sanahá —nacachi Jesús xihín na fariseo cán.

Ndáca tühún na Jesús ndáchí naquixi a

(Mr. 12:35-37; Lc. 20:41-44)

⁴¹Ta nani nanditútú ndihi na fariseo ndúu na nū Jesús cán já nandaca tühún a na. ⁴²Já nacachi a já xihín ná:

—Ndía cáhvi ini ndó saha Cristo. Ndá chichi cáhán ndo vaxi a —nacachi Jesús xihín ná.

Já nacachi na cán já:

—Vaxi a chichi David, da nasacuu rey sanahá —nacachi na cán xihín Jesús.

⁴³Anda já nacachi tucu Jesús já xihín ná:

—Tá ta mé a ndaa vaxi Cristo chichi David ndá cuéntá quéa nacachi da ña cúú á xitoho da. Jáchi nāchutú ndaa ínimā David xihín ínimā yíi Ndióxi tá nāahyí da já:

⁴⁴Já nacachi Ndióxi xihín xitoho i:

“Cacoo xoo cuáha i yóho

janda quiahva ná caja i ña ná cacomún cuéntá sahá na co cúní yohó”, nacachi Ndióxi, nacachi David.

⁴⁵Ndávaha cáchí na ña vaxi Cristo chichi David tá ta sa mé David nacachi da ña cúú á xitoho da —nacachi Jesús.

⁴⁶Ta chí ni in na coo nacuu caja nducú ñehe na tühun nū á. Ta janda mé quívi já ni in ga na coo nasahan ndeé ini ndaca tühún chága na mé á.

Chícaan Jesús cuachi jata na fariseo xihín jata na jánaha ley Moisés

(Mr. 12:38-40; Lc. 11:37-54; 20:45-47)

23 Anda já nacachi Jesús já xihín tóco ndihi ñayivi ta xihín na xíca tuun xihín á cán já:

2—Na jánaha ley xihín na fariseo cúú ná na ndítahan nuu ndicani na ña cúní cachi ley Moisés. 3Ña cán quea xíní ñúhú caja ndó tóco ndihi ña jánaha na nu ndo. Joo a cája toho ndó tá quiahva cája mé ná jáchi co cája na ña jánaha mé va na. 4Jáchi cája na ña ná coo ihvi ndivaha ley janda quiahva co ndeé ini ñayivi cája na ña. Joo mé ná ni loho tীন co chindeé ñahá na. 5Ta cája na tóco ndihi ñaha ña ná cuni ñayivi na jáchi cátóo na candico listoni náhnu jiní ná xihín jico ndáha ná nu ndáa tuhun Ndióxi. Ta cátóo na coo lándá chága yuhú jáhma ná a juú ga java ga ñayivi. 6Ta tá cuahan na víco cátóo na coo na nuú vaha cuití va. Ta tá quíhvi na veñuhu cátóo na cacoo na nu sácoo na íin chága saha. 7Ta cátóo na ña ná cahan toní ñúhú ndivaha ñayivi xihín ná tá xíca nuu na nuú yahvi. Ta chí a juú quiahva cátóo na ña ná cachi ñayivi 'maestro' xihín ná.

8Joo ndóhó co ndítahan nu ndó nducú ndó ña ná cahan ñayivi 'maestro' xihín ndo. Jáchi in ñani cúú ndihi ndó ta in túhún cúú maestro ndo, mé á cúú Cristo. 9Ta a cahan ndo tátá cáhnu xihín ni in ñayivi ñuyiví yóho jáchi in túhún Ndióxi cúú á tátá ndo ta mé á íin a indiví. 10Ta a ndúcú ndo ña ná cahan ñayivi 'jefe' xihín ndó jáchi in túhún laá va cúú jefe ndo, mé a cúú Cristo. 11Ndá da cúú da cáhnu chága tañu ndó xíní ñúhú da cája chúun da sahá ndihi ndó. 12Jáchi ndá na ndíñehe jícó mé, jánuu ndáha Ndióxi na. Joo ndá na jánuu ndáha mé nu Ndióxi, jándíñehe jícó mé á na.

13Ndáhví nacuu ndó, na jánaha ley Moisés xihín na fariseo jáchi co cúú ndó tá quiahva ndáa ndó. Jáchi sájí nuu ndó nuú ñayivi já ná a cuú cacomí Ndióxi cuéntá saha ná. Ta ni ndóhó co ndíquiahva ndó mé ndó ndáha Ndióxi ná cacomí a cuéntá saha ndo. Ta cája ndó ña ná a cúu candaa ini ñayivi ndaja caja na ndiquiahva na mé ná ndáha Ndióxi. 14Ndáhví nahá nacuu ndó, na jánaha ley Moisés xihín na fariseo jáchi co cúú ndó tá quiahva ndáa ndó. Jáchi cándaa ndó vehe najihí cuáan ta tá nandihí cuahá ndivaha xíca tahví ndo nu Ndióxi jáchi cúní ndó jájahvi ndó nuú ña núu cája ndó. Sahá ña cán quea cáchí i xihín ndó ña ndóhó cacuu ndó na ndoho chága ini, caja Ndióxi.

15Ndáhví nahá nacuu ndó, na jánaha ley Moisés xihín na fariseo jáchi co cúú ndó tá quiahva ndáa ndó. Jáchi a juú quiahva xíca nuu ndó ndúcú ndo in tálaá ñayivi ña ná candico na ña jánaha ndo. Ta tá sa nandaja ndó na cuéntá mé ndó já cája chága na cuachi janda cáni a nu ná ndoho chága ini na indayá a juú ga mé ndó.

16Ndáhví nahá nacuu ndó jáchi cúú ndó tátuhun na cuaá ndáca inga na cuaá. Jáchi jánaha ndó ñayivi ña tá sáhan na tuhun na nuú inga ñayivi nani tává na quiví veñuhu cáhnu já quea co ndúsa jáxinu coo na tuhun na. Joo cáchí ndo ña tá tává na quiví jiuhun cuáan ndácaan veñuhu cáhnu já quea ndúsa jáxinu coo na tuhun na, já cáchí ndo. 17Joo tóntó ndivaha ndó

ta cúú ndó tátuhun na cuaá viti. Jáchí cō cándaā ini ndó ña íin chága sahá veñuhu cáhnu a juú ga sahá jiuhun cuaán jáchí mé jiuhun cuaán cúú á cuéntá Ndióxi sahá ña ndácaan ini veñuhu cáhnu ña cúú cuéntá mé á. ¹⁸Ta inga tucu ña jánaha ndó nuú ñayivi cúú ña yóho: Tá sáhan in na tuhun na nuú ñayivi nani tává na quivi nu náa Ndióxi já quéa cō ndúsa jáxinu cōo na tuhun na. Joo cáchí ndó ña tá tává ñayivi quivi ña sájoco na cánúu nu náa cán já quéa ndúsa jáxinu cōo na tuhun na, já cáchí ndó. ¹⁹Joo tóntó ndivaha ndó ta cúú ndó tátuhun na cuaá. Jáchí íin chága sahá nu náa cán a juú ga sahá ña sájoco na cánúu nu náa jáchí ña sájoco na cán cúú á cuéntá Ndióxi sahá ña cánúu a nu náa cuéntá mé á. ²⁰Sahá ña cán quéa ndá na tává quivi nu náa já quéa tává ndihi ri na quivi tóco ndihi ña sájoco na cánúu nu náa cán. ²¹Ta ndá na tává quivi veñuhu cáhnu já quéa tává ri na quivi Ndióxi jáchí cán íin mé á. ²²Ta ndá na tává quivi indivi já quéa tává ri na quivi Ndióxi xihín quivi nu sácoo a sáhndá a chuun.

²³Ndáhvi nahá nacuu ndó, na jánaha ley Moisés xihín na fariseo jáchí cō cúú ndó tá quiahva ndáa ndó. Mé ndó cávaha ndó uxu táhndá ña jáquee ndó ñundáhyi ndó ta sáhan ndó in táhndá ña nu Ndióxi. Já cája ndó anda yucu válí ña támi sáhan tátuhun menta xihín anís xihín comino. Joo cō cája ndó ña íin chága sahá ña sáhndá ley Moisés. Jáchí cō cája ndó ña ndaa ta cō cándahví ini ndó ñayivi ta cō cándeé ini ndó Ndióxi tá quiahva sáhndá ley caja ndó. Mé a ndaa xíní ñúhú cája ndó tóco ndihi ña yóho joo a jándacoo ndó ña jóco ndó nu Ndióxi in táhndá nuú uxu táhndá ña ñéhe ndó. ²⁴Mé ndó cúú ndó tátuhun na cuaá ndáca inga na cuaá. Jáchí ndinuhu ini ndó cája ndó ña coó cuahá sahá cuéntá ley Moisés joo sácú xoo ndó ña íin chága sahá nu Ndióxi caja ndó. Cúú ndó tátuhun in da ndíhi ini da tavá da in ndicama loho ndácaan tásá da ná a cócó da ri. Joo cō íhvi toho nu dá cócó da in camello.

²⁵Ndáhvi nahá nacuu ndó, na jánaha ley Moisés xihín na fariseo jáchí cō cúú ndó tá quiahva ndáa ndó. Jáchí ndíhi ini ndó caja ndó costumbre ña ndícata ndó jata vaso xihín jata cōho joo ña ñúhu ini a cán najátaca cuíhná ndó sahá ña ndiáva ndivaha ini ndó ña núu. ²⁶Ndáhvi nahá nacuu ndó, na fariseo jáchí cúú ndó tátuhun na cuaá. Ña ndítahan caja ndó nu cuítí quéa ndaja víi ndó ínima ndó já cacuu ndó tátuhun in vaso á in cōho sa nandicata vaha na jáchí nandivií ini a xihín jata viti.

²⁷Ndáhvi nahá nacuu ndó, na jánaha ley Moisés xihín na fariseo jáchí cō cúú ndó tá quiahva ndáa ndó. Cúú ndó tátuhun vehe válí ndíta camasanto nu táan na ndii. Ndató jándicuchu na jata joo chí ini a a juú quiahva quini sáhan jáchí ndinuhu lásá ndii ñúhu ini a. ²⁸Quiahva já cúú mé ndó jáchí ndáa ndó tátuhun ñayivi vaha ndivaha. Joo mé a ndaa cō cúú ndó tá quiahva ndáa ndó jáchí ndinuhu ña núu ndácaan ínima ndó.

29Ndáhví nahá nacuu ndó, na jánahá ley Moisés xihín na fariseo jáchi co cúu ndó tá quiahva ndaa ndó. Cávaha ndó vehe válí ndíta camasanto nuú cañuhu lása na nasacuu profeta sanahá ta jácacutú ndó nuú nanduxu na nacaja ndaa. 30Ta cáchí ndo já: “Ta tá nasanduu nde tiempo nasanduu tásáhnú jícó yo sanahá ta chí a chindeé toho nde na nasahní profeta, na nasanduu sanahá”, cáchí ndo. 31Ta xihín ña yóho náha táhyí a ña naquixi ndó chichi na nasahní profeta sanahá. 32Cuáhán ndo jáxinu coo ndó mé cuachi nacasáhá cája tásáhnú jícó ndo sanahá.

33Mé ndó cúu ndó tátuhun coo jáchi cája ndó tá quiahva cája coo. A cuú cacu ndaa ínimá ndó ta chí tandaa quivi cuhun ndó indayá nu ndoho ndivaha ini ndó. 34Sahá ña cán queá yehe chindahá i java profeta nu ndo xihín java na ndichí xihín java na jánahá tuhun Ndióxi nu ndo. Joo java na cahní ndó na ta java na cata caa ndó na ndica crúxu ta java na caní ndó na ini veñuhu ta java na taxi ndó na tá ñuu tá ñuu. 35Ña cán queá cacá Ndióxi cuéntá nu ndó saha tóco ndihi ñayivi ndaa, na nasahní ndo sanahá. Cacá mé á cuéntá saha Abel, da nasacuu da ndaa janda quiahva naxinu coo a nuú cacá mé á cuéntá saha Zacarías, da nasacuu jahyi Berequías. Mé da yóho nasahní ndó ini veñuhu tañu nu náa xihín nuú yíi ndivaha. 36Mé a ndaa ná cahan i xihín ndo ña cacá Ndióxi cuéntá saha tóco ndihi ndii jan nuú ñayivi ndúu tiempo viti.

Tá sácu Jesús sahá ñayivi ndúu ñuu Jerusalén

(Lc. 13:34-35)

37Ndáhví nahá nacuu ndó, na ndúu ñuu Jerusalén. Jáchi sáhní ndó na profeta. Ta ndicuita ndó cáni ndó na xihín yuu na nachindahá Ndióxi nu ndó. Cuahá ndivaha tañu cúní jándataca ndihi i ndohó joo coo naxeen ndó cuni johó ndó. Cúu á tá quiahva cája nduxú tá játaca rí jahyi válí rí tixi ndixi rí. 38Ta viti cuni johó ndó ña cahan i xihín ndo. Vaxi quivi tá janí ndáha mé vehe ndó candoo a. 39Ta mé a ndaa ná cahan i xihín ndó ña a cúní ga ndó yehe janda quiahva ná xinu coo quivi cachi ndó: “Cáhnú nahá ná cacuu da vaxi cuéntá Ndióxi, xitoho í”, cachi ndó —nacachi Jesús xihín na cán.

Cáxi tuhun Jesús ña vaxi quiví ndihi sahá veñuhu cáhnú ndácaan ñuu Jerusalén

(Mr. 13:1-2; Lc. 21:5-6)

24 Ta tása naquee Jesús veñuhu cáhnú Jerusalén cán cuahan já nacativi na xíca tuun xihín á nu á ta nacasáhá na cahan na xihín á ndá quiahva cáa veñuhu cán. 2Joo nanducú ñehe Jesús tuhun nu ná já nacachi a já:

—Mé a ndaa ná cahan i xihín ndo ña janda ni in yuu yóho a cándoo jatá inga yuu jáchi vaxi quiví tá nditaní ndihi ña yóho —nacachi Jesús xihín na xíca tuun xihín á cán.

Ña coo tá sa nacayati quiví ndihi saha ñuyiví

(Mr. 13:3-23; Lc. 21:7-24; 17:22-24)

³Anda já naquee Jesús cuahan chí yúcu nū cáa yitó olivo xihín na xíca tuun xihín á. Ta nani ndúu na cán nacativí na xíca tuun xihín á nū íin coo a cán já nacasáhá ndáca tuhún xóo na a já nacachi na já xihín á:

—Cúni nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá ná xinu coo quiví quixi tucu ndó ñuyiví yóho. Ta ndaja coo tá ná ndihi saha ñuyiví —nacachi na xihín Jesús.

⁴Já nacachi Jesús já:

—Cuénta coo ndó ná a jándahvi ni in na ndohó. ⁵Jáchi cuahá ndivaha na quixi na cuénta mí i ta cahan na ña tuhún tá cachi na já xihín ndo: “Yehe cúu Cristo, da nachindahá Ndióxi cacomí cuénta sahá ñayivi”, cachi na. Ta xihín ña yóho cuahá ndivaha ñayivi jándahvi na. ⁶Ta jandá johó ñehe ndó tuhun ña ndicuítá ñayivi caní táhan na yóho á cáa. Joo a cáyihvi toho ndó jáchi já ndítahan coo. Joo ña yóho coo cúni cachi a ña naxinu coo quiví nū ndíhí. ⁷Jáchi ñayivi ndúu in nación ndicuítá na caní táhan na xihín na ndúu inga nación. Ta quixi tama ta quixi cuehe ta ndaja táhan quixi a táan. ⁸Ta ña yóho cacuu a tondóhó ña casáhá jihna ñúhú vaxi nuú ñayivi jáchi cámaní xinu coo nuú ndoho chága ini na.

⁹Anda já tiin na ndohó ta ndiquiahva na ndohó ndahá na coo cúni ndohó já ná caja xíxi na xihín ndo. Ta cahní na ndohó ta tóco ndihi ñayivi ndúu ñuyiví candají na ndohó sahá yehe. ¹⁰Ta mé tañu já cuaha ná jándacoo na ña candeé ini na yehe ta ndaja táhan mé ná candají táhan na ta ndaja mé ná jicó túhún táhan na. ¹¹Ta quixi cuahá ndivaha na tuhún ta cachi na cúu ná profeta cuénta Ndióxi joo jándahvi na cuahá ndivaha ñayivi. ¹²Ta sahá ña ndicuahá ndivaha ña núu ñuyiví yóho sahá ña cán quea jándacoo cuahá ñayivi ña quíhvi ini táhan na. ¹³Joo ndá na ná candico tuun íchi mí i janda ná xinu quiví quivi na, na cán cacuu na cacu ndaa ínima. ¹⁴Ta níí cúu ñuyiví ndicuítá nuu tuhun vaha cahan sahá yehe já ná candaa ini ñayivi ndá quiahva cacomí Ndióxi cuénta saha ná. Anda jáví ndihi saha ñuyiví.

¹⁵Na cáhvi tutu ná candaa ini na ña cahan. Sanahá nacahyí profeta Daniel sahá in ña quini ña játiví ñahá. Tá ná cuni ndó ña xinu coo ña yóho nuú yíi cuénta Ndióxi ¹⁶já quea ndá na ndúu estado Judea xíní ñúhú cunu na cuhun na chí yúcu. ¹⁷Ta ndá na cándójó jini véhe, coo ndítahan nuu na tavá na ndá ñaha vehe na. ¹⁸Ta ndá na ndúu yúcu, ná a ndícó coo na vehe na ndiquehe na jáhma ná. ¹⁹Ndáhvi nacuu najihí, na ñúhu jahyi mé quiví

já. Ta ndáhví nacuu najihí na néhe ndaa na valí táhan ña chíchí yíi. ²⁰Caca tahví ndo nu Ndióxi ña ná a cácuu a tiempo vixi tá ná cunu ndó cūhun ndo. Ta caca tahví ndo nu á ña ná a cácuu a quiví ndíquehe ndée ná.

²¹Jáchí quiví ndoho ndivaha ini ñayivi cacuu a cán. Jáchí janda tá nacava sáhá saha ñuyíví coó nandoho ini na tá quiahva ndoho ini na mé quiví já. Ta tá ná yaha ña jan, a ndícó coo ga ña ndoho ini na quiahva já. ²²Ta tá ná a ndája cuítí Ndióxi tiempo cán ni in ñayivi a cúu cacu ndaa. Joo sahá na sa nacaxi mé á sahá na cán ndaja cuítí mé á tiempo cán.

²³Ta tá ná cachi in na xihín ndó: “Candehé ndo. Yóho íin Cristo, da nachindahá Ndióxi cacomí a cuéntá sahá ñayivi.” Á tá ná cachi na: “Candehé ndo. Caa íin da”, cachi na, já quea a cándúsa toho ndó na.

²⁴Jáchí quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuahá ná ta cachi na cahan na cuéntá Ndióxi ta jári caja na cuahá ndivaha ña náhnú xihín ña xitúhún ña ná jándahvi na ñayivi. Ta janda na sa nacaxi Ndióxi jándahvi na tá ná cuu caja na ña. ²⁵Candehé ndo jáchí sa nacaxi tuhun yachí ndihi i ña yóho xihín ndo. ²⁶Ña cán quea tá ná cachi na xihín ndo: “Candehé ndo. Yucú íchí caa íin Cristo.” Já quea a cūhun ndó jan. Á tá ná cachi na xihín ndo: “Candehé ndo. Ini vehe yóho ndácaan da cúu Cristo.” A cándúsa ndó na. ²⁷Jáchí tá quiahva yehe tása quéta xoo nu cána candii ta xójo cava indiví quiahva já queta yehe, da nachindahá Ndióxi nduu ñayivi. ²⁸Mé nu candúhu yiquí cuñu ndii cán cacuu nuú ndicutú tiyocó canduu rí.

Ndá quiahva coo tá ná quixi tucu Jesucristo

(Mr. 13:24-37; Lc. 21:25-33; 17:26-30, 34-36)

²⁹Ta ivi laá tá jacá nayaha quiví ndoho nahá ini na cán já canaa nuú candii ta ni a ndíyehe ga yoo ta janda indiví quee quimi cuyu rí nu ñūhu ta janda indiví ña nacavaha Ndióxi ndiquiji nuu. ³⁰Anda já ndaca náha ña xitúhún indiví já candaa ini ñayivi ña vaxi yehe, da nachindahá Ndióxi nduu ñayivi. Ta ndaja táhan ñayivi ndúu ní cúu sahá ñuyíví ndahyi cóhó na ta já cuni na yehe quixi i tañu vico indiví xihín tóco ndihi ndeé e ta cuni na ndá quiahva cáhnú cúu yehe. ³¹Ta já chindahá i táto mí i ña ná tiví cóhó na trompeta já ná nditaca tóco ndihi na nacaxi i tañu tóco ndihi ñuu janda ní cúu saha ñuyíví ta janda ní cúu sahá indiví.

³²Jácuaha ndó ña cúní cachi mé quiahva sácú u nu ndó sahá yító tító ñuhú. Jáchí tá yúta ndáha dó cán ta já vaxi núma valí do já candaa ini ndó ña sa nacayati tiempo ihní. ³³Quiahva já cuu candaa ini ndó ña tá ná cuni ndó ña sa cúu tóco ndihi ña nacaxi i xihín ndo yóho já cuu candaa cáxí ini ndó ña sa nacayati tiempo quixi tucu yehe ñuyíví yóho. ³⁴Mé a ndaa ná cahan i xihín ndo ña yaha tóco ndihi ña yóho ta anda jáví quivi na ndúu

tiempo viti. ³⁵Ta ndihi saha indivi xihín ñuyiví joo a ndíhi toho sahá tuhun nacahan i xihin ndo yóho jáchi coo tá coo tá quiahva nacachi i yóho.

³⁶Joo ni in túhún toho ñayivi co xini na ndá quivi á ndá hora yaha ña yóho. Ni mé tátō Ndióxi ndúu indivi co xini na ndá quivi coo ña yóho. Ta ni yehe, da cúu in túhún jini já jahyi Ndióxi co xini ndá quivi coo ña yóho. In túhún Ndióxi, tátá i quéa xini a. ³⁷Tá quiahva nayaha tiempo tá nasahjin Noé sanahá quiahva já yaha ri tá ná tandaa quivi quixi tucu yehe, da nachindahá Ndióxi nduu ñayivi. ³⁸Jáchi mé tiempo cán tá cámaní cuun javi quini cán já cáxixi ñayivi ta cáxihi na ta tándaha ná ndúu na janda quiahva naquihvi Noé ini barco cáhnu cán. ³⁹Ta coó naquehe na cuéntá janda quiahva naxinu coo javi quini cán ta najánaa dó sahá ndihi na. Quiahva já a quéhe na cuéntá saha ndá quivi quixi yehe, da nachindahá Ndióxi nduu ñayivi. ⁴⁰Mé tiempo já canduu ivi dataa xutu da ta in da ndindita cuhun xihín i ta inga da candoo va. ⁴¹Ta canduu ivi najihí ndíco na ta in ña ndindita cuhun xihín i ta inga ña candoo va.

⁴²Xini ñúhú coo tiahva vaha ndó jáchi co xini ndó ndá quivi quixi tucu xitoho ndó. ⁴³Xini ñúhú candaa vaha ini ndó ña tá xini in dataa ndá hora cuni quihvi taa cuihná vehe da já quéa a cúu toho da jáchi candaa vaha da vehe da já ná a quihvi da cuihná vehe da. ⁴⁴Sahá ña cán quéa ndítahan canduu tiahva ri ndóhó va. Jáchi xinu coo yehe, da nachindahá Ndióxi nduu ñayivi mé hora tá co cáhán ndo xinu coo i nu ndo.

Dá cája chúun vaha ta da co cája chúun vaha

(Lc. 12:41-48)

⁴⁵Mé ndó ndítahan nu ndó cacuu ndó tátuhun in da ndíchí jini, da cája chúun vaha nuú xitoho da. Ta najándacoo xitoho da chuun ndáha dá ña ná quiahva da cuxu na java ga cúu mozo xihín da cán. Anda já naquee xitoho da cuahan da. ⁴⁶Tahví nacuu mé mozo cán tá xinu coo xitoho da ta ndítahan da cája chuun yii va da ña nacandoo nu dá caja da. ⁴⁷Mé a ndaa ná cahan i xihin ndo ña quiahva xitoho da cán chuun nu dá ña ná cacomí da cuéntá saha tóco ndihi ñaha cómí xitoho da. ⁴⁸Joo tá casáhá da cája núu da ta cáhán da ña cayáncá ndivaha xitoho da ndicó coo da. ⁴⁹Ta sahá ña cán quéa casáhá da cája xíxi da xihín java ga na cúu mozo xihín dá. Ta já cáa ga da casáhá xíxi da ta xíhi da ta já xini da. ⁵⁰Ta ndaja coo xinu coo xitoho mozo cán mé quivi co cáhán da ña xinu coo da. ⁵¹Anda javi jándoho quini xitoho da cán ini da jáchi co cúu dá tá quiahva cáa da. Ta ndítahan ndoho da tá quiahva ndoho tóco ndihi na cája já mé nuú cuacu ndivaha na janda quiahva cáhñá nuhu ná —nacachi Jesús.

Sácú Jesús quiahva sahá ña nacaja uxu najihí, na tacú

25 Já cáchí tucu Jesús já —Tá ná xinu coo quiví cacomí Ndióxi cuéntá sahá ñayivi já cacuu a tá quiahva nayaha xihín uxu najihí, na tacú tá nasahan na vicó tándaha. Tá naquehe na candil ña ñúhu sítí ini já cuahan na ndique táhan na xihín da tándaha cán. ²Uhun táhan na tacú cán cúú ná na tácu ini ta uhun na cán cúú ná na co tácu toho ini. ³Ndíhuhun na co tácu ini cán natiin na candil ñaha na cuahan na joo coo naquehe chága na sítí ña jácutú tucu na candil tá sa cúní ndahva ña. ⁴Joo na tácu ini cán ñéhe na candil ñaha na ta ñéhe ri na yúyú sítí cuahan na ña jácutú na candil tá sa cúní ndahva ña. ⁵Ta ndaja coo nacasáhá cáyáncá mé da tándaha cán sahá ña cán quéa nanaá ini ndihi na ta naquiji va na. ⁶Joo tá nacuu yati java ñuú já tácu cáyuhú java na já cáchí na já: “Candehé ndo. Sa vaxi da tándaha. Cuáhán queta ndó ndiquehe ndó da”, cáchí na cáyuhú na cán. ⁷Já nandacoo tóco ndihi na tacú cán ta nacasáhá na cája ndíví na candil ñaha na. ⁸Anda já nacasáhá ndíhuhun na co tácu ini cán cáhan na xihín ndíhuhun na tácu ini cán já cáchí na já xihín ná: “Caja ndó ñamani quiahva loho ndó sítí ndo nuú nde jáchi sa nandihí sítí nde ta jalóho cúní ndahva candil ñaha nde”, cáchí na co tácu ini cán. ⁹Já nanducú ñehe ndíhuhun na tácu ini cán tuhun nu ná já cáchí na já: “A cúu toho caja nde quiahva nde sítí nu ndó jáchi tiáhva náá ndimani dó nu mé nde. Vaha chága cuáhán mé ndó nu cáyahvi dó cueen ndó do”, nacachi na tácu ini cán xihín ná. Já naquee na co tácu toho ini cán cuahan na. ¹⁰Joo nani naquee ndíhuhun na co tácu ini cán cuahan na cueen na sítí na já naxinu da tándaha cán ta nandihvi ndíhuhun najihí tácu ini cán ini vehe nu iin vicó tándaha cán ta nandaji yéhe. ¹¹Tá nandihí já nandai cuu ndíhuhun na nasahan naxeen sítí cán já catí ndáha ná yéhe ta cáyuhú na já cáchí na já: “Cuná loho ndó yéhe nuú nde, xitoho”, cáchí na cáyuhú na ndíta na jata véhe. ¹²Anda já nanducú ñehe da tándaha cán tuhun nu ná já cáchí da já xihín ná: “Co xini toho i yo cúú ndóhó”, nacachi da cán xihín ná —nacachi Jesús.

¹³Já nacachi tucu Jesús já:

—Sahá ña cán quéa xini ñúhú cuéntá vaha coo ri ndóhó va jáchi co xini ndó ndá hora xinu coo quiví cacomí Ndióxi cuéntá saha ndo —cáchí Jesús.

Ña nacaja in taa xihín jiuhún da

(Lc. 19:11-27)

¹⁴Ta já cáchí tucu Jesús já:

—Tá ná xinu coo quiví cacomí Ndióxi cuéntá sahá ñayivi já cacuu a tátuhun ña nayaha xihín in dataa. Tá naxinu coo quiví quee da cuhun xicá

da ja nacana da java da caja chún xihín dá. Ta ja nandiquiahva da jiuhún da ndahá da cán ña ná candaa da ña. ¹⁵Ta tá quiahva tiaha in in da cañehe da jiuhún quiahva ja nasahan xitoho da nu dá. In táhan da cán nasahan xitoho da uhun mil nu dá ña ná candaa da ña. Ta inga da cán nañehe ivi mil. Ta inga da cán nañehe in mil. Anda ja naquee xitoho da cuahan xicá da. ¹⁶Ta ndaja coo da nandiquiahva xitoho uhun mil ndáha cán nacaja da ndahvi xihín jiuhún xitoho da ta ja nañehe dá inga uhun mil chága jatá. ¹⁷Ta jári da nasahan xitoho ivi mil nu cán nacaja da ndahvi xihín jiuhún cán ta nañehe dá inga ivi mil jatá. ¹⁸Joo da nasahan xitoho in mil nu cán natiin da jiuhún xitoho da ta ja nasahan da nacaan da in yávi ta ja najánduxu da ña.

¹⁹Ta tá sa nayaha cuaha tiempo ja nandicó coo xitoho mozo cán. Ta ja nacasáha cája vii da cuénta xihín da cán. ²⁰Ta ja naxinu da nañehe uhun mil cán nuú xitoho da ta ja nandiquiahva da inga uhun mil ña nañehe dá jatá jiuhún cán nuú xitoho da. Ta ja cáchi da ja xihín xitoho da: “Candehé ndo uhun mil nasahan ndó nuú i. Joo yóho íin inga uhun mil nañehé e jatá”, nacachi da xihín xitoho da. ²¹Anda ja nacachi xitoho da ja xihín dá: “Vaha ndivaha nacajún. Mozo vaha ndivaha cúu yóhó jáchi chá va nasahan i nuun ta vaha nacaja chún ña. Sahá ña cán quea caja i ña ná cacomún cuénta sahá cuaha chága ñaha. Ta viti cuu coún xihín i ta ja ná cajii chága inún”, nacachi xitoho da. ²²Tá nandihi ja naxinu coo ri da nandiquehe ivi mil cán nuú xitoho da. Já nacachi da ja xihín xitoho da: “Ivi mil nasahan ndó nuú i joo yóho íin inga ivi mil nañehé e jatá”, nacachi da xihín xitoho da. ²³Anda ja nacachi xitoho da ja xihín dá: “Vaha ndivaha nacajún. Mozo vaha cúu yóhó jáchi chá va nasahan i nuun ta nacaja chún vahún ña. Sahá ña cán quea caja i ña ná cacomún cuénta sahá cuaha chága ñaha. Ta viti cuu coún xihín i ta ja ná cajii chága inún”, nacachi xitoho da. ²⁴Joo tá naxinu coo ri da nañehe in mil ndahá xitoho cán ja nacasáha cáchi da ja xihín xitoho da: “Candehé ndo, xitoho i. Sa cándaa vaha ini i ña cúu ndó in taa ndacú ndivaha tuhun. Ta vatí co xútu ndó nuú in núhu joo jáquee tá jáquee ndó nu á. Ta jataca ndó ña nuú coó naxutu ndó ña. ²⁵Sahá ña cán quea nayihví vi ta nasahan i najánduxu u jiuhún nasahan ndó nuú i tixi núhu. Joo yóho íin jiuhún ndo ndiquehe ndó ña”, nacachi da cán xihín xitoho da. ²⁶Anda ja nacachi xitoho da ja xihín dá: “Co cúun in mozo vaha nuú i. Cúun da júsá ndivaha. Sa cándaa vaha inún ña jáquee e nu núhu ña co xútu u, ²⁷ña cán quea ndá cuénta quea coó nasahan tóun jiuhún i banco ja ná ndiquehe e jiqui á nuú na cán tá ná ndicó coo i, nduu”, nacachi xitoho da cán xihín dá. ²⁸Anda ja nacachi da xihín java na ndúu cán: “Candaa ndó in mil jan ndahá da jan ta quiahva ndó ña nuú da sa cómi uxu mil jan. ²⁹Jáchi da cája chún vaha ñehe chága ví da ñaha ja

quéa ná coo cuahá chága nu dá. Joo da co cája chúun vaha janda ña chá cómí da ndindaa ndáha dá. ³⁰Ta mozo a váha toho jan tiin ndó da jácana ndó da nuú naá jata véhe jan. Cán cúu nu ndáhyi ndaá ñayivi janda quiahva cáhñá nuhu ná sahá ña ndóho ndivaha ini na”, nacachi xitoho da, —nacachi Jesús.

Tá ná cavií sahá ñayivi nu Ndióxi

³¹Já nacachi tucu Jesús já:

—Tá ná xinu quiví quixi yehe, da nachindahá Ndióxi nduu ñayivi ta quixi i xihin tóco ndihi na cúu tátó Ndióxi. Anda já cacoo i nu sácoo na sáhdá chuun ta já ndicáhu ndivaha i. ³²Ta nditaca ñayivi ndúu ndíjää ñuyiví nuú i. Ta já casáhá i ndicahnda java táhan i na tá quiahva cája in da ndaá ndicachi tá sáhdá java da ndicachi xihin tijúhu ña ná a cáva táhan rí. ³³Ta já chinduu u ñayivi cuéntá mí i, na cúu tátuhun ndicachi cán xoo cuáha i. Ta xoo íti i chinduu u na co cúu cuéntá mí i, na cúu tátuhun tijúhu cán. ³⁴Ta sahá ña cúu u da cómí cuéntá sahá ñayivi sahá ña cán quéa cachi i já xihin na ndúu xoo cuáha i cán já: “Cuáyaha ndó ná cacomí Ndióxi, tátá i cuéntá saha ndo jáchi cúu ndó na nacaja cuahá mé á ñamani xihin. Jáchi janda tá cámaní cava sáhá saha ñuyiví sa nasacu tiaha mé á nuú canduu ndó ña cacomí a cuéntá saha ndo. ³⁵Jáchi nasahan ndó naxixi i tá nacuico i. Ta nasahan ndó ticuí nuú i tá nahichi ini i. Ta nandiquehe vaha ndó yehe tá nasacuu u da tóho naxinu i nu ndo. ³⁶Ta najasá ndo jáhma nuú i tá co ñéhé e ña cándixi i. Ta tá nasaquíhvi já nachindeé ndó yehe. Ta tá nasandacaan i vecaa já naxito nihni ndó yehe.” ³⁷Anda já ndaca tuhún java na nacaja vaha ta já cachi na já xihin i: “Ndá tañu quéa naxini nde ña cuíco ndó, xitoho nde ta já nasahan nde ña xíxi ndó. Ta ndá tañu naxini nde ña íchi ndó ticuí ta já nasahan nde ticuí nu ndo. ³⁸Ta ndá tañu nasacuu ndó da tóho ta nandiquehe vaha nde ndohó. Ta ndá tañu naxini nde ña cámaní jáhma candixi ndó ta najasá nde ña nu ndo. ³⁹Ta ndá tañu quéa naxini nde ña quíhvi ndo ta nachindeé nde ndohó. Ta ndá tañu nasandacaan ndó vecaa ta naxito nihni nde ndohó.” ⁴⁰Anda já cachi yehe, da cómí cuéntá sahá ñayivi já xihin ná: “Mé a ndaa ná cahan i xihin ndó ña tá nacaja ndó a xihin na cúu cuéntá mí i, na coó saha nuú ñayivi ñuyiví já cúu á tátuhun nacaja ndó a xihin mí i”, cachi i xihin na ndúu xoo cuáha i.

⁴¹Anda já casáhá cachi i já xihin na ndúu xoo íti i cán já: “Caxoo ndó nuú i jáchi cúu ndó na nacatavi cháhan ta cuhun ndó indayá cañuhu ndó anda ama cáa quiví. Jáchi ña jan cúu ña nasacu tiaha Ndióxi ndacaan tiñáhá sacuahá xihin tátó mé rí. ⁴²Jáchi coó nasahan ndó ña xíxi i tá nacuico i ta ni coó nasahan ndó ticuí nuú i coho i tá nahichi ini i. ⁴³Da

tóho cúu ɥ naxinu coo i tañu ndó ta coo nandiquehe vaha ndó yehe. Ta nandimani i ña candixi i ta coo nasahan ndó in jáhma loho nuú i. Nasaquíhvi ta nasandacaan i vecaa ta coo naxito nihni ndó yehe”, cachi i xihín na ndúu xoo íti i cán. ⁴⁴Anda já nducú ñehe ri na cán tühun nuú i já cachi na já xihín i: “Ndá tañu quea naxini nde ña cuíco ndó ta ndá tañu quea naxini nde ña íchi ini ndó ticuif ta ndá tañu nasacuu ndó da tóho ta ndá tañu nandimani jáhma ndo ta ndá tañu nasahiin quíhvi ndo ta ndá tañu nasandacaan ndó vecaa ta coo nachindee nde ndohó”, cachi na ndúu xoo íti i cán xihín i. ⁴⁵Anda já cachi i já xihín na coo cúu cuénta mí i já: “Mé a ndaa ná cahan i xihín ndo ña tá ta coo nacaja ndó xihín ñani táhan ndó, na coo saha nuú ñayivi ñuyívi já quea coo nacaja ndó ña xihín yehe”, cachi i xihín na coo cúu cuénta mí i. ⁴⁶Ta já yaha ndihi na cán cühun ná indayá anda ama cáa quivi. Ta na nacaja vaha cán yaha na nu Ndióxi catacu na anda ama cáa quivi —cáchi Jesús.

Ndítúhún jehé na tiin na Jesús

(Mr. 14:1-2; Lc. 22:1-2; Jn. 11:45-53)

26 Tánandihi nacahan Jesús tóco ndihi ña yóho xihín ñayivi cán já nacachi a xihín na xíca tuun xihín á cán já:

²—Sa cándaa ini ndó ña tixi ivi quivi coo vicó pascua ta já ndiquiahva na yehe, da nachindahá Ndióxi nduu ñayivi ndahá na cata caa yehe ndica crúxu —nacachi Jesús xihín na xíca tuun xihín á cán.

³Anda já na sacuahá nuú jutú xihín na jánahá ley Moisés xihín na sacuahá veñuhu nandique táhan na yéhe Caifás, da cúu sacuahá chága nu ndíhi jutú cán. ⁴Ta najándique táhan tühun na ndá quiahva caja na tiin jehé na Jesús ña ná cahní ñahá na. ⁵Já cáchi xihín táhan na já:

—Joo a tiin toho í da tañu mé víco jáchi tiaha náá ndivaa ñayivi —nacachi na.

Tá nachojo in ñáñáha perfume jini Jesús

(Mr. 14:3-9; Jn. 12:1-8)

⁶Ta ndaja coo íin Jesús ñuu Betania vehe Simón, da cahan na xihín: taa nandoho cuehe táhyi. ⁷Já naxinu in ñáñáha nu á ta cáñee in yúyú ña alabastro ndáha ña. Ta ini mé yúyú cán núhu perfume, dó yahvi ndivaha. Ta já naxinu ña najácuyu ná do jini Jesús nani íin coo a nu mesa cán. ⁸Tá naxini na xíca tuun xihín Jesús cán ña yóho já nacasáhá na xójo ini na já cáchi na já:

—Ndá cuénta quea tívi uun perfume yahvi ndivaha yóho. ⁹Jáchi cuu jicó yó do ta já quehé cuahá jiuhún saha do, nduu ta já cuu jasá yo jiuhún cán nuú na ndahví —nacachi na cán.

¹⁰Ta na_canda_a ini Jesús ña cáhvi ini na cán ña cán quéa na_casáhá cáchí a já xihín ná:

—Ndá cuéntá quéa cája cuehe ndó xihín ñáñáha jan jáchi ña vaha quéa na_caja ñá yóho xihín i. ¹¹Jáchi na ndahví nín tiempo canduu na tañu ndó joo yehe a cóo tuun toho i xihín ndo. ¹²Jáchi tá najácuyú ñá perfume yiquí cuñu i já na_caja tiaha ñá yehe ná coo tiaha vi tá ná casa quiví nduxu. ¹³Mé a ndaa ná cahan i xihín ndo ña nín cúu ñuyiví nuú caca nuu ñayivi cahan na tuhun vaha sahá i ndicani na ña na_caja ñá yóho xihín i já ndicuhun ini na saha ña —na_cachi a.

Jicó túhún Judas Jesús

(Mr. 14:10-11; Lc. 22:3-6)

¹⁴Ta ndaja coo in táhan da uxu ivi xíca tuun xihín Jesús, da naní Judas Iscariote na_sahan da cahan da xihín na sacua_ha nuú jutú. ¹⁵Ta já cáchí da já xihín ná:

—Ndaja quiahva ndó nuú i tá ná ndiquiahva i Jesús nu ndo —na_cachi Judas xihín na sacua_ha nuú jutú cán.

Anda já na_sahan na oco uxu jiu_hun cúxú nu dá sahá Jesús. ¹⁶Ta sa mé nani já na_casáhá Judas ndúcú da ndaja cuu caja da ndiquiahva da Jesús ndáha ná.

Tá na_xijíni ndayí Jesús xihín na xíca tuun xihín á

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷Mé quiví nuú víco xíxi na pan, ña co quée yusá na_xaa xihín cán já na_xinu na xíca tuun xihín Jesús cán nu á. Já na_cachi na já xihín á:

—Ndáchí cúní ndó cuh_un nde caja ndíví nde cajíni ndó vicó pascua —na_cachi na xihín á.

¹⁸Anda já na_cachi Jesús já xihín ná:

—Cuáhán ndó ñuu jan ta jan cuni ndó in dataa ta já cachi ndó já xihín dá: “Da jána_ha ndehe cáchí xuh_un: Cuh_un i vehe ndó cajíni i vicó pascua xihín na xíca tuun xihín i jáchi sa nandindaa tiempo cuh_un i viti” —na_cachi Jesús.

¹⁹Já na_quee na cán na_sahan na na_caja na tá íin na_sahnda Jesús nu ná ta cán na_caja ndíví na ña cajíni na vicó pascua.

²⁰Ta ndaja coo tá na_cuaá já na_sacoo Jesús nu mesa xihín ndíhuxu ivi na xíca tuun xihín a cán. ²¹Ta nani xijíni na já na_casáhá cáchí a já:

—Mé a ndaa ná cahan i xihín ndó ña in táhan ndó, na xíca tuun xihín i cacuu da jicó túhún yehe —na_cachi Jesús xihín ná.

²²Anda já na_casáhá na cán cácuéha ndivaha ini na já na_casáhá tá in tá in na ndáca tuhún na Jesús já cáchí na já xihín á:

—Á yehe cacuu da jicó túhún ndo, xitoho i —cáchi na ndáca tuhún ñahá na.

²³Anda já nanducú ñehe Jesús tuhun nu ná já nacachi a já xihin ná:

—Da naquihvi ndáha ini coho xixi i, da cán cúu da jicó túhún yehe.

²⁴Yehe cúu da nachindahá Ndióxi nduu ñayivi ta ndítahan nuú i quivi i tá iin cáchi tuhun Ndióxi. Joo ndáhví nahá nacuu da jicó túhún yehe. Janda vaha chága ná a cácu da, nduu —nacachi Jesús.

²⁵Anda já nandicahan Judas, mé da jicó túhún ñahá cán já nacachi da já xihin Jesús:

—Xitoho i, á yehe cúu da jicó túhún ndo —nacachi da xihin á.

—Jivi mún cúu dá —nacachi Jesús xihin dá.

²⁶Ta nani xixi na ndúu na natiin Jesús pan já nandiquiahva ndixahvi nu Ndióxi. Tá nandihi já nasahnda java ña ta nandicahnda ña nuú na xica tuun xihin á cán. Ta já nacachi a já xihin ná:

—Júhun ndó jáchi ña yóho cúu tátuhun yiquí cuñu i —nacachi a.

²⁷Tá nandihi já natiin a in vaso nu ñúhu tó uva já nandiquiahva ndixahvi nu Ndióxi já nacachi a já xihin na xica tuun xihin á cán já:

—Coho ndihi ndó dó ñúhu ini vaso yóho. ²⁸Jáchi dó yóho cúu dó tátuhun níi i, dó cuíta sahá cuahá ñayivi já ná ndoo cuachi na. Tá ná cuíta níi i já canda ini ndó ña najáxinu coo Ndióxi tuhun a nasahan sanahá.

²⁹Mé a ndaa ná cahan i xihin ndo ña a coho ga i tó uva janda quiahva ná xinu coo quiví coho tucu u inga dó vaha chága xihin ndo tá ná xinu quiví cacomí Ndióxi, tátá i cuénta sahá ñayivi —nacachi a.

Cáxi tuhun Jesús ña chijehé tuhún Pedro ña xini da mé á

(Mr. 14:26-31; Lc. 22:31-34; Jn. 13:36-38)

³⁰Ta tá nandihi naxita na in canto já naquee na cuahan na yucu yitó olivo. ³¹Ta já nacachi Jesús já xihin ná:

—Mé ñuú viti jándacoo ndihi ndó yehe cuhun ndó sahá ña ndoho i. Já cáchi tuhun Ndióxi já: “Cahní i da ndáá ndicachi ta xihin ña yóho ndicuíta nuu ndicachi jana dá cuhun ri”, cáchi tuhun Ndióxi. ³²Joo tá sa ná nditacu tucu u já cuhun jihna ñúhú yehe estado Galilea anda já cuhun mé ndó —nacachi Jesús.

³³Anda já nanducú ñehe Pedro tuhun nu á já nacachi da já xihin á:

—Vatí ná jándacoo tóco ndihi na mé ndó sahá ña ndoho ndó joo a jándacoo toho i ndohó —nacachi da xihin á.

³⁴Anda já nacachi Jesús já xihin dá:

—Mé a ndaa ná cahan i xuhun ña mé ñuú viti tá cámaní cana chéle já chijehé tuhún ña xihun yehe uní táhnda —nacachi Jesús xihin dá.

³⁵Anda já nacachi tucu da já:

—Vatí ná quivi i xihín ndo joo a chíjehé tuhun toho i sahá ña xini i mé ndó —ñacachi da xihín Jesús.

Ta quiahva já ñacachi tóco ndihi java ga na xica tuun xihín á cán.

Tá xica tahví Jesús nu Ndióxi in nuú naní a Getsemaní

(Mr. 14:32-42; Lc. 22:39-46)

³⁶Anda já naxinu coo Jesús xihín na xica tuun xihín á cán in nuú naní a Getsemaní. Já ñacachi a já xihín ná:

—Yóho cacoo ndó nani ná cuhun i cáa caca tahví i nu Ndióxi —cáchi a.

³⁷Ta ndáca Pedro xihín ndívi da cúu jahyi Zebedeo cuahan xihín á. Ta já ñacasáhá cácuéha ndivaha ini a ta a juú quiahva táhvi ini a. ³⁸Anda já ñacachi a já:

—A juú quiahva cácuéha ini i chí quivi i cúu ini i. Yóho candati tóco ndó yehe ta coto a cúu ndo —ñacachi Jesús.

³⁹Ta já ñaquee mé á ñasahan loho chága chí nuu já ñacaxítí a janda quiahva naxinu taan nu núhu. Ta já cáchi a já:

—Tátá Ndióxi, tá ta ná cuu caja ndó ñamani ña ná a ndóho i ña ihvi ndivaha vaxi nuú i ndoho i. Joo ná coo tá íin cúní mé ndó ta ná a cóo toho ña cúní yehe —cáchi Jesús.

⁴⁰Tá nandihí já nandicó coo a nuú najándacoo a na xica tuun xihín á cán ta já nandiñehe á na quíji na ndúu na. Anda já ñacachi a já xihín Pedro:

—Á cóo ñacuu candita ndó ni in hora. ⁴¹Xíní núhú coo tiaha ndó ta caca tahví ndo nu Ndióxi já ná a cóto ndojó rí quini ndohó. Jáchí ínima ñayivi cúní a ndinducú a Ndióxi joo yiquí cuñu na co íin tiaha caja ña cúní Ndióxi —ñacachi Jesús.

⁴²Anda já ñaquee tucu Jesús táhndá ivi cuahan tucu a caca tahví a nu Ndióxi já cáchi a já:

—Tátá Ndióxi, tá ta a cúu va caja ndó ñamani ná a ndóho ini i ña jan já ná coo tá íin cúní mé ndó coo —cáchi a.

⁴³Tá nandihí já nandicó coo tucu a nu ndúu na xica tuun xihín á cán ta nandiñehe á na quíji tucu na ndúu na jáchí ñaquehe a mahnú na. ⁴⁴Já ñaquee tucu a ñasahan xica tahví a nu Ndióxi táhndá uní ta sa mé tuhun cán ñacahan tucu a. ⁴⁵Anda já ñaquixi tucu a nu ndúu na xica tuun xihín á cán já ñacachi a já xihín ná:

—Vatí cúní ndó cuju ndó ta vatí cúní ndó ndiquehe ndée ndó joo a cúu caja ndó ña viti. Jáchí sa naxinu coo hora ndiquiahva na yehe, da ñachindahá Ndióxi nduu ñayivi ndahá ñayivi cája cuachi. ⁴⁶Cuáhán ndacoo ndó ná cohó. Jáchí sa vaxi da jicó túhún yehe —cáchi a.

Tá natiin na Jesús

(Mr. 14:43-50; Lc. 22:47-53; Jn. 18:2-11)

⁴⁷Ta nani cáhan yii va Jesús já naxinu Judas, da cúu in táhan uxu ivi na xíca tuun xihín á cán. Ta ndáca da cuahá ñayivi, ñéhe na machítí xihín yító viti. Ta na cán cúu ná na naquixi cuéntá na sacuahá nuú jutu xihín cuéntá na sacuahá veñuhu. ⁴⁸Ta mé Judas, da ndiquiahva ñahá cán sa nacando da xihín na cán ña tatí yuhu dá sajóho Jesús jáchi nacachi da já xihín ná:

—Ndá da ná tatí yuhú u sajóho, da cán cúu dá tiin ndó —nacachi da.

⁴⁹Chí ivi laá nacativi da nu Jesús já nacahan Ndióxi dá xihín á ta já natatí yuhu dá sajóho mé á. ⁵⁰Anda já nacachi Jesús já xihín dá:

—Cama chá cajún ña, amigo.

Anda já nacayati na nu Jesús ta natiin tuun na a.

⁵¹Joo in táhan da xíca tuun xihín Jesús cán, natavá da machítí da ta já nachitúhun da in johó da cúu mozo nuú da sacuahá chága nu ndíhi jutu cán. ⁵²Anda já nacachi Jesús já xihín dá:

—Chicaan vaha machítí jan jáchi ndá na sáhní xihín machítí, xihín machítí quivi ri na cán va. ⁵³Á co cándaa inún ña cuu caca tahví i nu Ndióxi, tátá i ña ná chindahá mé á cuahá ndivaha táto mé á ña ná chindeé na yehe. ⁵⁴Cuu caja i ña joo xíní ñúhú yaha tá yaha ña nacahyi nuú tuhun Ndióxi ndoho i —cáchi Jesús.

⁵⁵Ta já nacachi Jesús já xihín na naxinu tiin ñahá cán:

—Cája ndó xihín i tátuhun cája na xihín taa cuihná jáchi naqueta ndó vaxi ndó tiin ndó yehe xihín machítí ta xihín yító viti. Ta ndijáá nítí quivi nasahiin i xihín ndo ini veñuhu cáhnu jána ha i tuhun Ndióxi nu ndo ta ni in tañu coo natiin ndó yehe. ⁵⁶Joo tóco ndihi ña yóho yaha ña já ná xinu coo ña nacahyi na profeta sahá i ini tuhun Ndióxi sanahá —cáchi a.

Tá nandihí já naxinu ndihi na xíca tuun xihín Jesús cán cuahan na ta najándacoo na mé á.

Tá ñéhe na Jesús cuahan na nuú nataca ndihi na sacuahá

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷Tá natiin na cán Jesús já ñéhe na a cuahan na nuú Caifás, da cúu sacuahá chága nu ndíhi jutu. Ta cán sa nanditútú na jána ha ley Moisés ndúu na xihín na sacuahá veñuhu. ⁵⁸Joo ndaja coo nasandico xíca Pedro Jesús anda quiahva naxinu da yéhe vehe da cúu sacuahá chága nu ndíhi jutu cán. Ta já nandihvi da nasacoo da nu ndúu soldado cán sándehe da ndá quéa caja na xihín Jesús.

⁵⁹Ta na sacuahā nū jutu xihín tóco ndihi na cómi cuéntá sahā na Israel natāca na cán ndúcú na cuachi jácojo na jatá Jesús já ná cuu cahní ñahā na. ⁶⁰Joo coó ñañehe ná cuachi jíquí ña cuu chinúu na jata mé á vatí naxinu coo cuahā na nācāhan ña tūhún sahā. Anda jáví naxinu coo ivi ga da cāhan ña tūhún sahā. ⁶¹Já nacachi da já:

—Naxini johō nde nacachi da jan já: “Jánditani i veñuhu cāhnu cán ta jácandichi tucu u ña tixi uní quiví”, cáchí da —nacachi na cán chícāan na cuachi jatá Jesús.

⁶²Anda já nandaca ndichi da cúu sacuahā chāga nū ndíhi jutu cán já cáchí da já xihín Jesús:

—Á chí a ndúcú ñehún tūhun nū nde sahā cuachi jácojo na jatun —nacachi da.

⁶³Joo ni in tūhun coó nanducú ñehe Jesús nū dá. Anda já nacachi da cúu sacuahā chāga nū ndíhi jutu cán já xihín á:

—Tavún quiví Ndióxi, ña tácu íin indiví ta cachún xihín nde á jivi ndusa yóhó cúun Cristo, da cúu in tūhún jini já jahyi Ndióxi, da nachindahá mé á cacomí cuéntá sahā ñayivi —nacachi da xihín Jesús.

⁶⁴Já nanducú ñehe Jesús tūhun nū dá já nacachi a já:

—Ajan, jivi yehe cúu u da cáchí ndó jan. Ta viti ná cāhan i xihín ndo ña vaxi quivi tá cuni ndó yehe, da nachindahá Ndióxi nduu ñayivi cacoo i xoo cuāha Ndióxi, mé á íin cuāha ndée. Ta já cuni ndó yehe ndicó coo i ñuyiví yóho tañu vico tá ná quixi i chí indiví —nacachi a.

⁶⁵Tá naxini johō da sacuahā chāga nū ndíhi jutu cán ña yóho já nandatá da jáhma dá ña ná candaā ini ñayivi ña xójo ini da. Ta já nacachi da já:

—Ndāja núu da yóho Ndióxi. Coó chicuu chāga yó ñayivi ná cāhan na xihín yo jáchi sa naxini johō ndihí ña nācanahá da yóho xihín Ndióxi. ⁶⁶Ta ndaja xíní ndó caja í xihín dá viti —nacachi da.

Anda já nacachi ndihi na cán já:

—Íin cuachi da jan ta ndítahan cūhun da quivi da —nacachi na cán.

⁶⁷Ta já nacasáhá na xihnu ndaa na tójií na nū á. Ta nacasáhá túxú na yiquí a. Ta java na cáni jahndá nū á. ⁶⁸Ta já cáchí na já xihín á:

—Cāhan xihín nde yo nacani yohó tá ta mé a ndaa cúun Cristo, da nachindahá Ndióxi cacomí cuéntá sahā ñayivi —cáchí na xihín á.

Tá nachijehé tūhun Pedro ña xíní da Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹Ta ndaja coo íin coo Pedro yuhú yéhe da cúu sacuahā chāga nū ndíhi jutu cán. Já nacativi in ñañáha, ña cája chúun mé vehe cán. Já nacasáhá cáchí ña já xihín dá:

—Yóhó cúun in táhan da xíca tuun xihín Jesús, da estado Galilea —nācachi ñá cán xihín dá.

⁷⁰Joo ndaja coo nāchijehé tūhun Pedro nū ndíhi na cán ña xíní da Jesús. Já cáchí da já:

—Cō xíní toho i ndá saha cáhun —nācachi da xihín ñá cán.

⁷¹Ta tá sa naqueta da yéhe cán já naxini inga ñáñáha da já nācasáhá cáchí ña já xihín tóco ndíhi na ndúu cán:

—Naxini i naxíca tuun da yóho xihín Jesús, da ñuu Nazaret cán —nācachi ñá cán.

⁷²Ta já nācasáhá tucu Pedro chíjehé tūhun da ña xíní da Jesús ta nātavá da quiví Ndióxi já cáchí da já:

—Cō xíní toho i ndá da cúu da jan —nācachi Pedro xihín na cán.

⁷³Chá va nayahá ña yóho ta nācayati java na ndúu cán nū Pedro. Já nācachi na já xihín dá:

—Mé a ndaa táhyí jivi táhan na xíca tuun xihín Jesús cúu ri yóhó va jáchi cáhun tátūhun cáhan na cán —nācachi na xihín dá.

⁷⁴Anda já nācasáhá Pedro cánahá da ta nātavá da quiví Ndióxi ña cō xíní da Jesús. Já cáchí da já:

—Cō xíní toho i ndá da cúu da jan —nācachi da.

Tá nācachi da já chí iví laá nācana chéle. ⁷⁵Anda já nādicūhun ini Pedro ña nācāhan Jesús xihín dá tá nācachi a xihín dá: “Tá cámaní cana chéle sa chíjehé tūhún ña xínun yehe uní tañu.” Anda já naqueta da jata véhe ta a juú quiahva sácu da jáchi cácuéha ndivaha ini da.

Tá nāndiquiahva na Jesús ndáha Pilato

(Mr. 15:1; Lc. 23:1-2; Jn. 18:28-32)

27 Tánatívi inga quiví itaan já nāndique táhan ndíhi na sácuaha nuú jutū xihín na sácuaha veñuhu ña nditúhún na ndá quiahva jácojo na cuachi jatá Jesús já ná cuu cahní ñahá na. ²Sahá ña cán quéa nācató na mé á ta ñéhe na a cuahan na ndiquiahva na mé á nū Pilato, da cúu gobernador ñuu cán.

Tá naxihí Judas

³Ta ndaja coo naxini Judas, da najicó túhún Jesús ña nāsacu ini na cán cahní na Jesús. Já nācāhvi ini da sahá ña núu nācaja da chí ndáva da cuahan da nducú ñehe da ndíhoco uxu jiuhun cúxú nuú na sácuaha nuú jutū xihín nuú na sácuaha veñuhu. ⁴Já nācachi da já xihín na cán:

—Cuachi cáhnu ndivaha quéa nācaja i jáchi najicó túhún i in da cōó cuachi.

Já nācachi na cán já xihín dá:

—Cō sáhní toho nde mé nde sahá ña yóho. Mún xíní ndá quéa nacajún —nacachi na cán xihín dá.

⁵Anda já nacuihna Judas jiuhún cán ini veñuhu cáhnu. Ta já naqueta da nasahan da nacata caa da mé dá já nasahní da mé dá.

⁶Ta já najátaca na sacuahā nuú jutū jiuhún cán já nacachi xihín táhan na já:

—A váha toho ña ná chicaan yó jiuhún yóho ini sato nū táan na jiuhún jóco na nū Ndióxi jáchi ndii naxihí sahá ña yóho —nacachi na.

⁷Ta tá sa nanditúhún vaha xihín táhan na já naxeen na in ñúhu xihín jiuhún cán. Mé ñúhu cán naní a ñúhu da cávaha ñaha xihín ñundáhyi. Ta ñúhu cán cacuu a nū jánduxu na na tóho. ⁸Sahá ña cán quéa nasacu na quivi ñúhu cán ña cananí a yójo nuú naxita nii. Ta já naní a janda viti. ⁹Ta xihín ña yóho naxinu coo nuú ña nacyhyí profeta Jeremías sanahá tá nacachi da já sahá Jesús: “Natiin na ndíhoco uxu jiuhun cúxú jáchi ña jan nasacuu yahvi nasacu na Israel chahvi na saha dá. ¹⁰Ta xihín mé jiuhún cán naxeen na ñúhu naní a ñúhu da cávaha ñaha xihín ñundáhyi jáchi quiahva já nasahnda Ndióxi chuun nuú i caja i”, cáchí tuhun Ndióxi.

Tá cándichi Jesús nū Pilato

(Mr. 15:2-5; Lc. 23:3-5; Jn. 18:33-38)

¹¹Ta ndaja coo cándichi Jesús nū Pilato, da cúú gobernador. Ta já nacasáhá da cán ndáca tuhún ñahá da já cáchí da já xihín á:

—Á mé a ndaa cúún in rey, da cómí cuéntá sahá na Israel.

—Ajan. Jivi ndusa cúú u tá quiahva cáchí ndó jan —nacachi Jesús xihín dá.

¹²Ta na sacuahā nuú jutū xihín na sacuahā veñuhu nachicaan na cuachi jatá Jesús joo ni in tuhun coó nanducú ñehe a nū ná. ¹³Anda já nacachi Pilato já xihín Jesús:

—Á cō xíní johō tohún ndaja cuahá nuú cuachi jácojo na jatun —nacachi da.

¹⁴Joo ni in túhún tuhun coó nanducú ñehe Jesús nū dá. Chí cátóntó ndivaha da cúú gobernador sahá ña cō cáhan Jesús.

Sácú ini na ndaja caja na ña ná quivi Jesús

(Mr. 15:6-20; Lc. 23:13-25; Jn. 18:38-19:16)

¹⁵Taño mé víco pascua nasahiin costumbre da cúú gobernador cán sá janí da in táhan da ndácaan vecaa. Ndá da cúní ñayivi janí da, da cán cúú da janí da. ¹⁶Mé taño já nasandacaan in da naní Barrabás vecaa. Níí cúú naxita nuu tuhun sahá da yóho. ¹⁷Ta tá nataca ndihi ñayivi já nandaca tuhún Pilato na já nacachi da já xihín ná:

—Yo cúni ndo ña ná janí i. Á Barrabás janí i á Jesús, da cáchí na cúu Cristo, da nachindahá Ndióxi cacomí cuéntá sahá ñayivi. Yo janí i cúni ndo —nacachi da.

¹⁸Nacachi Pilato ña yóho xihín ná jáchi sa cánda vaha ini da ña sahá ña cáhivi ini na xihín Jesús sahá ña cán quéa nandiquiahva na mé á nu dá. ¹⁹Ta nani íin coo da nu sácoo da sáhdá da chuun vechúun cán já nachindahá ñájíhí da tuhun nu dá já nacachi ñá já: “A quíhvi ndáhun Jesús jáchi cúu dá in taa ndaa. Nuú anda véhe nasaní i nacaja Jesús ta ndícani ndivaha ini i sahá”, nacachi ñá.

²⁰Joo ndaja coo na sacuahá nuú jutú xihín na sacuahá veñuhu cán najácahan na ñayivi ña ná caca na nu Pilato ña ná janí da Barrabás ta ná cahní da Jesús. ²¹Anda já nacachi da cúu gobernador cán já xihín ná:

—Yo cúni ndó ña ná janí i.

Anda já nacachi na cán já:

—Barrabás jan va janí ndó —nacachi na xihín dá.

²²Anda já nacachi tucu Pilato já xihín ná:

—Ndía cúni ndó caja i xihín Jesús, da cáchí ndo cúu Cristo.

Anda já nacachi tóco ndihi na cán já:

—Cata caa ndó da ndica crúxu.

²³Anda já nacachi tucu Pilato já xihín ná:

—Ndá cuachi nacaja da, vaha —nacachi da xihín ná.

Joo xihín ña yóho ví ga ví nacasáhá cáyuhú na já cáchí na já:

—Cata caa ndó da ndica crúxu.

²⁴Ta tá naxini Pilato ña co yaa na cán ta ví ga ví ndíva na já natiin da ticuí ta nandahá da nu ndíhi ñayivi cán ta já nacachi da já xihín ná:

—Xihín ña yóho jána ha i nu ndo ña coo cuachi toho ndójo i saha ndá ña ná caja ndó xihín da yóho jáchi coo cuachi toho da yóho. Jata mé ndó ná cuhun ndihi va —nacachi da xihín ná.

²⁵Anda já nacachi tóco ndihi na cán já:

—Vaha ná candojo nde cuachi ta janda jahyi nde viti ná candojo na cuachi sahá ña ná quivi da —nacachi na cán xihín dá.

²⁶Anda já najaní Pilato Barrabás. Ta tá nandíhi najácaxáhan na Jesús já nandiquiahva da a ndáha ná ña ná cata caa na a ndica crúxu.

²⁷Anda já ñéhe soldado cuéntá gobernador cán Jesús yuyéhe vechúun. Já najátaca soldado cán java ga táhan da ta cán nacava toyivi da mé á ndúu da. ²⁸Tá nandíhi já natavá na jáhma á. Anda já nachinúu na in jahma cuahá túun jata. ²⁹Ta já nachinúu na in tiyivi ínu jini á. Ta nachínee na in ndoo ndahá cuáha. Ta já nacasáhá na cáxítí na nu á já sácu ndaa ichi ñahá na já cáchí na já xihín á:

—Cáhnú nahá ná cacuu yóhó, da cúu rey nuú na Israel —nacachi na.

³⁰Ta načasáhá xihnu ndaa na tójií na nuu á. Ta já cándaa na ndoo cán ndáha á ta cáni na yiquí jíní a xihín do. ³¹Ta tá sa nandihí nasacu ndaa ñahá na já nacandaa na jáhma nachinúu na jatá cán ta najácandixi tucu na a xihín jáhma mé á. Anda já ñéhe na a cuahan na cata caa na a ndica crúxu.

Tá nacata caa na Jesús ndica crúxu

(Mr. 15:21-32; Lc. 23:26-43; Jn. 19:17-27)

³²Ta tá ñéhe na Jesús cuahan na cata caa na a já nanditahan na in da naní Simón, da ñuu Cirene. Ta nacaja ndúsa na xihín dá ña ná ndicojo da crúxu nuú cata caa na Jesús. ³³Ta naxinu coo na xiquí naní Gólgota. Tuhun yóho cúni cachi a: nu ndúu lásá yiquí jíní ndii. ³⁴Mé cán nasahan na vino nu á, dó nacava táhan xihín ña ova ña ná coho a do. Joo tá naxito ndojó a do coo naxeen toho a coho a do.

³⁵Ta tá sa nandihí nacata caa na a ndica crúxu já naquehe na jáhma á nandicahnda nu táhan na. Joo jihna ñúhú nasajíquí na sahá ta da naquee vaha cán, da cán nandiquehe jáhma á. Xihín ña yóho naxinu coo nuú ña nacahyí profeta sanahá tá nacahyí da já: “Nandicahnda nu táhan mé ná cotó níhnu i ta já nasajíquí na sahá cotó maá i ta da naquee vaha cán nandiquehe da ña”, cáchí tuhun Ndióxi. ³⁶Ta já nasacoo soldado cán ndúu na ndáá ñahá na. ³⁷Ta jíní ndica crúxu cán nacahyí na ndá saha nacata caa na a já cáchí a já: “Da yóho cúu Jesús, da cúu rey nuú na Israel.”

³⁸Ta sa mé já nacata caa ri na ivi taa cuihná xihín Jesús: in da xoo cuáha ta inga da xoo íti. ³⁹Chí cáva jini mé ñayivi yáha cán cánahá na xihín á. ⁴⁰Ta já cáchí na já:

—Yóhó cáchún jánditani veñuhu cáhnu cán ta tixi uni víxí quivi cáchún jácandichi tucún ña. Tá ta mé a ndaa cúun jahyi Ndióxi jácacu mún ta cuáhán nuu ndica crúxu jan —nacachi na xihín Jesús.

⁴¹Ta quiahva já nacaja ri na sacuahá nuú jutú xihín na jánaha ley Moisés xihín na sacuahá veñuhu. Sacu ndaa na a já cáchí na já:

⁴²—Najácacu da java ga ñayivi ta viti chí a cuú caja da jácacu da mé dá. Tá ta mé a ndaa cúu dá rey nuú na Israel, ná nuu da ndica crúxu viti ñúhú já ná candúsa nde da. ⁴³Cándeé ini da Ndióxi ta cáchí da cúu da jahyi Ndióxi já quea ná quixi Ndióxi chindeé a da tá ta mé a ndaa quíhvi ini a da —nacachi na cán cánahá na xihín Jesús.

⁴⁴Quiahva já cánahá ri ndívi taa cuihná tácaa in in xoo jín á cán xihín á.

Tá naxihí Jesús

(Mr. 15:33-41; Lc. 23:44-49; Jn. 19:28-30)

⁴⁵Tá naxinu coo caxivi ndaa nacanaá nín cúu ñuyíví ta janda caa uni sahini já nacasáhá nandiyehé tucu. ⁴⁶Ta sa mé hora já nacayuhú cóhó Jesús já nacachi a já:

—Elí, Elí, lama sabactani — ña yóho cúní cachi a: Ndióxi mí i, Ndióxi mí i, ndávaha najándacoo ndáha ndó yehé.

⁴⁷Ta java na ndíta cán tá naxini johó na tuhun cáchí a já nacachi na já:

—Cána da profeta Elías —nacachi na cán.

⁴⁸Ivi laá xínu in da nasahan da nachindaxi da in ticoto ini vino iyá. Ta natató da ña nuú in yitó ndoo já nachínee da do yati yúhu Jesús ña ná coho a do. ⁴⁹Joo na java ndíta cán nacachi na já xihín dá:

—Cóho candehe yó á quixi Elías jácacu a da —nacachi na cán.

⁵⁰Anda já nacayuhú cóhó tucu Jesús já naxihí a. ⁵¹Ta ndaja coo nandatá java ndaa jahmá ndeé ña sáji nuu nuú yii ndivaha veñuhu cáhnu ñuu Jerusalén cán. Janda jini á ta janda sahá nandatá. Ta mé hora já nataan ta ndijáá yuu tóto ndúu cán nandatá. ⁵²Ta nanuna cáva nu nasañuhu na naxihí ta cuahá ñayivi, na nasacuu cuéntá Ndióxi nanditacu tucu na. ⁵³Ta tá sa nanditacu tucu Jesús já naxinu na naqueta cáva cán ñuu Jerusalén ta cuahá ndivaha ñayivi naxini ñahá.

⁵⁴Ta da cúu sacuahá nuú soldado cuéntá Roma xihín da ndáá Jesús xihín da cán tá naxini da ña nataan ta naxini da java ga ña nayaha cán já nacasáhá yíhví ndivaha da. Já nacachi da já:

—Mé a ndaa táhyí cúu da yóho in túhún jini já jahyi Ndióxi —nacachi da.

⁵⁵Ta mé cán nasandita cuahá najihí sándehe xicá na Jesús. Mé na cán cúu na nacaja ndíví ñahá nu Jesús tá nandico na mé á naquixi na janda estado Galilea. ⁵⁶Taño najihí cán nasandacaan María, ñá ñuu Magdala xihín María, ñá cúu náná Jacobo xihín José. Ta cán nasandacaan ri ñá cúu náná ndíví da cúu jahyi Zebedeo.

Tá nachicaan na yiquí cuñu Jesús ini cáva

(Mr. 15:42-47; Lc. 23:50-56; Jn. 19:38-42)

⁵⁷Ta ndaja coo nasahiin in da cuicá naní José, da ñuu Arimatea. Mé da yóho nasacuu da in táhan da nasaxica tuun xihín Jesús. Ta tá sa nacuaá já naxinu da ⁵⁸nasahan da cahan ndahví da xihín Pilato ña ná ndiquiahva da yiquí cuñu Jesús nu dá. Anda já nasahnda Pilato chuun ña ná ndiquiahva na ña nu dá. ⁵⁹Ta já nachitiví José cán yiquí cuñu Jesús xihín in jáhma vaha ña vií. ⁶⁰Ta já nachicaan da yiquí cuñu Jesús ini in yávi ña saá

ndácaan ndica cáva ña jacá nacaán da cuéntá mé dá. Ta tá nandihí já nachijahví da yuhú cáva cán xihín in yuu jáhndá cáhnu ta já naquee da cuahan da. ⁶¹Ta nu yéhe mé cáva cán nasanduu coo María, ñá ñuu Magdala xihín inga ñá naní María cán.

Tá ndáá java soldado nu ndácaan Jesús

⁶²Ta ndaja coo sa nandihí nacaja ndíví na ñaha cuéntá quiví ndíquehe ndée na. Ta inga quiví itaan najátaca táhan na sacuahá nuú jutú xihín na fariseo já nasahan na nu Pilato. ⁶³Já nacachi na já xihín dá:

—Vaxi nde nu ndo caca loho nde ñamani nu ndó. Jáchi ndícuñun ini nde ña tá nasatacu Jesús, da naxica jándahvi ñayivi cán nacachi da ña tá sa ná yaha uní quiví já nditacu tucu da. ⁶⁴Ña cúni nde quéa ná chindahá loho ndó na cuñun candaa nuú nachicaan na yiquí cuñu da cán janda quiahva ná yaha uní quiví. Jáchi tiañva náá xinú coo na naxica tuun xihín dá ñuú ta caja cuíhná na yiquí cuñu da. Ta já casáhá cachi na xihín ñayivi ñuu ña nanditacu tucu Jesús tañu na naxihí. Ta xihín ña yóho jándahvi chága na ñayivi a juú ga jihna —nacachi na.

⁶⁵Anda já nacachi Pilato já:

—Cañehe ndó in táhndá soldado. Cuáhán ndó candaa ndó nu ndácaan da tá quiahva xini mé ndó caja ndó —cáchi Pilato xihín ná.

⁶⁶Anda já naquee na cán nasahan na já nachicají vaha chága na nu ndácaan yiquí cuñu Jesús cán. Ta nasacu na sello yuu jáhndá cán ta já nasacu na soldado ña ná candaa da ña.

Tá nanditacu tucu Jesús

(Mr. 16:1-8; Lc. 24:1-12; Jn. 20:1-10)

28 Tása nayaha quiví ndíquehe ndée ná ta nativi inga quiví itaan já naxinu María, ñá ñuu Magdala xihín inga María cán sándehe na nuú nachicaan na yiquí cuñu Jesús cán. ²In naá cuití nataan ndeé ndivaha. Nayaha ña yóho jáchi nanuu in táto Ndióxi indiví. Ta najátiví a yuu jáhndá nasajahvi nuú nasandacaan yiquí cuñu Jesús cán. Ta já nasacoo a jatá. ³Ta yéhe mé táto Ndióxi cán tá quiahva yéhe tasa. Ta jáhma ndíxi a cúú á jahmá yaa cachi. ⁴Ta a juú quiahva ná yihví soldado ndúu cán nacaja táto Ndióxi chí nacasáhá quíji ninu da. Ta já nacuyú da nu ñúhu tátuhun ndii naxihí. ⁵Joo ndaja coo táto Ndióxi cán nandicahan xihín najihí cán já nacachi a já xihín ná:

—A cáyihví toho ndó. Sa xini vaha i ña ndínducú ndo Jesús, ña nacata caa na ndica crúxu. ⁶Coó toho a cán íin yóho jáchi sa nanditacu tucu a tá quiahva nacachi mé á xihín ndo. Naha ndó candehé ndo nuú nasahiin a já cuni ndó ña coó ga íin nuú nasacu na ña. ⁷Ta cama ndó cuñun ndó caxi

tuhun ndó xihín da naxica tuun xihín á ña sa nanditacu tucu Jesús tañu na sa naxihí. Ta viti cánuú mé á cuahan estado Galilea. Ta tá cuhun ndó cán já cuni ndó a. Ta ndicuhun ini ndó ña nacachi i xihín ndo —nacachi táto Ndióxi cán.

⁸Anda já naquee mé najihí cán mé nuú nasandacaan yiquí cuñu Jesús. Ta vatí yíhví na joo cávatá ndivaha na ta sahá ña cán quéa xínu na cuahan na caxi tuhun na ña yóho nuú na naxica tuun xihín Jesús cán. ⁹Ta nani cuahan na ivi laá sa íin va Jesús xihín ná. Já nacachi a já xihín ná:

—Ndióxi ná coo xihín ndo.

Anda já nacayati na cán nu á já nanumi na sahá ta nacaja cáhnu na a. ¹⁰Anda já nacachi tucu Jesús já xihín ná:

—A cáyihví toho ndó. Cuáhán ndo caxi tuhun ndó xihín na cúu cuéntá mí i ña ná cuhun na estado Galilea jáchi cán cuni na yehé —nacachi Jesús xihín najihí cán.

¹¹Ta nani xínu najihí cán cuahan na já ndáva java soldado, da nasandaa nuú nasandacaan Jesús cán naxinu da ñuu Jerusalén já nacaxi tuhun da ña nacuu nuú na sacuahá nuú jutú. ¹²Anda já najátaca táhan na sacuahá cán xihín na sacuahá veñuhu já najándique táhan na tuhun na ta já nasahan cuahá ndivaha na jiuhún nuú na soldado cán. ¹³Já nacachi na já xihín soldado cán:

—Coto a cáhan ndó ña nanditacu Jesús. Ña cachi ndó cúu ña yóho: “Na naxica tuun xihín á cán, na cán cúu na naquixi ñuú ta nacaja cuíhná na yiquí cuñu a nani naquiji nde”, já cachi ndó xihín ndá na ná ndaca tuhún ndohó. ¹⁴Ta a cáyihví toho ndó tá ná candaá ini da cúu gobernador sahá ña yóho jáchi cahan mé nde xihín dá ta chindeé nde ndohó ña ná a cája da ni in ñaha xihín ndo —nacachi na sacuahá cán xihín soldado.

¹⁵Anda já naquehe da cúu soldado cán jiuhún ta nacaja da tá quiahva nasahnda na sacuahá cán chuun nu dá. Ta xihín ña yóho nandicuita nuu tuhun sahá ña nayaha cán. Ta cáhan na Israel cán sahá ña yóho janda quivi víti.

Tá sáhná Jesús chuun nuú na naxica tuun xihín á

(Mr. 16:14-18; Lc. 24:36-49; Jn. 20:19-23)

¹⁶Joo ndíhuxu in na naxica tuun xihín Jesús cán nasahan na chí Galilea. Já nandaa na in jini yúcu tá quiahva nasahnda mé Jesús chuun nu ná. ¹⁷Ta tá naxini na mé á já nacaja cáhnu na a. Joo java na cáhvi ivi johó ini na jáchi co cándusa na ña nanditacu tucu a. ¹⁸Anda já nacayati Jesús nu ná já nacachi a já xihín ná:

—Nasahan Ndióxi ndée nuú i caja i ña náhnu ndivaha indiví xihín ñuyívi yóho. ¹⁹Sahá ña cán quéa cuáhán ndo jánahá ndo nuú ñayivi ndúu

ndijáá ñuyíví ndaja caja na caca vaha na íchi cuéntá mí i. Ta caja ndúta ndó na xihín quiví Ndióxi, tátá i ta xihín quiví yehe, da cúú in túhún jini já jahyi mé á ta xihín quiví ínima yii Ndióxi. ²⁰Ta jánaha ndó na ña ná caja na tóco ndihi ña nasahnda i nu ndó caja ndó. Ta mé a ndaa coo i xihin ndo ndijáá níi quiví janda quiahva ná xinu coo quiví ndihi saha ñuyíví. Já ná coo —nacachi Jesús.